

॥ तैत्तिरीय संहिता ॥

॥ काण्डम् ४ ॥

॥ प्रथमः प्रश्नः ॥

॥ तैत्तिरीयसंहितायां चतुर्थकाण्डे प्रथमः प्रश्नः ॥

इद्यजं प्र सुव नारिरानुष्टुभेन त्वा छन्दसा त्रीणि च॥१॥

युञ्जानः प्रथमम्मनस्तत्त्वाय सविता धियः। अग्निं
ज्योतिर्निचाय्य पृथिव्या अध्याभरत्। युक्त्वाय मनसा
देवान्सुवर्यतो धिया दिवम्। बृहज्ज्योतिः करिष्यतः सविता
प्र सुवति तान्। युक्तेन मनसा वयं देवस्य सवितुः सवे।
सुवर्गेयाय शक्त्यै। युञ्जते मन उत युञ्जते धियो विप्रा विप्रस्य
बृहतो विपश्चितः। वि होत्रा दधे वयुनाविदेक इत् [1]

मही देवस्य सवितुः परिष्टुतिः। युजे वाम्ब्रह्म पूर्य
नमोभिर्वि श्लोका यन्ति पथ्येव सूराः। शृण्वन्ति विश्वे
अमृतस्य पुत्रा आ ये धामानि दिव्यानि तस्थुः। यस्य
प्रयाणमन्वन्य इद्ययुर्देवा देवस्य महिमानमर्चतः। यः
पार्थिवानि विममे स एतशो रजांसि देवः सविता

महित्वना। देवं सवितुः प्र सुंव यज्ञम्प्र सुंव [2]

यज्ञपतिम्भगाय दिव्यो गन्धर्वः। केतुपूः केतं नः पुनातु
वाचस्पतिर्वाचमद्य स्वदाति नः। इमं नो देव सवितर्यज्ञं प्र
सुंव देवायुवः सखिविदः सत्राजितं धनजितः सुवर्जितम्।
ऋचा स्तोमः समर्धय गायत्रेण रथंतरम्। बृहद्वायव्रवर्तनि।
देवस्य त्वा सवितुः प्रसवेऽश्विनोर्बाहुभ्याम्पूष्णो
हस्ताभ्याम्गायत्रेण छन्दसाऽऽदेदे ऽङ्गिरस्वदभिरसि
नारिः [3]

असि पृथिव्याः सधस्थादग्निम्पुरीष्यमङ्गिरस्वदा भर
त्रैष्टुभेन त्वा छन्दसाऽऽदेदेऽङ्गिरस्वद्वभिरसि नारिरसि त्वया
वयः सधस्थ आग्निः शकेम खनितुम्पुरीष्यं जागतेन त्वा
छन्दसाऽऽदेदेऽङ्गिरस्वद्वस्त आधाय सविता बिभ्रदभिः
हिरण्ययीम्। तया ज्योतिरजस्रमिदग्निं खात्वी न आ
भरानुष्टुभेन त्वा छन्दसाऽऽदेदेऽङ्गिरस्वत्॥

प्रतुर्वन्धस्य तिष्ठ जिघर्मि भेत्तारं वि०शतिश्च॥2॥

इमामगृभ्णन्नशनामृतस्य पूर्वं आयुषि विदथेषु कव्या।
तया देवाः सुतमा बभूवुर्ऋतस्य सामन्त्सरमारपन्ती।

प्रतूर्तं वाजिन्ना द्रव वरिष्ठामनु संवतम्। दिवि ते जन्म
 परममन्तरिक्षे नाभिः पृथिव्यामधि योनिः। युञ्जाथाः रासंभं
 युवमस्मिन् यामे वृषण्वसू। अग्निम्भरन्तमस्मयुम्। योगेयोगे
 तवस्तरं वाजेवाजे हवामहे। सखाय इन्द्रमृतये। प्रतूर्वन्
 [5]

एह्यवक्रामन्नशस्ती रुद्रस्य गाणपत्यान्मयोभूरेहि।
 उर्वन्तरिक्षमन्विहि स्वस्तिगव्यूतिरभयानि कृण्वन्। पूष्णा
 सयुजा सह। पृथिव्याः सधस्थादग्निम्पुरीष्यमङ्गिरस्वदच्छेह्यग्निम्
 स्वद्वरिष्यामोऽग्निम्पुरीष्यमङ्गिरस्वद्वरामः। अन्वग्निरुषसामग्रम
 प्रथमो जातवेदाः। अनु सूर्यस्य [6]

पुरुत्रा च रश्मीननु द्यावापृथिवी आ ततान। आगत्य
 वाज्यध्वनः सर्वा मृधो वि धूनुते। अग्निः सधस्थे महति
 चक्षुषा नि चिकीषते। आक्रम्य वाजिन्यपृथिवीमग्निमिच्छ रुचा
 त्वम्। भूम्या वृत्वाय नो ब्रूहि यतः खनाम् तं वयम्।
 द्यौस्ते पृष्ठमपृथिवी सधस्थमात्मान्तरिक्षः समुद्रस्ते योनिः।
 विख्याय चक्षुषा त्वमभि तिष्ठ [7]

पृतन्यतः। उत्क्राम महते सौभगायास्मादास्थानाद्विणोदा

वाजिन्। वयः स्याम सुमतौ पृथिव्या अग्निं खनिष्यन्तं
 उपस्थे अस्याः। उदक्रमीद्वविणोदा वाज्यर्वाकः स लोकः
 सुकृतम्पृथिव्याः। ततः खनेम सुप्रतीकमग्निः सुवो रुहाणा
 अधि नाकं उत्तमे। अपो देवीरुपं सृज मधुमतीरयक्ष्माय
 प्रजाभ्यः। तासां स्थानादुज्जिहतामोषधयः सुपिप्पलाः।
 जिघर्मि [8]

अग्निम्मनसा घृतेन प्रतिक्ष्यन्तम्भुवनानि विश्वा।
 पृथुं तिरश्चा वयसा बृहन्तं व्यचिष्ठमन्नं रभसं
 विदानम्। आ त्वा जिघर्मि वचसा घृतेनारक्षसा
 मनसा तज्जुषस्व। मर्यश्रीः स्पृहयद्वर्णो अग्निर्नाभिमृशे
 तनुवा जर्हृषाणः। परि वाजपतिः कविरग्निर्हव्या
 न्यक्रमीत्। दधद्रत्नानि दाशुषे। परि त्वाग्ने पुरं वयं विप्रः
 सहस्य धीमहि। धृषद्वर्णं दिवेदिवे भेत्तारम्भङ्गुरावतः।
 त्वमग्ने द्युभिस्त्वमाशुशुक्षणिस्त्वमद्भ्यस्त्वमश्मनस्परि। त्वं
 वनेभ्यस्त्वमोषधीभ्यस्त्वं नृणां नृपते जायसे शुचिः॥ [9]

स्थ ईधे शोचंस्व सप्तविंशतिश्च॥3॥

देवस्य त्वा सवितुः प्रसवेऽश्विनोर्बाहुभ्याम्पूष्णो

हस्ताभ्याम्पृथिव्याः सुधस्थेऽग्निम्पुरीष्यमङ्गिरस्व- त्वं नामि।
ज्योतिष्मन्तं त्वाग्ने सुप्रतीकमजस्रेण भानुना दीद्यानम्।
शिवम्प्रजाभ्योऽहिंसन्त- म्पृथिव्याः सुधस्थेऽग्निं
पुरीष्यमङ्गिरस्वत्वं नामि। अपाम्पृष्ठमसि सप्रथा
उर्वग्निर्भरिष्यदपरावपिष्ठम्। वर्धमानम्मह आ च पुष्करं
दिवो मात्रया वरिणा प्रथस्व। शर्म च स्थः [10]

वर्म च स्थो अच्छिद्रे बहुले उभे। व्यचस्वती सं
वसाथाम्भर्तमग्निम्पुरीष्यम्। सं वसाथां सुवर्विदां समीची
उरसा त्मना। अग्निमन्तर्भरिष्यन्ती ज्योतिष्मन्तमजस्रमिह।
पुरीष्योऽसि विश्वभराः। अथर्वा त्वा प्रथमो निरमन्थदग्ने।
त्वामग्ने पुष्करादध्यथर्वा निरमन्थत। मूर्ध्नो विश्वस्य वाघतः।
तमु त्वा दध्यङ्घ्रिषिः पुत्र ईधे [11]

अथर्वणः। वृत्रहणम्पुरन्दरम्। तमु त्वा पाथ्यो वृषा
समीधे दस्युहन्तमम्। धनंजयं रणेरणे। सीदं होतः
स्व उ लोके चिकित्वान्त्सादया यज्ञं सुकृतस्य योनौ।
देवावीर्देवान् हविषा यजास्यग्ने बृहद्यजमाने वयो धाः। नि
होता होतृषदने विदानस्त्वेषो दीदिवा अंसदत्सुदक्षः।

अद॑ब्ध॒व्रत॑प्रम॒तिर्व॑सि॒ष्ठः स॒हस्र॑म्भ॒रः शुचि॑जिह्वो अ॒ग्निः। स॒
सी॑दस्व म॒हा॒ अ॒सि शोच॑स्व [12]

दे॒व॒वी॒त॑मः। वि धू॒म॑म॒ग्ने अ॒रु॒ष॒मि॑ये॒ध्य सृ॒ज प्र॑शस्त
दर्श॑तम्। जनि॑ष्वा हि जे॒न्यो अ॒ग्ने अ॒ह्ना॑ ह॒तो ह॒तेष्व॑रु॒षो
वने॑षु। दमे॑दमे स॒प्त रत्ना॑ दधा॒नोऽग्नि॑र॒होता॑ नि ष॑सादा
यजी॑यान्॥ [13]

सुश॑स्तिभि॒श्शिवो॑ भ॒व याहि॑ ष॒द्वि॒श॒च्च॥४॥

सं ते॑ वा॒यु॒र्मा॒तरि॑श्वा॒ दधा॑तू॒त्ताना॑यै हृद॑यं यद्वि॒लि॑ष्टम्।
दे॒वानां॑ यश्चर॑ति प्रा॒णथे॑न॒ तस्मै॑ च दे॒वि व॑ष॒डस्तु॑ तु॒भ्यम्।
सुजा॑तो॒ ज्योति॑षा स॒ह श॑र्म वरू॒थ॒मास॑दः सु॒वः। वासो॑ अ॒ग्ने
वि॒श्वरू॑प॒ सं व्य॑यस्व वि॒भाव॑सो। उदु॑ तिष्ठ स्वध्व॒रावां
नो दे॒व्या कृ॑पा। दृ॒शे च॑ भा॒सा बृ॑ह॒ता सु॑शु॒क्निरा॒ग्ने याहि॑
सुश॑स्तिभिः। [14]

ऊ॒र्ध्व ऊ॒ षु णं॑ ऊ॒तये॑ तिष्ठा॒ दे॒वो न॑ सं॒वि॒ता। ऊ॒र्ध्वो
वाज॑स्य॒ सनि॑ता॒ यद॑ञ्जिभि॒र्वाघ॑द्वि॒र्वि॒ह्वया॑महे। स जा॒तो
गर्भो॑ अ॒सि रोद॑स्यो॒र॒ग्ने चा॒रुर्वि॑भृ॒त ओष॑धीषु। चि॒त्रः शि॑शुः
परि॑ तमा॒स्य॒क्तः प्र मा॑तृ॒भ्यो अधि॑ कनि॒क्रद॑द्वाः। स्थि॒रो

भ॒व वी॒ङ्ग आ॒शु॒र्भ॒व वा॒ज्य॒र्व॒न् । पृ॒थु॒र्भ॒व सु॒ष॒द॒स्त्व॒म॒ग्नेः
पु॒री॒ष॒वा॒ह॒नः । शि॒वो भ॒व [15]

प्र॒जा॒भ्यो मा॒नु॒षी॒भ्य॒स्त्व॒म॒ङ्गि॒रः । मा द्या॒वा॒पृ॒थि॒वी
अ॒भि शू॒शु॒चो मा॒न्तरि॒क्ष॒म्मा व॒न॒स्प॒तीन् । प्रै॒तु वा॒जी
क॒नि॒क्र॒द॒न्नान॑द॒द्रास॑भः प॒त्वा । भ॒र॒न्न॒ग्नि॒म्पु॒री॒ष्य॒म्मा पा॒द्यायु॑षः
पु॒रा । रा॒स॒भो वा॑ क॒नि॒क्र॒द॒त्सु॒यु॒क्तो वृ॒षणा॑ रथे । स
वा॒म॒ग्नि॒म्पु॒री॒ष्य॒मा॒शु॒र्दू॒तो व॑हा॒दि॒तः । वृ॒षा॒ग्निं वृ॒षण॑म्भ॒र॒न्पां
ग॒र्भं॒॑ समु॒द्रि॒यम् । अ॒ग्र आ॒ या॒हि [16]

वी॒त॒यं ऋ॒तं स॒त्यम् । ओष॑ध॒यः प्र॒ति गृ॒ही॒ता॒ग्नि॒मे॒तं
शि॒व॒मा॒य॒न्त॑म॒भ्य॒त्र यु॒ष्मान् । व्य॒स्य॒न्वि॒श्वा अ॒म॒ती॒र॒रा॒ती॒र्नि॒षी॒द॒न्त्रो
अ॒पं दु॒र्म॒तिं॑ ह॒नत् । ओष॑ध॒यः प्र॒ति मो॒द॒ध्व॒मे॒न॒म्पु॒ष्पा॒व॒तीः
सु॒पि॒प्प॒लाः । अ॒यं वो॒ ग॒र्भं ऋ॒त्वि॒यः प्र॒त्नं॑ स॒ध॒स्थ॒मा॒स॑दत् ॥
[17]

मित्रः करोत्वन्तरिक्षमसि प्र चत्वारि च॥5॥

वि पा॒जं॒सा पृ॒थु॒ना शो॒शु॒चा॒नो बा॒ध॒स्व द्वि॒षो र॒क्ष॒सो
अ॒मी॒वाः । सु॒श॒र्म॒णो बृ॒ह॒तः श॒र्म॒णि स्या॒म॒ग्ने॒र॒हं॑ सु॒ह॒व॑स्य
प्र॒णी॒तौ । आ॒पो हि ष्ठा म॑यो॒भु॒व॒स्ता न॑ ऊ॒र्जे द॑धात॒न । म॒हे

रणा॒य॒ चक्ष॑से। यो वः शि॒वत॑मो रस॒स्तस्य॑ भाजयते॒ह नः॑।
 उ॒श॒तीरि॑व मा॒तरः॑। तस्मा॒ अरं॑ गमाम वो॒ यस्य॒ क्षया॑य॒
 जिन्व॑थ। आपो॑ ज॒नय॑था च नः। मि॒त्रः [18]

स॒ꣳसृ॒ज्यं पृ॒थि॒वीम्भूमिं॑ च॒ ज्योति॑षा स॒ह। सु॒जातं॑
 जा॒तवे॑दसम॒ग्निं वै॑श्वान॒रं वि॒भुम्। अ॒य॒क्ष्माय॑ त्वा सꣳ सृ॒जामि
 प्र॒जाभ्यः॑। वि॒श्वे॑ त्वा दे॒वा वै॑श्वान॒राः सꣳ सृ॒जन्त्वानु॑ष्टु॒भेन॒
 छन्द॑साङ्गिर॒स्वत्। रु॒द्राः स॒म्भृत्य॑ पृ॒थि॒वीम्बृ॒हज्योतिः॑
 समी॑धिरे। तेषाम्भा॒नुरज॑स्र इच्छु॒क्रो दे॒वेषु॑ रोचते। सꣳसृष्टां॑
 वसु॑भी रु॒द्रैर्धीरैः॑ कर्म॒ण्याम॑मृद॒म्। हस्ता॑भ्याम्मृ॒द्धीं कृ॒त्वा
 सि॒नीवा॒ली क॑रोतु [19]

ताम्। सि॒नीवा॒ली सु॑कप॒र्दा सु॑कुरी॒रा स्वौप॑शा। सा
 तुभ्य॑मदिते मह॒ ओखां॑ दधातु हस्त॑योः। उ॒खां क॑रोतु शक्त्या॑
 बा॒हुभ्या॑मदितिर्धिया॑। मा॒ता पु॒त्रं यथो॑पस्थे सा॒ग्निम्बि॑भर्तु
 गर्भ॑ आ। म॒खस्य॒ शिरो॑ऽसि य॒ज्ञस्य॑ प॒दे स्थः॑। वस॑वस्त्वा
 कृ॒ण्वन्तु गाय॑त्रेण॒ छन्द॑साङ्गिर॒स्वत्पृ॒थिव्य॑सि रु॒द्रास्त्वा
 कृ॒ण्वन्तु त्रैष्टु॑भेन॒ छन्द॑साङ्गिर॒स्वद॒न्तरि॑क्षमसि [20]

आ॒दि॒त्यास्त्वा॑ कृ॒ण्वन्तु जा॑ग॒तेन॒ छन्द॑साङ्गिर॒स्वद्वौर॑सि

विश्वे॑ त्वा दे॒वा वै॑श्वान॒राः कृ॒ण्वन्त्वानु॑ष्टु॒भेन॒ छन्द॑साङ्गि॒रस्वदि॑शोऽ
 ध्रु॒वासि॑ धा॒रया॒ मयि॑ प्र॒जाः रा॒यस्पोष॑ गौप॒त्यः सु॒वीर्य॑
 सजा॑तान् यज॑माना॒यादि॑त्यै रा॒स्त्रास्य॑दि॒तिस्ते॒ बिलं॑ गृह्णातु
 पाङ्के॑न॒ छन्द॑साङ्गि॒रस्वत्। कृ॒त्वाय॒ सा म॒हीमु॒खाम्मु॒न्मयी॑
 योनि॑म॒ग्रये॑। ताम्पु॒त्रेभ्यः॒ सम्प्राय॑च्छु॒ददि॑तिः श्र॒पया॒निति॑॥
 [21]

पर्वीरिमा९ रुद्रास्त्वाच्छन्दन्वेकाग्रवि९श्रुतिश्च॥6॥

वस॑वस्त्वा धू॒पय॑न्तु गा॒य॒त्रेण॒ छन्द॑साङ्गि॒रस्वद्रु॑द्रास्त्वा
 धू॒पय॑न्तु त्रैष्टु॑भेन॒ छन्द॑साङ्गि॒रस्वदा॑दि॒त्यास्त्वा॑ धू॒पय॑न्तु
 जाग॑तेन॒ छन्द॑साङ्गि॒रस्वद्वि॑श्वे॒ त्वा दे॒वा वै॑श्वान॒रा
 धू॒पय॑न्त्वानु॑ष्टु॒भेन॒ छन्द॑साङ्गि॒रस्वदिन्द्र॑स्त्वा धू॒पय॑त्वङ्गि॒रस्वद्वि॑ष्णु
 धू॒पय॑त्वङ्गि॒रस्वद्वरु॑णस्त्वा धू॒पय॑त्वङ्गि॒रस्वदि॑तिस्त्वा दे॒वी
 वि॒श्वदे॑व्यावती पृथि॒व्याः स॒धस्थे॑ऽङ्गि॒रस्वत्ख॑नत्ववट दे॒वानां॑
 त्वा पत्नीः॑ [22]

दे॒वीर्वि॒श्वदे॑व्यावतीः पृथि॒व्याः स॒धस्थे॑ऽङ्गि॒रस्वद॑धतूखे
 धि॒षणा॑स्त्वा दे॒वीर्वि॒श्वदे॑व्यावतीः पृथि॒व्याः स॒धस्थे॑
 ऽङ्गि॒रस्वद॑भीन्ध॒तामुखे॒ ग्रास्त्वा॑ दे॒वीर्वि॒श्वदे॑व्यावतीः

पृथिव्याः सधस्थेऽङ्गिरस्वच्छपयन्तूखे वरूत्रयो जनयस्त्वा
 देवीर्विश्वदैव्यावतीः पृथिव्याः सधस्थेऽङ्गिरस्वत्पचन्तूखे।
 मित्रेतामुखाम्पचैषा मा भेदि। एतां ते परि ददाम्यभित्यै।
 अभीमाम् [23]

महिना दिवमित्रो बभूव सप्रथाः। उत श्रवसा
 पृथिवीम्। मित्रस्य चर्षणीधृतः श्रवो देवस्य सानसिम्।
 द्युम्नं चित्रश्रवस्तमम्। देवस्त्वा सवितोद्वपतु सुपाणिः
 स्वङ्गुरिः। सुबाहुरुत शक्त्या। अपद्यमाना पृथिव्याशा
 दिश आ पूण। उत्तिष्ठ बृहती भवोर्ध्वा तिष्ठ ध्रुवा त्वम्।
 वसवस्त्वाच्छृन्दन्तु गायत्रेण छन्दसाङ्गिरस्वद्रुद्रास्त्वा
 च्छृन्दन्तु त्रैष्टुभेन छन्दसाङ्गिरस्वदादित्यास्त्वाच्छृन्दन्तु
 जागतेन छन्दसाङ्गिरस्वद्विश्वे त्वा देवा वैश्वानरा
 आच्छृन्दन्त्वानुष्टुभेन छन्दसाङ्गिरस्वत्॥ [24]

इमे शिवो अग्नेऽति सोमगाय चतुस्त्रिंशच्च॥ 7॥

समास्त्वाग्र ऋतवो वर्धयन्तु संवत्सरा ऋषयो यानि
 सत्या। सं दिव्येन दीदिहि रोचनेन विश्वा आ भाहि प्रदिशः
 पृथिव्याः। सं चेध्यस्वाग्ने प्र च बोधयेन्मुचं तिष्ठ महते

सौभगाय। मा च रिषदुपसत्ता ते अग्रे ब्रह्माणस्ते यशसः
सन्तु मान्ये। त्वामग्रे वृणते ब्राह्मणा इमे शिवो अग्रे [25]

सुवरणे भवा नः। सुपत्नहा नो अभिमातिजिच्च स्वे गये
जागृह्यप्रयुच्छन्। इहैवाग्रे अधि धारया रयिम्मा त्वा नि
क्रन्पूर्वचितो निकाऱिणः। क्षत्रमग्रे सुयममस्तु तुभ्यमुपसत्ता
वर्धतां ते अनिष्टृतः। क्षत्रेणाग्रे स्वायुः स९ रभस्व मित्रेणाग्रे
मित्रधेये यतस्व। सजातानाममध्यमस्था एधि राज्ञामग्रे
विहव्यो दीदिहीह। अति [26]

निहो अति स्निधोऽत्यचित्तिमत्यरातिमग्रे। विश्वा ह्यग्रे
दुरिता सहस्वाथास्मभ्य९ सहवीरा९ रयिं दाः। अनाधृष्यो
जातवेदा अनिष्टृतो विराडग्रे क्षत्रभृद्दीदिहीह। विश्वा आशाः
प्रमुञ्चन्मानुषीर्भियः शिवाभिर्द्य परि पाहि नो वृधे। बृहस्पते
सवितर्बोधयैन९ स९शितं चित्संतरा९ स९ शिशाधि।
वर्धयैनम्महते सौभगाय [27]

विश्वं एनमनु मदन्तु देवाः। अमुत्रभूयादध यद्यमस्य
बृहस्पते अभिशस्तेरमुञ्चः। प्रत्यौहतामश्विना मृत्युमस्माद्देवानाम्
भिषजा शचीभिः। उद्वयं तमसस्परि पश्यन्तो ज्योतिरुत्तरम्।

दे॒वं दे॒व॒त्रा सूर्य॒मग॑न्म॒ ज्योति॑रुत्त॒मम्॥ [28]

अ॒ग्नेः स सर॑स्वती द्या॒ः सु॒ह विश्व॑ञ्चतु॒र्भिः॒ शश्व॑॥८॥

ऊ॒र्ध्वा अ॑स्य स॒मिधो॑ भवन्त्यू॒र्ध्वा शु॒क्रा शो॒ची॒ऽप्य॒ग्नेः।
द्यु॒मत्त॑मा सु॒प्रती॑कस्य सू॒नोः। तनू॑नपा॒दसु॑रो वि॒श्ववे॑दा दे॒वो
दे॒वेषु॑ दे॒वः। प॒थ आन॑क्ति म॒ध्वा घृ॑तेन॑। म॒ध्वा य॒ज्ञं न॑क्षसे
प्रीणा॒नो नरा॒श॒ःसो अ॒ग्ने। सु॒कृद्दे॒वः संवि॑ता वि॒श्ववा॑रः।
अच्छा॒यमे॑ति शव॑सा घृ॒तेने॑डा॒नो वह्नि॑र्नम॑सा। अ॒ग्निः॒ स्रुचो॑
अध्व॑रेषु॑ प्र॒यत्सु॑। स य॑क्षदस्य महि॒मान॑म॒ग्नेः सः [29]

ई म॒न्द्रासु॑ प्र॒यसः॑। वसु॑श्चेति॒ष्ठो वसु॑धात॑मश्च। द्वा॒रो
दे॒वीर॑न्व॒स्य वि॒श्वे व्र॑ता द॑दन्ते अ॒ग्नेः। उ॒रुव्य॑च॒सो धाम्ना॑
पत्य॑मानाः। ते अ॑स्य योष॑णे दि॒व्ये न योना॑वुषासा॒नक्ता॑।
इ॒मं य॒ज्ञम॑वतामध्व॒रं नः॑। दै॒व्या होता॑रावू॒र्ध्वम॑ध्व॒रं
नोऽग्ने॑र्जि॒ह्वाम॑भि गृणी॑तम्। कृ॒णुत॑ नः॒ स्वि॑ष्टिम्। ति॒स्रो
दे॒वीर्ब॒र्हिरे॑द॒ः स॑द॒न्त्विडा॑ सर॑स्वती [30]

भा॒र॑ती। म॒ही गृ॑णा॒ना। तन्न॑स्तु॒रीप॑मद्भुत॒म्पुरु॑क्षु त्वष्टा॑
सु॒वीर॑म्। रा॒यस्पोष॑ वि॒ष्यतु॑ नाभि॑म॒स्मे। वन॑स्प॒तेऽव॑ सृजा॒
ररा॑ण॒स्त्मना॑ दे॒वेषु॑। अ॒ग्निर्ह॒व्यः॒ शमि॑ता स॒दया॑ति। अ॒ग्ने

स्वाहा॑ कृणुहि॑ जा॒तवे॒द इन्द्रा॑य ह॒व्यम्। वि॒श्वे दे॒वा ह॒विरि॒दं
जु॒षन्ता॑म्। हि॒र॒ण्य॒ग॒र्भः स॒म॒व॒र्त॒ता॒ग्रे भू॒तस्य॑ जा॒तः प॒तिरे॒कं
आसी॑त्। स दा॑धार पृथि॒वीं द्याम् [31]

उ॒तेमां॑ कस्मै॑ दे॒वाय॑ ह॒विषा॑ विधेम। यः प्रा॑ण॒तो नि॑मिष॒तो
म॑हि॒त्वैक॒ इ॒द्रा॒जा ज॒ग॒तो ब॒भूव॑। य ई॒शे अ॒स्य द्वि॒प॒दश्चतु॑ष्प॒दः
कस्मै॑ दे॒वाय॑ ह॒विषा॑ विधेम। य आ॑त्म॒दा ब॑ल॒दा यस्य॑ वि॒श्व
उ॒पा॒स॒ते प्र॒शिषं॑ यस्य॑ दे॒वाः। यस्य॑ छा॒यामृ॑तं यस्य॑ मृ॒त्युः
कस्मै॑ दे॒वाय॑ ह॒विषा॑ विधेम। यस्ये॒मे हि॒म॒व॒न्तो म॑हि॒त्वा यस्य॑
स॒मु॒द्रः र॒स॒या स॒ह [32]

आ॒हुः। यस्ये॒माः प्र॒दि॒शो॒ यस्य॑ बा॒हू कस्मै॑ दे॒वाय॑ ह॒विषा॑
विधेम। यं क्र॑न्द॒सी॒ अव॑सा॒ तस्त॑भा॒ने अ॒भ्यै॒क्षेता॑म्म॒नसा॑
रेज॑माने। यत्रा॒धि सूर॑ उ॒दि॒तौ व्ये॒ति॒ कस्मै॑ दे॒वाय॑ ह॒विषा॑
विधेम। येन॑ द्यौरु॒ग्रा पृ॑थि॒वी च॑ दृ॒ढे येन॑ सु॒वः स्त॑भि॒तं येन॑
नाकः॑। यो अ॒न्तरि॑क्षे॒ रज॑सो वि॒मानः॑ कस्मै॑ दे॒वाय॑ ह॒विषा॑
विधेम। आपो॑ ह॒ यन्म॑ह॒तीर्वि॒श्वम् [33]

आ॒य॒न्दक्षं॑ दधा॒ना ज॒नय॑न्तीर॒ग्निम्। ततो॑ दे॒वानां॑
नि॒र॒व॒र्त॒तासु॑रे॒कः कस्मै॑ दे॒वाय॑ ह॒विषा॑ विधेम। यश्चि॒दापो॑

महि॒ना पर्य॑पश्य॒दक्षं॑ दधा॒ना ज॒नय॑न्तीर॒ग्निम्। यो दे॒वेष्वधि॑
दे॒व एक॑ आसी॒त्कस्मै॑ दे॒वाय॑ ह॒विषा॑ विधेम॥ [34]

वीरयुस्वा तपन्वि९शतिश्च॥१॥

आकू॑तिम॒ग्निम्प्र॒युज॑ः॒ स्वाहा॒ मनो॑ मे॒धाम॒ग्निम्प्र॒युज॑ः॒
स्वाहा॑ चि॒त्तं वि॒ज्ञात॑म॒ग्निम्प्र॒युज॑ः॒ स्वाहा॑ वा॒चो
विधृ॑तिम॒ग्निम्प्र॒युज॑ः॒ स्वाहा॑ प्र॒जाप॑तये॒ मनवे॑ स्वाहा॒ग्नये॑
वैश्वान॒राय॒ स्वाहा॒ विश्वे॑ दे॒वस्य॑ ने॒तुर्म॑र्तो वृणीत स॒ख्यं विश्वे॑
रा॒य इ॑षु॒ध्यसि॑ द्यु॒म्नं वृ॑णीत पु॒ष्यसे॒ स्वाहा॒ मा सु॑ भि॒त्था मा
सु रि॑षो॒ दृ९ह॑स्व वी॒डय॑स्व सु। अ॒म्ब धृ॑ष्णु वी॒रय॑स्व [35]

अ॒ग्निश्चे॒दं क॑रिष्यथः। दृ९ह॑स्व दे॒वि पृ॑थि॒वि स्व॒स्तय॑
आसु॑री मा॒या स्व॒धया॑ कृ॒तासि॑। जुष्टं॑ दे॒वाना॑मि॒दम॑स्तु
ह॒व्यम॑रि॒ष्टा त्वमु॑दि॒हि य॒ज्ञे अ॒स्मिन्। मि॒त्रे॒तामु॒खां त॑पै॒षा
मा भे॑दि। ए॒तान्ते॒ परि॑ ददा॒म्यभि॑त्यै। द्व॒न्नः सर्पि॑रा॒सुतिः
प्र॒बो होता॑ वरे॒ण्यः। सह॑स॒स्पुत्रो॑ अ॒द्भुतः॑। पर॑स्या॒ अधि॑
सं॒वतो॑ऽव॒रा९ अ॒भ्या [36]

त॒रा यत्रा॑हमस्मि॒ ता९ अ॑व। प॒रम॑स्याः॑ प॒राव॑तो
रोहि॑द॒श्व इ॒हा ग॑हि। पु॒री॒ष्यः पु॒रुप्रि॑योऽग्ने॒ त्वं त॑रा॒

मृधः। सीद त्वम्मातुरस्या उपस्थे विश्वान्यग्रे वयुनानि
 विद्वान्। मैनामर्चिषा मा तपसाभि शूशुचोऽन्तरस्याः
 शुक्रज्योतिर्वि भाहि। अन्तरग्रे रुचा त्वमुखायै सदने स्वे।
 तस्यास्त्वः हरसा तपञ्जातवेदः शिवो भव। शिवो भूत्वा
 मह्यमग्रेऽथो सीद शिवस्त्वम्। शिवाः कृत्वा दिशः सर्वाः
 स्वां योनिमिहासदः॥ [37]

नाभा वने येन यामि खामा रुक्मोऽष्टात्रिंशच्च॥10॥

यदग्रे यानि कानि चा ते दारूणि दध्मसि। तदस्तु
 तुभ्यमिद्धृतं तज्जुषस्व यविष्ठ। यदत्युपजिह्विका यद्वम्रो
 अतिसर्पति। सर्वं तदस्तु ते घृतं तज्जुषस्व यविष्ठ।
 रात्रिं रात्रिमप्रयावम्भरन्तोऽश्वायेव तिष्ठते घासमस्मै।
 रायस्पोषेण समिषा मदन्तोऽग्रे मा ते प्रतिवेशा रिषाम।
 नाभा [38]

पृथिव्याः समिधानमग्निः रायस्पोषाय बृहते
 हवामहे। इरम्मदम्बृहदुक्थं यजत्रं जेतारमग्निम्पृतनासु
 सासहिम्। याः सेना अभीत्वरीराव्याधिनीरुगणा
 उता ये स्तेना ये च तस्करास्ताः स्ते अग्रेऽपि

दधाम्यास्ये॑। द॒ष्टा॑भ्याम्म॒लिमु॒ञ्ज॒म्यैस्त॒स्क॑रा॒ ५ उ॒त।
ह॒नू॑भ्या॒ ५ स्ते॒ना॒न्भ॑गव॒स्ता॒ ५ स्त्वं खा॑द सु॒खादि॑तान्। ये जने॑षु
म॒लिमु॑वः स्ते॒नास॒स्त॒स्क॑रा॒ वने॑। ये [39]

कक्षे॑ष्वघा॒यव॒स्ता॒ ५ स्ते॑ दधामि॒ जम्भ॑योः। यो
अ॒स्मभ्य॑मराती॒याद्य॑श्च॒ नो॒ द्वेष॑ते॒ जनः॑। नि॒न्दा॒द्यो अ॒स्मान्
दि॒प्सा॑च्च॒ सर्वं॑ त॒म्म॑स्म॒सा कुरु॑। स॒ ५ शि॑तं मे॒ ब्रह्म॑
स॒ ५ शि॑तं वीर्यं बलम्। स॒ ५ शि॑तं क्ष॒त्रं जि॒ष्णु॒ यस्या॒हमस्मि॑
पु॒रोहि॑तः। उ॒दैषा॑म्बा॒हू अ॑तिर॒मुद्व॑र्च॒ उदू॑ बलम्। क्षि॒णोमि॒
ब्रह्म॑णा॒मित्रा॑नु॒न्नयामि॑ [40]

स्वा॒ ५ अ॒हम्। दृ॒शा॒नो रु॒क्म उ॒र्व्या व्य॑द्यौ॒दुर्म॑र्ष॒मायुः॑ श्रिये
रु॒चा॒नः। अ॒ग्नि॒र॒मृतो॑ अ॒भव॒द्वयो॑भिर्यदे॒नं द्यौ॑रज॒नय॑त्सुरेताः।
वि॒श्वा रू॒पाणि॑ प्रति॒ मुञ्च॑ते क॒विः प्रा॑सा॒वीद्भ॑द्रं द्वि॒पदे॑ चतु॒ष्पदे॑।
वि नाकं॑म॒ख्यत्स॒विता॒ वरे॑ण्योऽनु॒ प्रया॑णं॒मुष॑सो॒ वि रा॑जति।
न॒क्तो॒षासा॒ सम॑नसा॒ विरू॑पे धा॒पये॑ते शिशु॒मेक॑ ५ समी॒ची।
द्यावा॒ क्षामा॑ रु॒क्मः [41]

अ॒न्तर्वि॑ भा॒ति दे॒वा अ॒ग्निं धा॑रय॒न्द्रवि॑णो॒दाः। सु॒पर्णो॑ऽसि
ग॒रु॒त्मा॑न्नि॒वृत्ते॒ शिरो॑ गाय॒त्रं चक्षुः॑ स्तोमं॑ आ॒त्मा सामं॑

ते तनूर्वामदेव्यम्बृहद्रथन्तरे पक्षौ यज्ञायज्ञियम्पुच्छं
छन्दांस्यङ्गानि धिष्ण्याः शफा यजूंषि नामा
सुपर्णोऽसि गरुत्मान्दिवं गच्छ सुवः पत॥ [42]

पुरुषत्वतां यजतन्ते अन्यत्सहन्ते चनोहितोऽष्टौ च॥11॥

अग्ने यं यज्ञमध्वरं विश्वतः परिभूरसि। स इद्वेवेषु
गच्छति। सोम यास्ते मयोभुव ऊतयः सन्ति दाशुषे।
ताभिर्नोऽविता भव। अग्निर्मूर्धा भुवः। त्वं नः सोम या
ते धामानि। तत्सवितुर्वरेण्यम्भर्गो देवस्य धीमहि। धियो
यो नः प्रचोदयात्। अचित्ती यच्चकृमा दैव्ये जने दीनैर्दक्षैः
प्रभूती पूरुषत्वता। [43]

देवेषु च सवितुर्मानुषेषु च त्वं नो अत्र सुवतादनागसः।
चोदयित्री सूनृतानां चेतन्ती सुमतीनाम्। यज्ञं दधे सरस्वती।
पावीरवी कन्या चित्रायुः सरस्वती वीरपत्नी धियं धात्।
ग्राभिरच्छिद्रं शरणं सजोषा दुराधर्षं गृणते शर्म यंसत्।
पूषा गा अन्वेतु नः पूषा रक्षत्वर्वतः। पूषा वाजं सनोतु
नः। शुक्रं ते अन्यद्यजतं ते अन्यत् [44]

विषुरूपे अहनी द्यौरिवासि। विश्वा हि माया
 अवसि स्वधावो भद्रा ते पूषन्निह रातिरस्तु। तेऽवर्धन्त
 स्वतवसो महित्वना नाकं तस्थुरु रुरु चक्रिरे सदः।
 विष्णुर्यद्वावद्वृषणम्मदच्युतं वयो न सीदन्नधि बर्हिषि प्रिये।
 प्र चित्रमर्कं गृणते तुराय मारुताय स्वतवसे भरध्वम्। ये
 सहांसि सहसा सहन्ते [45]

रेजते अग्ने पृथिवी मुखेभ्यः। विश्वे देवा विश्वे देवाः।
 द्यावा नः पृथिवी इमं सिध्रमद्य दिविस्पृशम्। यज्ञं देवेषु
 यच्छताम्। प्र पूर्वजे पितरा नव्यसीभिर्गीर्भिः कृणुध्वं सदाने
 ऋतस्य। आ नो द्यावापृथिवी दैव्येन जनेन यातम्महि
 वां वरूथम्। अग्निं स्तोमेन बोधय समिधानो अमर्त्यम्।
 हव्या देवेषु नो दधत्। स हव्यवाडमर्त्य उशिग्दूतश्चनोहितः।
 अग्निर्धिया समृण्वति। शं नो भवन्तु वाजेवाजे॥ [46]

विष्णोः क्रमोऽसि दिवस्पयन्नपतेऽपेत समित्य्यां जाता मा नो हिंसीद्ध्वाऽस्यादित्यङ्गभूमिन्द्राग्नी रोचुनैकादश॥11॥

विष्णोरस्मिन् हव्येति त्वाऽहं धीतिभिर्होत्रां अष्टाचत्वारिंशत्॥48॥ विष्णोः क्रमोऽसि स त्वन्नो अग्ने॥ हरिः ओम्॥

श्रीकृष्णार्पणमस्तु॥

॥ हरिः ओम्॥ तैत्तिरीयसंहिता चतुर्थकाण्डे द्वितीयः प्रश्नः॥

॥द्वितीयः प्रश्नः॥

॥तैत्तिरीयसंहितायां चतुर्थकाण्डे द्वितीयः प्रश्नः॥

दिवमनु वि क्रमस्व निर्भक्तः स यद्विष्मो विष्णोर्धनेनाग्नेऽधममस्याः शुचिषथोऽंशं च॥१॥

विष्णोः क्रमोऽस्यभिमातिहा गायत्रं छन्द आ रोह
पृथिवीमनु वि क्रमस्व निर्भक्तः स यं द्विष्मो विष्णोः
क्रमोऽस्यभिः शस्तिहा त्रैष्टुभं छन्द आ रोहान्तरिक्षमनु वि
क्रमस्व निर्भक्तः स यं द्विष्मो विष्णोः क्रमोऽस्यरातीयतो
हन्ता जागतं छन्द आ रोह दिवमनु वि क्रमस्व निर्भक्तः
स यं द्विष्मो विष्णोः [1]

क्रमोऽसि शत्रूयतो हन्तानुष्टुभं छन्द आ रोह दिशोऽनु
वि क्रमस्व निर्भक्तः स यं द्विष्मः। अक्रन्ददग्निः स्तनयन्निव
द्यौः क्षामा रेरिहद्वीरुधः समञ्जन्। सद्यो जज्ञानो वि हीमिद्धो
अख्यदा रोदसी भानुना भात्यन्तः। अग्नेऽभ्यावर्तिन्नभि न आ
वर्तस्वायुषा वर्चसा सन्या मेधया प्रजया धनेन। अग्ने [2]

अङ्गिरः शतं ते सन्त्वावृतः सहस्रं त उपावृतः।
तासाम्पोषस्य पोषेण पुनर्नो नष्टमा कृधि पुनर्नो रयिमा

कृधि। पुनरूर्जा नि वर्तस्व पुनरग्न इषायुषा। पुनर्नः
 पाहि विश्वतः। सह रय्या नि वर्तस्वाग्ने पिन्वस्व धारया।
 विश्वप्त्रिया विश्वतस्परि। उदुत्तमं वरुण पाशमस्मदवाधमम्
 [3]

वि मध्यमः श्रथाय। अथा वयमादित्य व्रते तवानांगसो
 अदितये स्याम। आ त्वाहार्षमन्तरभूर्ध्रुवस्तिष्ठा- विचाचलिः।
 विशस्त्वा सर्वा वाञ्छन्त्वस्मिन्नाष्ट्रमधि श्रय। अग्ने
 बृहन्नुषसामूर्ध्वो अस्थान्निर्जग्मिवान्तमसो ज्योतिषागात्।
 अग्निर्भानुना रुशता स्वङ्ग आ जातो विश्वा सद्मान्यप्राः।
 सीद त्वम्मातुरस्याः [4]

उपस्थे विश्वान्यग्ने वयुनानि विद्वान्। मैनामर्चिषा
 मा तपसाभि शूशुचोऽन्तरस्याः शुक्रज्योतिर्वि भाहि।
 अन्तरग्ने रुचा त्वमुखायै सदेने स्वे। तस्यास्त्वः हरसा
 तपञ्जातवेदः शिवो भवा शिवो भूत्वा मह्यमग्नेऽथो सीद
 शिवस्त्वम्। शिवाः कृत्वा दिशः सर्वाः स्वं योनिमिहासदः।
 हंसः शुचिषद्वसुरन्तरिक्षसद्धोता वेदिषदतिथिर्दुरोणसत्।
 नृषद्वरसदतसद्धोमसदजा गोजा ऋतजा अद्रिजा
 ऋतम्बृहत्॥ [5]

तृतीयं त्वा गर्भ आ यंविष्टा यच्चत्वारि च॥2॥

दिवस्परि प्रथमं जज्ञे अग्निरस्मद्वितीयम्परि जातवेदाः।
तृतीयमप्सु नृमणा अजस्रमिन्धान एनं जरते स्वाधीः। विद्वा
ते अग्ने त्रेधा त्रयाणि विद्वा ते सद्य विभृतम्पुरुत्रा। विद्वा
ते नाम परमं गुहा यद्विद्वा तमुत्सं यत आजगन्थ। समुद्रे
त्वा नृमणा अप्स्वन्तर्नृचक्षा ईधे दिवो अग्न ऊधन्। तृतीयं
त्वा [6]

रजसि तस्थिवांसमृतस्य योनौ महिषा अहिन्वन्।
अक्रन्ददग्निः स्तनयन्निव द्यौः क्षामा रेरिहद्वीरुधः समञ्जन्।
सद्यो जज्ञानो वि हीमिद्धो अख्यदा रोदसी भानुना
भात्यन्तः। उशिक्पावको अरतिः सुमेधा मर्तेष्वग्निरमृतो
निधायि। इयर्ति धूममरुषम्भरिभ्रदुच्छुक्तेण शोचिषा
द्यामिनक्षत्। विश्वस्य केतुर्भुवनस्य गर्भ आ [7]

रोदसी अपृणाज्जायमानः। वीडुं चिदद्रिमभिनत्परायञ्जना
यदग्निमयजन्त पञ्च। श्रीणामुदारो धरुणो रयीणाम्मनीषाणाम्प्राप
सोमगोपाः। वसोः सूनुः सहसो अप्सु राजा वि भात्यग्रं
उषसामिधानः। यस्तै अद्य कृणवद्भद्रशोचेऽपूपं देव

घृतवन्तमग्ने। प्र तं नय प्रतरां वस्यो अच्छाभि द्युम्नं देवभक्तं
यविष्ठ। आ [8]

तम्भज सौश्रवसेष्वग्न उक्थउक्थ आ भज शस्यमाने।
प्रियः सूर्ये प्रियो अग्ना भवात्युज्जातेन भिनददुञ्जनित्वैः। त्वामग्ने
यजमाना अनु द्यून् विश्वा वसूनि दधिरे वार्याणि। त्वया सह
द्रविणमिच्छमाना व्रजं गोमन्तमुशिजो वि वव्रुः। दृशानो
रुक्म उर्व्या व्यद्यौर्दुर्मर्षमायुः श्रिये रुचानः। अग्निरमृतो
अभवद्वयोभिर्यदेनं द्यौरजनयत्सुरेताः॥ [9]

आ तवोर्जाऽनु षोडश च॥3॥

अन्नपतेऽन्नस्य नो देह्यनमीवस्य शुष्मिणः। प्रप्रदातारं
तारिष ऊर्जं नो धेहि द्विपदे चतुष्पदे। उदु त्वा विश्वे देवा
अग्ने भरन्तु चित्तिभिः। स नो भव शिवतमः सुप्रतीको
विभावसुः। प्रेदग्ने ज्योतिष्मान् याहि शिवेभिर्चिभिस्त्वम्।
बृहद्विभानुभिर्भासन्मा हिंसीस्तनुवा प्रजाः। समिधाग्निं
दुवस्यत घृतैर्बोधयतातिथिम्। आ [10]

अस्मिन् हव्या जुहोतन। प्रप्रायमग्निर्भरतस्य शृण्वे वि

यत्सूर्यो न रोचते बृहद्भाः। अ॒भि यः पू॒रुम् पृ॒तना॒सु त॒स्थौ
 दी॒दाय॒ दैव्यो॒ अति॑थिः शि॒वो नः॑। आपो॑ दे॒वीः प्र॒ति गृ॒हीत॒
 भस्मै॑तत्स्यो॒ने कृ॑णुध्व॒ः सुर॒भावु॑ लो॒के। तस्मै॑ नमन्तां जन॑यः
 सु॒पत्नी॑र्मा॒तिव॑ पु॒त्रम्बि॑भृ॒ता स्वे॑नम्। अ॒प्स्व॒ग्ने स॒धि॒ष्टव॑ [11]

सौष॑धी॒रनु॑ रुध्यसे। गर्भे॑ सञ्जा॑यसे पुनः॑। गर्भो॑
 अ॒स्योष॑धीनां गर्भो॑ वन॒स्पती॑नाम्। गर्भो॑ वि॒श्वस्य॑ भू॒तस्या॒ग्ने
 गर्भो॑ अ॒पाम॑सि। प्र॒सद्य॒ भस्म॑ना॒ योनि॑म॒पश्च॑ पृथि॒वीम॑ग्ने।
 स॒ः सृ॒ज्य मा॒तृभि॒स्त्वं ज्योति॑ष्मान्पुन॒रास॑दः। पुन॑रा॒सद्य॒
 स॒दन॑म॒पश्च॑ पृथि॒वीम॑ग्ने। शेषे॑ मा॒तुर्य॑थोप॒स्थेऽन्तर॑स्या॒ः
 शि॒वत॑मः। पुन॑रू॒र्जा [12]

नि वर्त॑स्व पुन॑र॒ग्र इ॒षायु॑षा। पुन॑र्नः पाहि
 वि॒श्वतः॑। स॒ह र॒य्या नि वर्त॑स्वा॒ग्ने पि॒न्वस्व॒ धार॑या।
 वि॒श्वप्त्रि॑या वि॒श्वत॑स्परि॑। पुन॑स्त्वादि॒त्या रु॒द्रा वस॑वः
 समि॑न्धता॒म्पुन॑र्ब्र॒ह्माणो॑ वसुनीथ य॒ज्ञैः। घृ॒तेन॒ त्वं त॒नुवो॑
 वर्ध॑यस्व स॒त्याः स॑न्तु यज॑मानस्य॒ कामाः॑। बो॒धा नो अ॒स्य
 वच॑सो यवि॒ष्ट म॑हि॒ष्टस्य॒ प्रभृ॑तस्य स्वधावः। पी॒यति॑ त्वो
 अनु॑ त्वो गृणाति व॒न्दारु॑स्ते त॒नुव॑ वन्दे अ॒ग्ने। स बो॑धि

सूरिर्मघवा॑ वसु॒दावा॑ वसु॒पतिः॑। यु॒यो॒ध्य॑स्मद्वेषा॑सि॥ [13]

अ॒स्त्वोष॑धीषु जा॒नन्न॑ष्टाच॑त्वारि ५ श॒च॥ 4॥

अपे॑त॒ वीत॒ वि च॑ सर्प॒तातो॒ येऽत्र॒ स्थ पु॑रा॒णा ये
च नू॑त॒नाः। अदा॑दि॒दं य॒मोऽव॑सान॒म्पृथि॑व्या अ॒क्रन्नि॒मम्
पि॒तरो॑ लो॒कम॑स्मै। अ॒ग्नेर्भ॑स्मा॒स्य॒ग्नेः पु॑री॒षम॑सि सं॒ज्ञान॑म॒सि
का॒म॒ध॒रण॑म्भयि॑ ते का॒म॒ध॒रण॑म्भूयात्। सं या वः॑ प्रि॒यास्त॒नुवः॑
सम्प्रि॒या हृ॑दया॒नि वः। आ॒त्मा वो॑ अस्तु [14]

सम्प्रि॑यः सम्प्रि॑यास्त॒नुवो॒ मम॑। अ॒यः सो अ॒ग्निर्य॑स्मिन्सोम॑र्वा
सु॒तं द॒धे ज॒ठरे॑ वाव॒शानः॑। स॒ह॒स्रि॒यं वा॒ज॒म॒त्यं न स॑ति॒ः
स॒स॒वान्त्स॒न्त॒स्तू॒यसे॑ जा॒तवे॑दः। अ॒ग्ने दि॒वो अ॑र्ण॒मच्छा॑
जिगा॒स्यच्छा॑ दे॒वाः ऊ॑चिषे॒ धिष्णि॑या॒ ये। याः प॒रस्ता॑द्रोच॒ने
सूर्य॑स्य॒ याश्चा॒वस्ता॑दु॒पति॑ष्ठन्त॒ आपः॑। अ॒ग्ने य॑त्ते दि॒वि वर्चः॑
पृथि॑व्यां यदोष॑धीषु [15]

अ॒प्सु वा॑ यज॒त्र। येना॒न्तरि॑क्षमु॒र्वात॑तन्थ॒ त्वेषः॑ स
भा॒नुरे॑र्ण॒वो नृ॑चक्षाः॑। पु॒री॒ष्या॑सो अ॒ग्नयः॑ प्राव॒णेभिः॑
स॒जोष॑सः। जुष॒न्ताः ह॒व्यमाहु॑तमन॒मीवा॑ इषो॑ म॒हीः।
इडा॑म॒ग्ने पुरु॑द॒सः॒ स॒नि गोः॑ श॒श्वत्त॑म॒ हव॑मानाय साधा॒

स्यान्नः सुनुस्तनयो विजावाग्ने सा ते सुमतिर्भूत्वस्मे। अयं
ते योनिर्ऋत्वियो यतो जातो अरोचथाः। तं जानन् [16]

अग्र आ रोहाथा नो वर्धया रयिम्। चिदसि तया
देवतयाङ्गिरस्वद्ध्रुवा सीद परिचिदसि तया देवतयाऽ
ङ्गिरस्वद्ध्रुवा सीद लोकम्पृण छिद्रम्पृणार्थो सीद शिवा
त्वम्। इन्द्राग्नी त्वा बृहस्पतिरस्मिन् योनावसीषदन्। ता
अस्य सूददोहसः सोमः३ श्रीणन्ति पृश्नयः। जन्मन्देवानां
विशस्त्रिष्वा रोचने दिवः॥ [17]

समोकसौ विश्वरूपे विदुर्निर्ऋतिरभि चष्ट इह मित्राय द्वाविंशतिश्च॥5॥

समित्२ सं कल्पेथा२ सम्प्रियौ रोचिष्णू सुमनस्यमानौ।
इषमूर्जमभि संवसानौ सं वाम्मनांसि सं व्रता समु
चित्तान्याकरम्। अग्ने पुरीष्याधिपा भवा त्वं नः। इषमूर्ज
यजमानाय धेहि। पुरीष्यस्त्वमग्ने रयिमान्पुष्टिमा२ असि।
शिवाः कृत्वा दिशः सर्वाः स्वां योनिमिहासदः। भवतं नः
समनसौ समोकसौ [18]

अरेपसौ। मा यज्ञः हिंसिष्टम्मा यज्ञपतिं जातवेदसौ
शिवौ भवतमद्य नः। मातेव पुत्रम्पृथिवी पुरीष्यमग्निः३

स्वे योना॑वभा॒रुखा। तां विश्वैर्दे॒वैर्ऋ॒तुभिः॑ संविदा॒नः
प्र॒जाप॑तिर्वि॒श्वक॑र्मा वि मु॒ञ्चतु। यद॒स्य पा॒रे रज॑सः शु॒क्रं
ज्योति॑रजा॒यत। तन्नः॑ पर्ष॒दति॒ द्विषोऽग्ने॑ वैश्वान॒र स्वाहा॑।
नमः॒ सु ते॑ निर्ऋ॒ते विश्व॑रूपे [19]

अ॒य॒स्मयं॑ वि चृ॒ता ब॒न्धमे॒तम्। य॒मेन॒ त्वं य॒म्यां
संविदा॒नोत्त॑मं नाक॒मधि॑ रोहये॒मम्। यत्ते॑ दे॒वी निर्ऋ॑तिरा
ब॒बन्ध॒ दाम॑ ग्री॒वास्व॑विच॒र्त्यम्। इ॒दं ते॒ तद्वि॑ ष्या॒म्यायु॑षो न
म॒ध्या॒दथा॑ जी॒वः पि॒तुम॑द्धि प्रमु॒क्तः। यस्या॑स्ते अ॒स्याः क्रू॒र
आ॒सञ्जु॑होम्ये॒षाम्ब॒न्धाना॑मव॒सर्ज॑नाय। भूमि॒रिति॑ त्वा॒ जना॑
वि॒दुर्निर्ऋ॑तिः [20]

इति॑ त्वा॒हम्परि॑ वेद विश्व॑तः। असु॑न्वन्त॒मय॑जमानमिच्छ
स्तेन॑स्ये॒त्यां तस्क॑र॒स्यान्वैषि॑। अ॒न्यम॒स्मदि॑च्छ सा तं इ॒त्या
नमो॑ देवि निर्ऋ॒ते तुभ्य॑मस्तु। दे॒वीम॒हं निर्ऋ॑तिं वन्द॑मानः
पि॒तेव॑ पु॒त्रं द॑सये॒ वचो॑भिः। विश्व॑स्य॒ या जा॑यमानस्य॒ वेद॑
शि॒रःशि॒रः प्र॑ति॒ सूरि॑ वि च॑ष्टे। नि॒वेश॑नः संग॒मनो॒ वसू॑नां
विश्वा॑ रू॒पाभि॑ च॑ष्टे [21]

शर्ची॑भिः। दे॒व इ॒व स॒वि॒ता स॒त्यध॑र्मेन्द्रो न त॑स्थौ स॒म॒रे

प॒थी॒नाम्। सं व॑र॒त्रा द॑धातन् निरा॑हा॒वान्कृ॑णोतन। सि॒ञ्चाम॑हा
 अव॑टमु॒द्रिणं॑ व॒यं वि॒श्वाहा॑दस्त॒मक्षि॑तम्। निष्कृ॑ताहावमव॑ट५
 सु॑वर॒त्र५ सु॑षेच॒नम्। उ॒द्रिण॑५ सि॒ञ्चे अ॑क्षितम्। सीरा॑ युञ्जन्ति
 क॒वयो॑ यु॒गा वि त॑न्वते पृथ॑क्। धीरा॑ दे॒वेषु॑ सु॒म्रया॑। यु॒नक्त॑
 सीरा॑ वि यु॒गा त॑नोत कृ॒ते यो॒नौ व॑पते॒ह [22]

बी॒जम्। गि॒रा च॑ श्रु॒ष्टिः स॒भरा॑ अ॒सन्नो॑ नेदी॒य इ॒त्सृ॒ण्यां
 प॒क्कमा॑यत्। लाङ्ग॑ल॒म्पवी॑रव५ सु॒शेव॑५ सु॒म॒तित्स॑रु।
 उ॒दित्कृ॑षति॒ गाम॑वि॒म्प्रफ॑र्व्यं च॒ पीव॑रीम्। प्र॒स्थाव॑द्रथ॒वाह॑नम्।
 शु॒नं नः॑ फा॒ला वि तु॑दन्तु भू॒मि५ शु॒नं की॒नाशा॑ अ॒भि
 य॑न्तु वा॒हान्। शु॒नम्प॒र्जन्यो॑ मधु॒ना प॑यो॒भिः शु॒नांसी॑रा
 शु॒नम॒स्मासु॑ ध॒त्तम्। का॒मं का॒मदु॑घे धु॒क्ष्व मि॒त्राय॑ वरु॒णाय॑
 च। इन्द्रा॑या॒ग्रये॑ पू॒ष्ण ओष॑धी॒भ्यः प्र॒जाभ्यः॑। घृ॒तेन॑ सी॒ता
 मधु॑ना॒ सम॑क्ता॒ विश्वै॑र्दे॒वैरनु॑मता म॒रुद्भिः॑। ऊ॒र्जस्व॑ती॒ पय॑सा॒
 पि॒न्वमा॑ना॒स्मान्त्सी॑ते॒ पय॑सा॒भ्याव॑वृ॒त्स्व॥ [23]

रपः पत्त्रिणीर्या अ५हंसो याः खनामि वोऽष्टादश च॥6॥

या जा॒ता ओष॑धयो दे॒वेभ्य॑स्त्रियु॒गम्पु॑रा। म॒न्दा॒मि
 ब॒भ्रूणा॑मह५ श॒तं धा॑मा॒नि स॒प्त च॑। श॒तं वो॑ अ॒म्ब धा॑मा॒नि

सहस्रमुत वो रुहः। अथा शतक्रत्वो यूयमिमम्मे अगदं
कृत। पुष्पावतीः प्रसूवतीः फलिनीरफला उत। अश्वा इव
सजित्वरीर्वीरुधः पारयिष्णवः। ओषधीरिति मातरस्तद्वो
देवीरुपं ब्रुवे। रपांसि विघ्नतीरित् रपः [24]

चातयमानाः। अश्वत्थे वो निषदनम्पर्णे वो वसतिः
कृता। गोभाज इत्किलासथ यत्सनवथ पूरुषम्। यदहं
वाजयन्निमा ओषधीरहस्त आदधे। आत्मा यक्ष्मस्य नश्यति
पुरा जीवगृभो यथा। यदोषधयः संगच्छन्ते राजानः
समिताविव। विप्रः स उच्यते भिषग्रक्षोहामीवचातनः।
निष्कृतिर्नाम वो माताथा यूयं स्थ संकृतीः। सराः
पतत्रिणीः [25]

स्थन यदामयति निष्कृत। अन्या वो अन्यामवत्वन्यान्यस्या
उपावता। ताः सर्वा ओषधयः संविदाना इदम्मे प्रावता
वचः। उच्छुष्मा ओषधीनां गावो गोष्ठादिवेरते। धनं
सनिष्यन्तीनामात्मानं तव पूरुष। अति विश्वाः परिष्ठाः स्तेन
इव व्रजमक्रमुः। ओषधयः प्राचुच्यवुर्यत् किं च तनुवां
रपः। याः [26]

त आतस्थुरात्मानं या आविविशुः परुःपरुः। तास्ते यक्ष्मं

वि बा॑धन्तामु॒ग्रो म॑ध्यम॒शीरि॑व। सा॒कं य॑क्ष्म॒ प्र प॑त श्ये॒नेन॑
 कि॒किदी॑विना॒। सा॒कं वा॑त॒स्य ध्रा॒ज्या सा॒कं न॑श्य नि॒हाक॑या।
 अ॒श्वव॑ती॒ः सोम॑व॒तीमूर्ज॑यन्ती- मुदो॑जसम्। आ वि॑त्सि॒ सर्वा
 ओष॑धीर॒स्मा अ॑रि॒ष्टता॑तये। याः फ॒लिनी॑र्या अ॒फ॒ला अ॑पुष्पा
 याश्च॑ पु॒ष्पिणीः॑। बृह॒स्पति॑प्रसूता॒स्ता नो॑ मुश्च॒न्त्व॑ह॒सः। याः
 [27]

ओष॑धयः सोम॑राज्ञीः प्रवि॑ष्टाः पृथि॒वीमनु॑। तासां
 त्वम॑स्युत्त॒मा प्र णो॑ जी॒वात॑वे सुव। अ॒वप॑तन्तीरवदन्दि॒व
 ओष॑धयः परि॑। यं जी॒वम॑श्चवा॒महे न स रि॑ष्याति॒ पूरु॑षः।
 याश्चे॒दमु॑पशृ॒ण्वन्ति॒ याश्च॑ दूर॒म्परा॑गताः। इ॒ह सं॑ग॒त्य ताः
 सर्वा॑ अस्मै॒ सं द॑त्त भेष॒जम्। मा वो॑ रिष॒त्खनि॑ता यस्मै
 चा॒हं खना॑मि वः। द्वि॒पच्च॑तु॒ष्पद॑स्माक॒ः सर्व॑म॒स्त्वना॑तुरम्।
 ओष॑धयः सं व॑दन्ते॒ सोमे॑न स॒ह राज्ञा॑। यस्मै॒ करो॑ति
 ब्राह्म॑णस्त॒ः राज॑न्यारयामसि॥ [28]

आ मन्द॑स्व सानु॑सिमेका॒न्नच॑त्वारि॒ः शच्च॑ ॥ 7 ॥

मा नो॑ हि॒ःसी॒ज्जनि॑ता यः पृथि॒व्या यो वा॒ दिव॑ः
 स॒त्यध॑र्मा ज॒जान॑। यश्चा॒पश्च॒न्द्रा बृ॑ह॒तीर्ज॑जान॒ कस्मै॑ दे॒वाय॑

ह॒विषा॑ वि॒धेम। अ॒भ्याव॑र्तस्व पृथि॒वि य॒ज्ञेन॑ पय॑सा स॒ह।
 व॒पां ते॑ अ॒ग्निरि॑षितोऽव॑ सर्पतु। अ॒ग्ने यत्ते॑ शु॒क्रं यच्च॑न्द्रं
 यत्पू॑तं यद्य॒ज्ञियम्। तद्दे॒वेभ्यो॑ भ॒राम॑सि। इष॒मूर्ज॑म॒हमि॑त आ
 [29]

द॒द ऋ॑तस्य॒ धाम्नो॑ अ॒मृत॑स्य॒ योनेः॑। आ नो॒ गोषु॑
 वि॒श॒त्वौष॑धीषु॒ जहा॑मि से॒दिम॑नि॒राम॑मी॒वाम्। अ॒ग्ने तव॑
 श्रवो॒ वयो॑ महि॑ भ्राजन्त्य॒र्चयो॑ वि॒भाव॑सो। बृह॑द्भानो॒ शव॑सा
 वाज॑मु॒क्थ्यं द॑धासि दा॒शुषे॑ कवे। इ॒र॒ज्यन्न॑ग्ने प्रथयस्व
 ज॒न्तुभि॑र॒स्मे रा॒यो अ॑मर्त्य। स द॑र्श॒तस्य॑ वपु॑षो वि
 रा॑जसि पृ॒णक्षि॑ सान॒सि५ र॒यिम्। ऊ॒र्जो न॑पा॒ज्जात॑वेदः
 सु॒श॒स्तिभि॑र्म॒न्दस्व [30]

धी॒तिभि॑र्हितः। त्वे इषः॒ सं द॑धु॒र्भूरि॑रेतसश्चि॒त्रोत॑यो
 वा॒मजा॑ताः। पा॒वक॑वर्चाः शु॒क्रव॑र्चा अ॒नू॒नव॑र्चा उ॒दिय॑र॒षि
 भा॒नुना॑। पु॒त्रः पि॒तरा॑ वि॒चर॑न्नुपा॒वस्यु॑भे पृ॒णक्षि॑ रोद॑सी।
 ऋ॒तावा॑न॒म्महि॑षं वि॒श्वच॑र्षणिम॒ग्नि५ सु॒म्नाय॑ दधिरे पु॒रो
 जनाः॑। श्रु॒त्कर्ण॑५ स॒प्रथ॑स्तमन्त्वा गि॒रा दै॒व्य॒म्मानु॑षा
 यु॒गा। नि॒ष्क॒र्तार॑म॒ध्वर॑स्य॒ प्रचै॑तसं क्षय॑न्त॒५ राध॑से म॒हे।

रा॒तिम्भृ॒गू॒णामु॒शिजं॑ क॒विक्र॑तुम्पृ॒णक्षि॑ सान॒सिम् [31]

रयि॒म्। चि॒तः स्थ॑ परि॒चितं॑ ऊ॒र्ध्वचि॒तः श्रय॑ध्वं तया॑
दे॒वत॑याङ्गि॒रस्वद् ध्रु॒वाः सी॑दत। आ प्या॑यस्व॒ समै॑तु ते वि॒श्वतः॑
सोम॑ वृ॒ष्णिय॑म्। भवा॑ वाज॑स्य संग॒थे। सं ते॑ पया॑सि
समु॑ यन्तु॒ वाजाः॑ सं वृ॒ष्णिया॑न्यभिमा॒तिषा॑हः। आ॒प्याय॑मानो
अ॒मृता॑य सोम॒ दि॒वि श्रवा॑स्युत्त॒मानि॑ धिष्व॥ [32]

म॒हो॒ऽनु॒ यातु॑धाना॒नामेका॑दश च॥८॥

अ॒भ्य॑स्था॒द्विश्वाः॑ पृ॒त॒ना अ॒रा॑ती॒स्तद॒ग्नि॑रा॒ह तदु॑ सोम॑
आ॒ह। बृ॒हस्प॑तिः सवि॒ता तन्म॑ आ॒ह पु॒षा मा॑धात्सुकृ॒तस्य॑
लो॒के। यद॑क्र॒न्दः प्रथ॑मं जाय॑मान उ॒द्यन्त्स॑मु॒द्रादु॑त वा
पु॒री॑षात्। श्ये॒नस्य॑ प॒क्षा ह॑रि॒णस्य॑ बा॒हू उप॑स्तु॒तं जनि॑म् तत्तै॑
अ॒र्वन्। अ॒पा॒म्पृ॒ष्ठम॑सि॒ योनि॑र॒ग्नेः स॑मु॒द्रम॑भि॒तः पि॒न्व॑मानम्।
व॒र्ध॑मान॒म्महः॑ [33]

आ च॒ पुष्क॑रं दि॒वो मा॒त्र॒या व॒रि॒णा प्र॑थस्व। ब्र॒ह्म
ज॒ज्ञान॑मप्र॒थम॑म्पु॒रस्ता॑द्वि सी॒मतः॑ सु॒रुचो॑ वे॒न आ॑वः। स
बु॒ध्निया॑ उप॒मा अ॑स्य वि॒ष्टाः स॒तश्च॑ योनि॒मस॑तश्च॒ विवः॑।
हि॒र॒ण्य॒ग॒र्भः स॑म॒वर्त॑ता॒ग्रे भू॒तस्य॑ जा॒तः प॒तिरे॑क॒ आसी॑त्।

स दाधार पृथिवीं द्यामुतेमां कस्मै देवाय हविषां विधेम।
द्रप्सश्चस्कन्द पृथिवीमनु [34]

द्यामिमं च योनिमनु यश्च पूर्वः। तृतीयं योनिमनु संचरन्तं
द्रप्सं जुहोम्यनु सप्त होत्राः। नमो अस्तु सर्पेभ्यो ये के
च पृथिवीमनु। ये अन्तरिक्षे ये दिवि तेभ्यः सर्पेभ्यो नमः।
येऽदो रोचने दिवो ये वा सूर्यस्य रश्मिषु। येषामप्सु सदः
कृतं तेभ्यः सर्पेभ्यो नमः। या इषवो यातुधानानां ये वा
वनस्पती रनु। ये वावटेषु शेरते तेभ्यः सर्पेभ्यो नमः॥

[35]

प्रतिष्ठायै सहस्रवीर्या परमं विरादध्मस तीरे चत्वारि च॥9॥

ध्रुवासि धरुणास्तृता विश्वकर्मणा सुकृता। मा त्वां समुद्र
उद्वधीन्मा सुपणोऽव्यथमाना पृथिवीं दृह। प्रजापतिस्त्वा
सादयतु पृथिव्याः पृष्ठे व्यचस्वतीम्प्रथस्वतीम्प्रथोऽसि
पृथिव्यसि भूरसि भूमिरस्यदितिरसि विश्वधाया विश्वस्य
भुवनस्य धर्त्री पृथिवीं यच्छ पृथिवीं दृह पृथिवीम्मा
हिंसीर्विश्वस्मै प्राणायानाय व्यानायोदानाय प्रतिष्ठायै

[36]

चरित्रायाग्निस्त्वाभि पातु म॒ह्या स्व॒स्त्या छु॒र्दिषा॒ शंत॑मे॒न॒
 तया॑ दे॒वत॑याङ्गि॒रस्व॑द्धु॒वा सी॑द। काण्डा॑त्काण्डात् प्र॒रोह॑न्ती
 परु॑षःपरु॑षः परि॑। ए॒वा नो॑ दूर्वे॒ प्र त॑नु॒ सह॑स्रेण॒ शते॑न॒
 च। या॑ श॒तेन॑ प्र॒तनो॑षि॒ सह॑स्रेण॒ वि॒रोह॑सि। तस्या॑स्ते
 दे॒वीष्ट॑के वि॒धेम॑ ह॒विषा॑ व॒यम्। अ॒षाढा॑सि॒ सह॑माना॒
 सह॑स्वारा॑तीः सह॑स्वारा॒तीय॑तः सह॑स्व॒ पृ॒त॒नाः सह॑स्व
 पृ॒त॒न्य॒तः। सह॑स्र॒वीर्या॑ [37]

अ॒सि सा मा॑ जि॒न्वा। मधु॑ वा॒ता ऋ॒ताय॑ते मधु॑
 क्षर॑न्ति॒ सिन्ध॑वः। मा॒ध्वी॒र्नः स॒न्त्वोष॑धीः। मधु॑ न॒क्तंमु॑तोष॒सि
 मधु॑म॒त्पार्थि॑व॒ रजः॑। मधु॑ द्यौर॑स्तु नः पि॒ता। मधु॑मा॒न्नो
 वन॑स्पति॒र्मधु॑मा॒ अस्तु॑ सूर्यः॑। मा॒ध्वी॒र्गावो॑ भव॑न्तु नः।
 म॒ही द्यौः पृ॑थि॒वी च॑ न इ॒मं य॒ज्ञमि॑मिक्षताम्। पि॒पृ॒तां नो॑
 भरी॑मभिः। तद्वि॒ष्णोः पर॑मम् [38]

प॒द॑ रु॒ सदा॑ पश्य॑न्ति सूर्यः॑। दि॒वीव॑ चक्षु॒रात॑तम्। ध्रु॒वासि॑
 पृथि॒वि सह॑स्व पृ॒त॒न्य॒तः। स्यू॒ता दे॒वेभि॑र॒मृते॑नागाः। यास्ते॑
 अ॒ग्ने सूर्ये॑ रुच॑ उ॒द्यतो॑ दि॒वमा॑त॒न्वन्ति॑ र॒श्मिभिः॑। ताभिः॑
 सर्वा॑भी रु॒चे जना॑य नस्कृ॒धि। या वो॑ दे॒वाः सूर्ये॑ रुचो॒

गोष्वश्वेषु या रुचः। इन्द्राग्नी ताभिः सर्वाभी रुचं नो धत्त
बृहस्पते। विराट् [39]

ज्योतिरधारयत्सम्राड्ज्योतिरधारयत्स्वराड्ज्योतिरधारयत्।
अग्ने युक्ष्वा हि ये तवाश्वासो देव साधवः। अरं वहन्त्याशवः।
युक्ष्वा हि देवहूतमा२ अश्वा२ अग्ने रथीरिव। नि होता
पूर्व्यः सदः। द्रप्सश्चस्कन्द पृथिवीमनु द्यामिमं च योनिमनु
यश्च पूर्वः। तृतीयं योनिमनु संचरन्तं द्रप्सं जुहोम्यनु सप्त
[40]

होत्राः। अभूदिदं विश्वस्य भुवनस्य वाजिनमग्नेर्वैश्वानरस्य
च। अग्निर्ज्योतिषा ज्योतिष्मानुक्रमो वर्चसा वर्चस्वान्। ऋचे
त्वा रुचे त्वा समित्स्रवन्ति सरितो न धेनाः। अन्तरहृदा
मनसा पूयमानाः। घृतस्य धारां अभि चाकशीमि। हिरण्ययो
वेतसो मध्य आसाम्। तस्मिन्त्सुपर्णो मधुकृत्कुलायी
भजन्नास्ते मधु देवताभ्यः। तस्यासते हरयः सप्त तीरे स्वधां
दुहाना अमृतस्य धाराम्॥ [41]

अग्ने मा हिंसीरग्ने मोष्टृमारुण्यमनु शरभं नवं च॥10॥ आदित्यमिमन्दिपादंमयुर्बातुस्याश्वमिममेकशफङ्गोरमजंस्त्रयवर्णं॥त्रिमविमि

आदित्यं गर्भम्पयसा समञ्जन्त्सहस्रस्य प्रतिमां
 विश्वरूपम्। परि वृद्धिं हरसा माभि मृक्षः शतायुषं कृणुहि
 चीयमानः। इमम्मा हिंसीद्विपादम्पशूनां सहस्राक्ष
 मेध आ चीयमानः। मयुमारण्यमनु ते दिशामि तेन
 चिन्वानस्तनुवो नि षीद। वातस्य धाजिं वरुणस्य नाभिमश्वं
 जज्ञानं सरिरस्य मध्ये। शिशुं नदीनां हरिमद्रिबुद्धमग्रे
 मा हिंसीः [42]

परमे व्योमन्। इमम्मा हिंसीरेकशफम्पशूनां केनिक्रदं
 वाजिनं वाजिनेषु। गौरमारण्यमनु ते दिशामि तेन
 चिन्वानस्तनुवो नि षीद। अजस्रमिन्दुमरुषम्भुरण्युमग्निमीडे
 पूर्वचित्तौ नमोभिः। स पर्वभिर्ऋतुशः कल्पमानो गाम्मा
 हिंसीरदिति विराजम्। इमं समुद्रं शतधारमुत्सं
 व्यच्यमानम्भुवनस्य मध्ये। घृतं दुहानामदिति जनायाग्रे मा
 [43]

हिंसीः परमे व्योमन्। गवयमारण्यमनु ते दिशामि तेन
 चिन्वानस्तनुवो नि षीद। वरूत्रिं त्वष्टुर्वरुणस्य नाभिमविं
 जज्ञानां रजसः परस्मात्। महीं साहस्रीमसुरस्य

मा॒याम॒ग्रे मा हिं॑सीः पर॒मे व्यो॑मन्। इ॒मामूर्णा॑युं वरु॑णस्य
मा॒यां त्वच॑म्पशूनां द्वि॒पदां चतु॑ष्पदाम्। त्वष्टुः प्र॒जानाम्प्रथ॑मं
ज॒नित्र॑मग्रे मा हिं॑सीः पर॒मे व्यो॑मन्। उष्ट्र॑मार॒ण्यमनु॑ [44]

ते दि॒शामि तेन॑ चिन्वा॒नस्त॒नुवो॑ नि षी॑द। यो
अ॒ग्निर॒ग्रेस्तप॑सोऽधि॑ जा॒तः शोचा॑त्पृथि॒व्या उ॒त वा
दि॒वस्परि॑। येन॑ प्र॒जा वि॒श्वकर्मा॑ व्या॒नद्वम॑ग्रे हेडुः परि॑ ते
वृण॑क्तु। अ॒जा ह्य॒ग्रेरज॑निष्ट॒ गर्भा॑त्सा वा अ॒पश्य॑ज्जनि॒तार॑मग्रे॑।
तया॑ रोह॑माय॒त्रुप॑ मे॒ध्यांस॑स्तया॑ दे॒वा दे॒वता॑मग्रं॑ आयन्।
श॒रभ॑मार॒ण्यमनु॑ ते दि॒शामि तेन॑ चिन्वा॒नस्त॒नुवो॑ नि षी॑द॥
[45]

हि वृता मु एकादश च॥11॥

इन्द्रा॑ग्नी रोच॒ना दि॒वः परि॑ वाजेषु भूष॑थः। तद्वा॑ चेति॒
प्र वी॒र्य॑म्। श्रथ॑द्वृत्रमु॒त संनो॑ति॒ वाज॑मिन्द्रा॒ यो अ॒ग्नी सह॑री
सप॒र्यात्। इ॒रज्य॑न्ता॒ वस॑व्यस्य॒ भूरेः सह॑स्तमा॒ सह॑सा
वाज॑यन्ता॑। प्र च॑र्ष॒णिभ्यः॑ पृ॒तना॑ हवेषु प्र पृथि॒व्या रि॑रिचाथे
दि॒वश्च॑। प्र सि॒न्धुभ्यः॑ प्र गि॒रिभ्यो॑ महि॒त्वा प्रेन्द्रा॑ग्नी॒ विश्वा॑
भुव॑नात्य॒न्या। मरु॑तो॒ यस्य॑ हि [46]

क्षये पा॒था दि॒वो वि॒मह॑सः। स सु॒गो॒पात॑मो॒ जनः॑। य॒ज्ञैर्वा
 य॒ज्ञवा॑हसो॒ विप्र॑स्य वा मती॒नाम्। मरु॑तः शृणु॒ता ह॒वम्।
 श्रि॒यसे॒ कम्भा॒नुभिः॒ सम्मि॑मिक्षिरे॒ ते र॒श्मिभि॑स्त ऋ॒क्भिः
 सु॒खाद॑यः। ते वाशी॑मन्त इ॒ष्मिणो॒ अभी॑रवो वि॒द्रे प्रि॒यस्य॒
 मारु॑तस्य॒ धाम्नः॑। अ॒व ते॒ हेड॒ उदु॑त्त॒मम्। क॒या न॑श्चि॒त्र आ
 भु॑वदूती स॒दावृ॑धः स॒खा। क॒या श॑चि॒ष्ठया॒ वृता॑। [47]

को अ॒द्य यु॒ङ्क्ते॒ धुरि॑ गा ऋ॒तस्य॒ शिमी॑वतो भा॒मिनो॑
 दुर॑ह॒णा॒यून्। आ॒सन्नि॑षून् हृ॒त्स्वसो॑ म॒योभू॑न् य ए॒षाम्
 भृ॒त्यामृ॑णध॒त्स जी॑वात्। अ॒ग्ने न॒या दे॒वाना॑ꣳ शं नो॑ भवन्तु
 वाजे॑वाजे। अ॒प्स्व॒ग्ने स॒धिष्ट॑व॒ सौष॑धी॒रनु॑ रु॒ध्यसे॑। गर्भे॒
 सञ्जा॑यसे पुनः॑। वृषा॑ सोम द्यु॒माꣳ अ॑सि॒ वृषा॑ दे॒व वृष॑व्रतः।
 वृषा॑ धर्मा॒णि द॒धिषे॑। इ॒मम्मे॑ वरुण तत्त्वा॑ यामि॒ त्वं नो॑
 अ॒ग्ने स॒ त्वं नो॑ अ॒ग्ने॥ [48]

अ॒पां त्वे॒मन्न॑यं पु॒रो भुवः॑ प्राचीं ध्रु॒वख्य॑ति॒स्यवि॒न्द्रा॒ग्नी मा॒ छन्द॑ आ॒शु॒स्मि॒वृ॒द्धेर्भा॑गाँऽस्येक॑ये॒यमे॒व सा॒ याग्रं॑
 जा॒तान्नि॑वृ॒त्राणि॑ त्रयो॑दश॥13॥ अ॒पां त्वे॒न्द्रा॒ग्नी इ॒यमे॒व दे॒वता॑ता॒ षट्त्रि॑ंशत्॥36॥ अ॒पां त्वे॒मन् ह॒विषा॑ वर्ध॑नेन॥ हरिः
 ओम्॥ श्रीकृष्णार्पणमस्तु॥

॥तृतीयः प्रश्नः॥

॥तैत्तिरीयसंहितायां चतुर्थकाण्डे तृतीयः प्रश्नः॥

योनौ पञ्चदश च॥1॥

अपां त्वेमन्थासादयाम्यपां त्वोद्गन्थासादयाम्यपां त्वा
भस्मन्थासादयाम्यपां त्वा ज्योतिषि सादयाम्यपां त्वायने
सादयाम्यर्णवे सदेने सीद समुद्रे सदेने सीद सलिले
सदेने सीदापां रब्धये सीदापां सधिषि सीदापां त्वा
सदेने सादयाम्यपां त्वा सधस्थे सादयाम्यपां त्वा
पुरीषे सादयाम्यपां त्वा योनौ सादयाम्यपां त्वा पार्थसि
सादयामि गायत्री छन्दस्त्रिष्टुप्छन्दो जगती छन्दोऽनुष्टुप्छन्दः
पङ्क्तिश्छन्दः॥ [1]

त्वया मनो जमदग्निर्ऋषिः प्रजापतिर्गृहीतया त्रिंशच्च॥2॥

अयम्पुरो भुवस्तस्य प्राणो भौवायनो वसन्तः प्राणायनो
गायत्री वासन्ती गायत्रियै गायत्रं गायत्रादुपांशु-
रुपांशोस्त्रिवृत्रिवृतो रथन्तरं रथन्तराद्वसिष्ठ ऋषिः
प्रजापतिर्गृहीतया त्वया प्राणं गृह्णामि प्रजाभ्योऽयं
दक्षिणा विश्वकर्मा तस्य मनो वैश्वकर्मणं ग्रीष्मो

मान॑सस्त्रि॒ष्टुग्रेष्मी॑ त्रि॒ष्टुभं॑ ऐ॒डमै॑डाद॒न्तर्या॑मो॑ऽन्तर्या॑मात्
 प॑ञ्चद॒शः प॑ञ्चद॒शाद्बृ॒हद्बृ॒हतो॑ भ॒रद्वा॑ज ऋषिः प्र॒जाप॑तिगृहीतया
 त्वया॑ मनः [2]

गृ॒ह्णामि॑ प्र॒जाभ्यो॑ऽयम्पश्चाद्वि॒श्वव्य॑चा॒स्तस्य॑ च॒ख्षुर्वै॑श्वव्यच॒सं
 व॒र्षाणि॑ चा॒ख्षुषा॑णि जग॑ती वा॒र्षी जग॑त्या ऋ॒ख्षम॑मृ॒ख्षमा॑च्छु
 शु॒क्रात्स॑प्तद॒शः स॑प्तद॒शाद्वैरू॒पं वैरू॒पाद्वि॒श्वामि॑त्र ऋषिः
 प्र॒जाप॑तिगृहीतया॑ त्वया॑ च॒ख्षुर्गृ॒ह्णामि॑ प्र॒जाभ्य॑ इ॒दमु॑त्तरा॒थ्सु॑व॒स्त
 श्रो॒त्रं सौ॒व॒ शर॑च्छौ॒त्र्यनु॑ष्टु॒ष्टोर्द्व॑नु॒ष्टुभः॑ स्वा॒रं
 स्वा॒रान्म॒न्थी म॒न्थिन॑ एकवि॒ंश ए॒कवि॒ंशाद्वै॒राजं॑
 वै॒राजा॑ञ्ज॒मद॑ग्निर्ऋषिः प्र॒जाप॑तिगृहीतया [3]

त्वया॑ श्रो॒त्रं गृ॒ह्णामि॑ प्र॒जाभ्य॑ इ॒यमु॑परि॒ म॒तिस्त॑स्यै
 वाङ्मा॑ती है॒मन्तो॑ वा॒च्याय॑नः प॒ङ्क्तिर्है॑मन्ती प॒ङ्क्तौ
 नि॒धन॑वन्नि॒धन॑वत आ॒ग्रय॑ण आ॒ग्रय॑णात्रि॒णव॑त्रयस्त्रि॒ंशौ
 त्रि॒णव॑त्रयस्त्रि॒ंशाभ्या॑ं शा॒क्रर॑व॒ते शा॒क्रर॑व॒ताभ्या॑ं
 वि॒श्वक॑र्मर्षिः प्र॒जाप॑तिगृहीतया॑ त्वया॑ वाचं॑ गृ॒ह्णामि॑
 प्र॒जाभ्यः॑॥ [4]

प्राचीं दिशां वसन्त ऋतूनामग्निर्देवता ब्रह्म द्रविणं
 त्रिवृथस्तोमः स उ पञ्चदशवर्तनिरुयविर्वयः कृतमयांनां
 पुरोवातो वातः सानंग ऋषिर्दखिणा दिशां ग्रीष्म
 ऋतूनामिन्द्रो देवता ख्यत्रं द्रविणम्पञ्चदशः स्तोमः स उ
 सप्तदशवर्तनिरित्यवाङ्मयस्त्रेतायांनां दखिणाद्वातो वातः
 सनातन ऋषिः प्रतीची दिशां वर्षा ऋतूनां विश्वे देवा
 देवता विट् [5]

द्रविणं सप्तदशः स्तोमः स उवेकविंशवर्तनिरिवृथसो
 वयो द्वापरोऽयांनाम्पञ्चाद्वातो वातोऽहभून् ऋषिरुदीची
 दिशां शरदृतूनामित्रावरुणौ देवता पुष्टं द्रविणमेकविंशः
 स्तोमः स उ त्रिणववर्तनिरुयवाङ्मय आस्कन्दो-
 ऽ यांनामुत्तराद्वातो वातः प्रत्न ऋषिरूर्ध्वा दिशां
 हेमन्तशिशिरावृतूनाम्बृहस्पतिर्देवता वर्चो द्रविणं त्रिणवः
 स्तोमः स उ त्रयस्त्रिंशवर्तनिः पष्ठवाद्योऽभिभूरयांनां
 विष्वग्वातो वातः सुपर्ण ऋषिः पितरः पितामहाः परेऽवरे ते
 नः पान्तु ते नोऽवन्त्वस्मिन्ब्रह्मन्स्मिन्ख्यत्रेऽस्यामाशिष्यस्याम्पुनः
 देवहृत्याम्॥ [6]

ध्रुवखि॑ति॒ध्रुवयो॑नि॒ध्रुवासि॑ ध्रुवं योनि॒मा सी॑द सा॒ध्या।
 उ॒ख्यस्य॑ के॒तुम्प्र॑थ॒मम्पु॒रस्ता॑द॒श्विना॑ध्व॒र्यू सा॑दयतामि॒ह
 त्वा॑। स्वे द॒ख्ये द॒ख्यपि॑ते॒ह सी॑द दे॒वत्रा॑ पृ॒थि॒वी बृ॑ह॒ती
 ररा॑णा। स्वा॒स॒स्था त॒नुवा॑ सं वि॒शस्व॑ पि॒तेवै॑धि सू॒नव॑ आ
 सु॒शेवा॒श्विना॑ध्व॒र्यू सा॑दयतामि॒ह त्वा॑। कु॒ला॒यिनी॑ वसु॒मती॑
 वयो॒धा र॒यिं नो॑ वर्ध॒ बहु॑ल॒ सु॒वीर॑म्। [7]

अपा॑मतिं दु॒र्म॒ति॒म्बाध॑माना रा॒यस्पोषे॑ य॒ज्ञप॑तिमा॒भज॑न्ती
 सु॒व॒र्धेहि॒ यज॑मानाय॒ पोष॑म॒श्विना॑ध्व॒र्यू सा॑दयतामि॒ह त्वा॑।
 अ॒ग्नेः पु॒री॑षमसि दे॒व्यानी॑ तां त्वा॒ विश्वे॑ अ॒भि गृ॑णन्तु
 दे॒वाः। स्तोम॑पृ॒ष्ठा घृ॒तव॑न्ती॒ह सी॑द प्र॒जाव॑द॒स्मे द्र॒विणा॑
 य॒जस्वा॒श्विना॑ध्व॒र्यू सा॑दयतामि॒ह त्वा॑। दि॒वो मूर्धा॑सि
 पृ॒थि॒व्या नाभि॑र्वि॒ष्टम्भ॑नी दि॒शाम॑धि॒पत्नी॑ भुव॑नानाम्। [8]

ऊ॒र्मि॒र्द्र॒प्सो अ॒पा॒म॒सि वि॒श्वक॑र्मा त॒ ऋषि॑र॒श्विना॑ध्व॒र्यू
 सा॑दयतामि॒ह त्वा॑। स॒जूर॑ऋ॒तुभिः॑ स॒जूर्वि॑धाभिः
 स॒जूर्व॑सुभिः स॒जू रु॒द्रैः स॒जूरा॑दि॒त्यैः स॒जूर्वि॑श्वैर्दे॒वैः
 स॒जूर्दे॒वैः स॒जूर्दे॒वैर्वयो॑ना॒धैर॒ग्रये॑ त्वा वै॒श्वान॒राया॒श्विना॑ध्व॒र्यू
 सा॑दयतामि॒ह त्वा॑। प्रा॒ण॒म्मे पा॒ह्यपा॒न॒म्मे पा॒हि व्या॒न॒म्मे पा॒हि

चख्षुर्म उ॒र्या वि भा॑हि श्रोत्र॑म्मे श्लोक॑या॒पस्मि॒न्वौष॑धीर्जि॒न्व
द्वि॒पात्पा॑हि चतु॑ष्पादव दि॒वो वृष्टि॑मेरय॥ [9]

पुरु॑षो वयु॑ष्पद्वि॒शति॑श्च॥5॥

अवि॑र्वय॑स्त्रिष्टु॒च्छन्दो॑ दित्य॒वाङ्मयो॑ वि॒राट्छन्दः॑ पञ्चा॑विर्वयो॑
गाय॒त्री छन्द॑स्त्रि॒वत्सो वय॑ उ॒ष्णिहा छन्द॑स्तुर्य॒वाङ्मयो॑ऽ-
नुष्टु॒च्छन्दः॑ पष्ट॒वाङ्मयो॑ बृ॒हती छन्द॑ उ॒र्या वयः॑ स॒तोबृ॑हती
छन्द॑ ऋष॒भो वयः॑ ककु॒च्छन्दो॑ धेनु॒र्वयो जग॑ती छन्दो॑ऽ-
न॒ड्वान् वयः॑ पु॒ङ्क्तिश्छन्दो॑ ब॒स्तो वयो॑ वि॒वलं छन्दो॑ वृ॒ष्णिर्वयो॑
वि॒शालं छन्दः॑ पुरु॑षो वय॑स्त॒न्द्रं छन्दो॑ व्या॒घ्रो वयो॑ऽ- नाधृष्टं
छन्दः॑ सि॒ंहो वय॑श्छु॒दिश्छन्दो॑ विष्ट॒म्भो वयो॑ऽधि॒पति॑श्छन्दः॑
ख्य॒त्रं वयो॑ मय॑दं छन्दो॑ वि॒श्वकर्मा॑ वयः॑ परमे॒ष्ठी छन्दो॑
मूर्धा॑ वयः॑ प्र॒जाप॑तिश्छन्दः॑॥ [10]

छु॒दिषां पि॒न्व षट्॥6॥

इन्द्रा॑ग्नी॒ अव्य॑थमा॒नामिष्ट॑कां दृ॒ह॒तं युव॑म्। पृ॒ष्ठेन॒
द्यावा॑पृ॒थिवी॒ अ॒न्तरि॑ख्यं च॒ वि बा॑धताम्॥ वि॒श्वकर्मा॑ त्वा
साद॑यत्व॒न्तरि॑ख्यस्य पृ॒ष्ठे व्यच॑स्वती॒मप्र॑थ॒स्वती॒म्भास्व॑ती॒
सूरि॑मती॒मा या द्या॑म्भास्या पृ॒थिवी॒मोर्व॑न्तरि॒ख्यम॑न्तरि॒ख्यं

यच्छान्तरिख्यं दृ९हान्तरिख्यम्मा हि९सीर्विश्वस्मै
 प्राणायोपानाय व्यानायोदानाय प्रतिष्ठायै चरित्राय
 वायुस्त्वाभि पातु मह्या स्वस्त्या छुर्दिषा [11]

शंतमेन तया देवतयाङ्गिरस्वद्धुवा सीद। राज्यसि
 प्राची दिग्विराडसि दखिणा दिक्सम्राडसि प्रतीची
 दिक्स्वराडस्युदीची दिगधिपत्यसि बृहती दिगायुर्मे पाहि
 प्राणम्मे पाह्यपानम्मे पाहि व्यानम्मे पाहि चख्युर्मे पाहि
 श्रोत्रम्मे पाहि मनो मे जिन्व वाचम्मे पिन्वात्मानम्मे पाहि
 ज्योतिर्मे यच्छ॥ [12]

देवताऽऽयुषे त्वा षट्॥ 7॥

मा छन्दः प्रमा छन्दः प्रतिमा छन्दोऽस्त्रीविश्छन्दः
 पङ्क्तिश्छन्द उष्णिहा छन्दो बृहती छन्दोऽनुष्टुप्छन्दो
 विराट्छन्दो गायत्री छन्दस्त्रिष्टुप्छन्दो जगती छन्दः पृथिवी
 छन्दोऽन्तरिख्यं छन्दो द्यौश्छन्दः समाश्छन्दो नख्यत्राणि
 छन्दो मनश्छन्दो वाक्छन्दः कृषिश्छन्दो हिरण्यं छन्दो
 गौश्छन्दोऽजा छन्दोऽश्वश्छन्दः। अग्निर्देवता [13]

वातो देवता सूर्यो देवता चन्द्रमा देवता वसवो देवता

रु॒द्रा दे॒वता॑दि॒त्या दे॒वता॑ वि॒श्वे दे॒वा दे॒वता॑ म॒रुतो॑ दे॒वता॑
 बृ॒ह॒स्पति॑र्दे॒वतेन्द्रो॑ दे॒वता॑ वरु॑णो दे॒वता॑ मूर्धा॑सि रा॒ङ्गुवा॑सि
 ध॒रुणा॑ य॒त्र्यसि॑ यमि॑त्री॒षे त्वो॒र्जे त्वा॑ कृ॒ष्यै त्वा॑ ख॒पेमा॑य
 त्वा॑ य॒त्री रा॒ङ्गुवा॑सि धर॑णी ध॒त्र्यसि॑ धरि॒त्र्यायु॑षे त्वा॑ वर्च॑से
 त्वौज॑से त्वा॑ बला॑य त्वा॑॥ [14]

आ॒शु॒स्म॒स॒त्रि॑शत्॥८॥

आ॒शु॒स्त्रि॒वृ॒द्धान्तः॑ प॑ञ्चद॒शो व्यो॑म सप्तद॒शः प्रतू॑र्तिर॒ष्टाद॑शस्तपो॑
 नवद॒शोऽभि॑व॒र्तः स॑वि॒श्वे ध॒रुण॑ एकवि॒श्वे वर्चो॑ द्वावि॒श्वेः
 स॒म्भर॑णस्त्रयोवि॒श्वे योनि॑श्चतुर्वि॒श्वे गर्भाः॑ पञ्चवि॒श्वेः
 ओज॑स्त्रिण॒वः ऋतु॑रेकत्रि॒श्वेः प्र॑ति॒ष्टा त्र॑यस्त्रि॒श्वेः ब्र॒ध्नस्य॑
 वि॒ष्टप॑ चतुस्त्रि॒श्वेः नाकः॑ षट्त्रि॒श्वेः वि॑व॒र्तोऽष्टा॑चत्वारि॒श्वेः
 ध॒र्त्रश्च॑तुष्टो॒मः॥ [15]

वसू॑नां भा॒गोऽसि॑ षट्त्वारि॒श्वश्च॑॥९॥

अ॒ग्नेर्भा॒गोऽसि॑ दी॒र्क्षाया॑ आधि॑पत्य॒म्ब्रह्म॑ स्पृ॒तं त्रि॒वृ॒थस्तो॑म॒
 इन्द्र॑स्य भा॒गोऽसि॑ विष्णो॒राधि॑पत्यं ख॒त्र्यं स्पृ॒तम्पञ्च॑द॒शः
 स्तोमो॑ नृच॒ख्यंसा॒म्भा॒गोऽसि॑ धा॒तुराधि॑पत्यं ज॒नित्र॑ स्पृ॒तं

सप्तदशः स्तोमो मित्रस्य भागोऽसि वरुणस्याधिपत्यं दिवो
 वृष्टिर्वाताः स्पृता एकविंशः स्तोमोऽदित्यै भागोऽसि पूष्ण
 आधिपत्यमोजः स्पृतं त्रिणवः स्तोमो वसूनाम्भागोऽसि
 [16]

रुद्राणामाधिपत्यं चतुष्पाथस्पृतं चतुर्विंशः स्तोमं
 आदित्यानाम्भागोऽसि मरुतामाधिपत्यं गर्भाः स्पृताः
 पञ्चविंशः स्तोमो देवस्य सवितुर्भागोऽसि बृहस्पतेराधिपत्यं
 समीचीर्दिशः स्पृताश्चतुष्टोमः स्तोमो यावानाम्भागोऽस्ययावानाम्
 स्पृताश्चतुश्चत्वारिंशः स्तोमं ऋभूणाम्भागोऽसि विश्वेषां
 देवानामाधिपत्यम्भूतं निशान्तं स्पृतं त्रयस्त्रिंशः स्तोमः॥
 [17]

सव्वँधसुरोऽधिपतिर्वि पञ्चत्रिंशच्च॥10॥

एकयास्तुवत प्रजा अंधीयन्त प्रजापतिरधिपतिरासीत्तिसृभिः
 ब्रह्मासृज्यत ब्रह्मणस्पतिरधिपतिरासीत् पञ्चभिरस्तुवत
 भूतान्यसृज्यन्त भूतानाम्पतिरधिपतिरासीत्सप्तभिरस्तुवत
 सप्तरष्योऽसृज्यन्त धाताधिपतिरा- सीन्नवभिरस्तुवत
 पितरोऽसृज्यन्तादितिरधिपत्यासीदेकादशभिरस्तुवतर्तवोऽसृज्यन्त

त्रयोदशभिरस्तुवत् मासा असृज्यन्त संवत्सरोऽधिपतिः
[18]

आसीत्पञ्चदशभिरस्तुवत् खषत्रमसृज्यतेन्द्रोऽधिपतिरासीत्स
पशवोऽसृज्यन्त बृहस्पतिरधिपतिरासी- न्नवदशभिरस्तुवत्
शूद्रार्यावसृज्येतामहोरात्रे अधिपती आस्तामेकंविंशत्यास्तुवत्
पशवोऽसृज्यन्त वरुणोऽधिपतिरासीन्नयोविंशत्यास्तुवत्
खषुद्राः पशवोऽसृज्यन्त पूषाधिपतिरासीत्पञ्चविंशत्यास्तुवत्
पशवोऽसृज्यन्त वायुरधिपतिरासीत्सप्तविंशत्यास्तुवत्
द्यावापृथिवी वि [19]

ऐतां वसवो रुद्रा आदित्या अनु व्यायन्तेषामाधिपत्यमासीन्न
वनस्पतयोऽसृज्यन्त सोमोऽ- धिपतिरासीदेकंत्रिंशतास्तुवत्
प्रजा असृज्यन्त यावानां चायावानां चाधिपत्यमासीन्नयस्त्रिंशत
भूतान्यशाम्यन्प्रजापतिः परमेष्ठ्यधिपतिरासीत्॥ [20]

ऊर्जमेकां प्रतिमुञ्चमाना भूयासुमेकं पव्येकान्नविंशतिश्च॥11॥

इयमेव सा या प्रथमा व्यौच्छदन्तरस्यां चरति प्रविष्टा।
वधूर्जजान नवगङ्गनित्री त्रय एनाम्महिमानः सचन्ते॥
छन्दस्वती उषसा पेपिशाने समानं योनिमनु संचरन्ती।

सूर्यपत्नी वि चरतः प्रजान्ती केतुं कृण्वाने अजरे
भूरिरेतसा॥ ऋतस्य पन्थामनु तिस्र आगुस्त्रयो घर्मासो
अनु ज्योतिषागुः। प्रजामेका ररखत्यूर्जमेका [21]

व्रतमेका ररखति देवयूनाम्॥ चतुष्टोमो अभवद्या
तुरीया यज्ञस्य पुरखावृषयो भवन्ती। गायत्रीं त्रिष्टुभं
जगतीमनुष्टुभम्बृहदकं युञ्जानाः सुवराभरन्निदम्॥
पञ्चभिर्धाता वि दधाविदं यत्तासाः स्वसृरजनयत्पञ्चपञ्च
तासामु यन्ति प्रयवेण पञ्च नाना रूपाणि क्रतवो
वसानाः॥ त्रिंशत्स्वसार उप यन्ति निष्कृतं समानं
केतुम्प्रतिमुञ्चमानाः। [22]

ऋतूस्तन्वते कवयः प्रजान्तीर्मध्येछन्दसः परि
यन्ति भास्वतीः। ज्योतिष्मती प्रति मुञ्चते नभो रात्रीं
देवी सूर्यस्य व्रतानि। वि पश्यन्ति पशवो जायमाना
नानारूपा मातुरस्या उपस्थै। एकाष्टका तपसा तप्यमाना
जजान गर्भम्महिमानमिन्द्रम्। तेन दस्यून्यसहन्त देवा
हन्तासुराणामभवच्छचीभिः। अनानुजामनुजाम्मामकर्त
सत्यं वदन्त्यन्विच्छ एतत्। भूयासम् [23]

अस्य सुमतौ यथा यूयमन्या वो अन्यामति मा प्र युक्त।
 अभून्मम सुमतौ विश्ववेदा आष्टं प्रतिष्ठामविदद्धि गाधम्।
 भूयासमस्य सुमतौ यथा यूयमन्या वो अन्यामति मा प्र
 युक्त। पञ्च व्युष्टीरनु पञ्च दोहा गाम्पञ्चनान्नीमृतवोऽनु पञ्च।
 पञ्च दिशः पञ्चदशेन कृताः समानमूर्ध्नीरभि लोकमेकम्॥
 [24]

ऋतस्य गर्भः प्रथमा व्युष्युपापामेका महिमानम्बिभर्ति।
 सूर्यस्यैका चरति निष्कृतेषु घर्मस्यैका सवितैका नि
 यच्छति। या प्रथमा व्यौच्छत्सा धेनुरभवद्यमे। सा नः
 पयस्वती ध्रुव्वोत्तरामुत्तराः समाम्। शुक्रर्षभा नभसा
 ज्योतिषागाद्विश्वरूपा शबलीरग्निकेतुः। समानमर्थः
 स्वपस्यमाना बिभ्रती जरामजर उष आगाः। ऋतूनाम्पत्नी
 प्रथमेयमागादह्ना नेत्री जनित्री प्रजानाम्। एका सती
 बहुधोषो व्युच्छस्यजीर्णा त्वं जरयसि सर्वमन्यत्॥ [25]

अस्यङ्कुपच्छन्दस्यसि १ शब्द ॥ 12 ॥

अग्रे जातान्प्र णुदा नः सपत्नान्प्रत्यजाताज्ञातवेदो नुदस्व।
 अस्मे दीदिहि सुमना अहेडन्तव स्याः शर्मन्निवरूथ उद्वित्।

सहसा जा॒तान्प्र णु॒दा नः स॒पत्नान्प्रत्यजा॑ता॒ज्ञातवे॑दो नुदस्व।
 अधि॑ नो ब्रूहि सुमन॒स्यमा॑नो व॒यः३ स्या॑म॒ प्र णु॒दा नः
 स॒पत्नान्। च॒तुश्च॒त्वारि॒५शः स्तोमो॑ वर्चो॒ द्रवि॑ण॒५ षोड॒शः
 स्तोम॑ ओजो॒ द्रवि॑णम्पृथि॒व्याः पुरी॑षमसि [26]

अप्सो॒ नाम॑। ए॒व॒श्छन्दो॑ वरि॑व॒श्छन्दः॑ श॒म्भूश्छन्दः॑
 परि॒भूश्छन्दः॑ आ॒च्छच्छन्दो॑ मन॒श्छन्दो॑ व्यच॒श्छन्दः॑
 सिन्धु॒श्छन्दः॑ समु॒द्रं छन्दः॑ सलि॒लं छन्दः॑ संय॒च्छन्दो॑
 विय॒च्छन्दो॑ बृह॒च्छन्दो॑ रथं॒तुरं छन्दो॑ नि॒काय॑श्छन्दो॑
 वि॒व॒धश्छन्दो॑ गिर॒श्छन्दो॑ भ्रज॒श्छन्दः॑ स॒ष्टृच्छन्दो॑ऽनु॒ष्टृच्छन्दः॑
 क॒कुच्छन्द॑स्त्रि॒क॒कुच्छन्दः॑ का॒व्यं छन्दो॑ऽङ्कु॒पं छन्दः॑ [27]

प॒दपङ्क्ति॑श्छन्दो॒ऽर॒ख्यर॑पङ्क्ति॒श्छन्दो॑ विष्टा॒रपङ्क्ति॑श्छन्दः॑
 र॒ख्युरो भृ॒ज्वा॒च्छन्दः॑ प्र॒च्छच्छन्दः॑ प॒र॒ख्यश्छन्द॑ ए॒व॒श्छन्दो॑
 वरि॑व॒श्छन्दो॑ वय॒श्छन्दो॑ वय॒स्कृच्छन्दो॑ वि॒शा॒लं छन्दो॑
 विष्प॑र्धा॒श्छन्द॑श्छ॒दि॒श्छन्दो॑ दूरो॒हणं छन्द॑स्त॒न्द्रं छन्दो॑ऽङ्का॒ङ्कं
 छन्दः॑॥ [28]

सूर्यस्य॑ मनु॑षो मरुतः॑ पाव॑क॒ महो॑भी रथे॒शुभं॑ के॒न प॑द॒त्वारि॒५शच्च॑॥13॥

अ॒ग्निर्वृ॒त्राणि॑ जङ्घ॒नद्व॒विण॒स्युर्वि॒प॒न्यया॑। समि॑द्धः

शुक्र आहुतः॥ त्व५ सोमासि सत्पतिस्त्व५ राजोत
 वृत्रहा। त्वम्भद्रो असि क्रतुः॥ भद्रा ते अग्ने स्वनीक
 संदृग्घोरस्य सतो विषुणस्य चारुः। न यत्ते शोचिस्तमसा
 वरन्त न ध्वस्मानस्तनुवि रेप आ धुः॥ भद्रं ते अग्ने
 सहसिन्ननीकमुपाक आ रोचते सूर्यस्य। [29]

रुशदृशे ददृशे नक्तया चिदरूखितं दृश आ रूपे अन्नम्।
 सैनानीकेन सुविदत्रो अस्मे यष्टा देवा५ आयजिष्ठः स्वस्ति।
 अदब्धो गोपा उत नः परस्पा अग्रे द्युमदुत रेवर्दिदीहि।
 स्वस्ति नो दिवो अग्ने पृथिव्या विश्वायुर्धेहि यजथाय देव।
 यथ्सीमहि दिविजात प्रशस्तं तदस्मासु द्रविणं धेहि चित्रम्।
 यथा होतर्मनुषः [30]

देवताता यज्ञेभिः सूनो सहसो यजासि। एवानो अद्य
 समना समानानुशन्नग्र उशतो यखि देवान्॥ अग्निमीडे
 पुरोहितं यज्ञस्य देवमृत्विजम्। होतार५ रत्नधातमम्॥
 वृषा सोम द्युमा५ असि वृषा देव वृषव्रतः। वृषा धर्माणि
 दधिषे॥ सान्तपना इद५ हविर्मरुतस्तञ्जुष्टन। युष्माकोती
 रिशादसः॥ यो नो मर्तो वसवो दुर्हणा युस्तिरः सत्यानि

मरुतः [31]

जिघांसात्। द्रुहः पाशम्प्रति स मुंचीष्ट तपिष्ठेन
तपसा हन्तना तम्। संवत्सरीणां मरुतः स्वर्का उरुख्ययाः
सगणा मानुषेषु। तैऽस्मत्पाशान्त्र मुञ्चन्त्वहंसः सांतपना
मंदिरा मादयिष्णवः। पिप्रीहि देवा उशतो यविष्ठ विद्वा
ऋतूः रऋतुपते यजेह। ये दैव्या ऋत्विजस्तेभिरग्ने त्व
होतृणामस्यायजिष्ठः। अग्ने यदद्य विशो अध्वरस्य होतः
पावक [32]

शोचे वेष्ट्वहं हि यज्वा। ऋता यजासि महिना वि
यद्भूरहव्या वहं यविष्ठ या तै अद्य। अग्निना रयिमश्रवत्पोषमेव
दिवेदिवे। यशसं वीरवत्तमम्॥ गयस्फानो अमीवहा
वसुवित्पुष्टिवर्धनः। सुमित्रः सोम नो भव। गृहमेधास आ
गतं मरुतो मापं भूतना प्रमुञ्चन्तो नो अहंसः। पूर्वीभिर्हि
दंदाशिम शरद्विर्मरुतो वयम्। महौभिः [33]

चरुषणीनाम्। प्र बुध्निया ईरते वो महांसि प्र
णामानि प्रयज्यवस्तिरध्वम्। सहस्रियं दम्यम्भागमेतं
गृहमेधीयम्मरुतो जुषध्वम्। उप यमेति युवतिः सुदख्यं

दोषा वस्तोर्हविष्मती घृताची॥ उप स्वैनमरमतिर्वसूयुः।
 इमो अंग्रे वीततमानि हव्याजस्रो वरिष देवतातिमच्छं। प्रति
 न ई५ सुरभीणि वियन्तु। क्रीडं वः शर्धो मारुतमनुर्वाण५
 रथेशुभम्॥ [34]

कण्वा अ॒भि प्र गा॑यत। अ॒त्यासो॒ न ये म॒रुतः॒ स्वश्चो॑
 य॒ख्यदृ॒शो न शु॒भय॑न्त॒ मर्याः॑। ते ह॒र्म्ये॒ष्ठाः शि॒शवो॒ न शु॒भ्रा
 व॒त्सासो॒ न प्र॑क्री॒डिनः॑ पयो॒धाः। प्रैषा॒मज्मे॑षु वि॒धुरे॒वं रेज॑ते
 भूमि॒र्यामै॑षु यद्ध॒ युञ्ज॑ते शु॒भे। ते क्री॒डयो॒ धुन॑यो॒ भ्राज॑दृष्टयः
 स्व॒यम्म॑ह॒ित्वम्प॑नयन्त॒ धूत॑यः। उ॒प॒ह॒रेषु॒ यदचि॑ध्वं य॒यिं व॑यं
 इव मरुतः केन॑ [35]

चि॒त्प॒था। श्रोत॑न्ति॒ कोशा॒ उप॑ वो॒ रथे॑ष्वा घृ॒तमु॑ख्यता॒
 मधु॑वर्णमर्चते। अ॒ग्निम॑ग्नि५ हवी॑मभिः सदा॑ हवन्त वि॒शप॑तिम्॥
 ह॒व्यवा॑ह॒म्पुरु॑प्रियम्। त५ हि शश्व॑न्त॒ ईड॑ते सु॒चा दे॒वं
 घृ॒तश्चु॑ता॥ अ॒ग्नि५ ह॒व्याय॒ वोढ॑वे। इन्द्रा॑ग्नी रोच॒ना दि॒वः
 श्रथ॑द्व॒त्रमिन्द्रं॑ वो वि॒श्वत॑स्परीन्द्रं॒ नरो॒ विश्व॑कर्मन् ह॒विषा॑
 वावृ॑धानो विश्व॑कर्मन् ह॒विषा॒ वर्ध॑नेन॥ [36]

सुमिद्दिशान्द्वादश॥12॥ रश्मिरसि प्रति धेनुमसि स्तनयिबुसनिरस्यादित्यानां सप्तत्रिंशत्॥37॥ रश्मिरसि को अद्य युङ्गे॥

हरिः ओम्॥ श्रीकृष्णार्पणमस्तु॥

॥ हरिः ओम्॥ तैत्तिरीयसंहिता चतुर्थकाण्डे चतुर्थः प्रश्नः॥

॥चतुर्थः प्रश्नः॥

॥तैत्तिरीयसंहितायां चतुर्थकाण्डे चतुर्थः प्रश्नः॥

उशिगंसि प्राणाय त्रिचत्वारिंशच्च॥1॥

रश्मिरसि रक्षयाय त्वा रक्षयं जिन्व प्रेतिरसि
धर्माय त्वा धर्मं जिन्वान्वितिरसि दिवे त्वा दिवं जिन्व
संधिरस्यन्तरिख्याय त्वान्तरिख्यं जिन्व प्रतिधिरसि
पृथिव्यै त्वा पृथिवीं जिन्व विष्टम्भोऽसि वृष्ट्यै त्वा वृष्टिं
जिन्व प्रवास्यहे त्वाहर्जिन्वानुवासि रात्रियै त्वा रात्रिं
जिन्वोशिगंसि [1]

वसुभ्यस्त्वा वसूञ्जिन्व प्रकेतोऽसि रुद्रेभ्यस्त्वा
रुद्राञ्जिन्व सुदीतिरस्यादित्येभ्यस्त्वाऽऽदित्याञ्जिन्वौजोऽसि
पितृभ्यस्त्वा पितॄञ्जिन्व तन्तुरसि प्रजाभ्यस्त्वा प्रजा जिन्व
पृतनाषाडसि पशुभ्यस्त्वा पशूञ्जिन्व रेवदस्योषधीभ्यस्त्वौषधीजि

युक्तग्रावेन्द्राय त्वेन्द्रं जिन्वाधिपतिरसि प्राणाय [2]

त्वा प्राणं जिन्व यन्तास्यपानाय त्वापानं जिन्व
स॒५ स॒र्पोऽसि॒ च॒ख्युषे॒ त्वा च॒ख्युर्जिन्व॒ वयो॒धा अ॒सि श्रोत्रा॒य
त्वा श्रोत्रं जिन्व त्रिवृदसि प्रवृदसि संवृदसि विवृदसि
स॒५ रो॒होऽसि॒ नीरो॒होऽसि॒ प्ररो॒होऽस्य॒नुरो॒होऽसि॒ वसु॒कोऽसि॒
वेष॑श्चिरसि वस्यष्टिरसि॥ [3]

प्रतीची दिङ्मरुतस्ते देवा अधिपतयश्चत्वारि५शच्च॥2॥

राज्यसि प्राची दिग्वसवस्ते देवा अधिपतयोऽग्निर्हेतीनाम्प्रति
त्रिवृत्त्वा स्तोमः पृथिव्या५ श्रयत्वाज्यमुक्थ- मव्यथयथस्तभ्रातु
रथंतर५ साम् प्रतिष्ठित्यै विराडसि दखिषणा दिगृद्रास्ते
देवा अधिपतय इन्द्रो हेतीनाम्प्रतिधर्ता पञ्चदशस्त्वा स्तोमः
पृथिव्या५ श्रयतु प्रउंगमुक्थमव्यथयथस्तभ्रातु बृहत्साम्
प्रतिष्ठित्यै सम्राडसि प्रतीची दिक् [4]

आदित्यास्ते देवा अधिपतयः सोमो हेतीनाम्प्रतिधर्ता
सप्तदशस्त्वा स्तोमः पृथिव्या५ श्रयतु मरुत्वतीयमुक्थ-
मव्यथयथस्तभ्रातु वैरूप५ साम् प्रतिष्ठित्यै स्वराडस्युदीची
दिग्विधे ते देवा अधिपतयो वरुणो हेतीनाम्प्रतिधर्तैक-

वि॒श॒स्त्वा॒ स्तोमः॑ पृथि॒व्या॑ श्र॒यतु॑ निष्कै॒वल्यमु॑क्थमव्य॒थय॑थ
वैरा॒ज॑ साम॒ प्रति॑ष्ठित्या॒ अधि॑पत्यसि बृह॒ती दि॒ङ्मरु॑तस्ते
दे॒वा अधि॑पतयः [5]

बृह॒स्पति॑रहे॒तीना॒म्प्रति॑ध॒र्ता त्रि॑णवत्रयस्त्रि॒शौ त्वा॒
स्तोमौ॑ पृथि॒व्या॑ श्र॒यतां॑ वैश्वदे॒वाग्नि॑मारु॒ते उ॒क्थे
अव्य॑थयन्ती स्त॒भ्रीता॑ शा॒क्ररै॒वते॑ साम॒नी प्रति॑ष्ठित्या
अ॒न्तरि॑ख्याय॒र्षय॑स्त्वा प्रथम॒जा दे॒वेषु॑ दि॒वो मा॒त्रया॑ वरि॒णा
प्र॑थन्तु वि॒ध॒र्ता चा॒यमधि॑पतिश्च॒ ते त्वा॒ सर्वे॑ संवि॒दाना॑
नाक॑स्य पृ॒ष्ठे सु॒वर्गे॑ लो॒के यज॑मानं च सादयन्तु॥ [6]

प्र॒म्लोच॑न्ती च॒ यश्च॑ स्व॒स्त्याष्टा॑वि॒शति॑श्च॥ 3॥

अ॒यम्पु॒रो हरि॑केशः॒ सूर्य॑रश्मि॒स्तस्य॑ रथगृ॒त्सश्च॒ रथौ॑जाश्च
से॒नानि॑ग्राम॒ण्यौ पु॒ञ्जिक॑स्थ॒ला च॑ कृतस्थ॒ला चा॑प्सरसौ
यातु॑धाना॒ हेती॑ रख्या॒सि प्र॑हेति॒रयं॑ द॒खि॒ष्णा वि॒श्वक॑र्मा
तस्य॑ रथस्वनश्च॒ रथे॑चित्रश्च॒ सेनानि॑ग्राम॒ण्यौ मे॒नका॑ च॒
सह॑ज॒न्या चा॑प्सरसौ द॒ङ्ख॒ष्णवः॑ प॒शवो॑ हे॒तिः पौ॒रुषे॑यो
व॒धः प्र॑हेति॒रयम्प॒श्चाद्वि॒श्वव्य॑चा॒स्तस्य॑ रथ॒प्रोत॑श्चासं॒मरथ॑श्च
से॒नानि॑ग्राम॒ण्यौ प्र॒म्लोच॑न्ती च [7]

अनुम्लोचन्ती चाप्सरसौ सर्पा हेतिर्व्याघ्राः प्रहेतिरयमुत्तराथ्सं
 सेनजिच्च सुषेणश्च सेनानिग्रामण्यौ विश्वाची च घृताची
 चाप्सरसावापो हेतिर्वातः प्रहेतिरयमुपर्यर्वाग्वसुस्तस्य
 तारख्यश्चारिष्टनेमिश्च सेनानिग्रामण्या- वुर्वशी च
 पूर्वचित्तिश्चाप्सरसौ विद्युद्धेतिरवस्फूर्जन्प्रहेतिस्तेभ्यो
 नमस्ते नो मृडयन्तु ते यम् [8]

द्विष्मो यश्च नो द्वेष्टि तं वो जम्भे दधाम्यायोस्त्वा
 सदेने सादयाम्यवतश्छायायां नमः समुद्राय नमः समुद्रस्य
 चख्खसे परमेष्ठी त्वा सादयतु दिवः पृष्ठे व्यचस्वतीम्प्रथस्वतीं
 विभूमतीम्प्रभूमतीम्परिभूमतीं दिवं यच्छु दिवं दृ९ह दिवम्मा
 हि९सीर्विश्वस्मै प्राणायानाय व्यानायोदानाय प्रतिष्ठायै
 चरित्राय सूर्यस्त्वाभि पातु मद्या स्वस्त्या छुर्दिषा शन्तमेन
 तया देवतयाङ्गिरस्वद्धुवा सीद। प्रोथदश्चो न यवसे अविष्यन्
 यदा महः संवरणाद्वस्थात्। आदस्य वातो अनु वाति
 शोचिरधं स्म ते व्रजनं कृष्णमस्ति॥ [9]

जनानामङ्गिरस इप९ सुशमी तिग्मजम्भ पुपूर्या अर्वाङ्गसुश्रवाः पञ्च च॥4॥

अग्निर्मूर्धा दिवः ककुत्पतिः पृथिव्या अयम्। अपा९

रेताँसि जिन्वति॥ त्वामग्ने पुष्करादध्यथर्वा निरमन्थत।
 मूर्ध्नो विश्वस्य वाघतः॥ अयमग्निः संहस्त्रिणो वाजस्य
 शतिनस्पतिः। मूर्धा कवी रयीणाम्॥ भुवो यज्ञस्य रजसश्च
 नेता यत्रा नियुद्धिः सचसे शिवाभिः। दिवि मूर्धानं दधिषे
 सुवर्षां जिह्वामग्ने चकृषे हव्यवाहम्॥ अबोध्यग्निः समिधा
 जनानाम् [10]

प्रति धेनुमिवायतीमुषासम्। यद्वा इव प्र वयामुज्जिहानाः
 प्र भानवः सिस्रते नाकमच्छ। अवोचाम कवये मेध्याय वचो
 वन्दारु वृषभाय वृष्णो। गविष्ठिरो नमसा स्तोममग्नौ दिवीव
 रुक्ममुर्व्यञ्चमश्रेत्। जनस्य गोपा अजनिष्ट जागृविरग्निः
 सुदर्व्यः सुविताय नव्यसे। घृतप्रतीको बृहता दिविस्पृशा
 द्युमद्वि भाति भरतेभ्यः शुचिः। त्वामग्ने अङ्गिरसः [11]

गुहा हितमन्वविन्दञ्छिश्रियाणं वनेवने। स जायसे
 मथ्यमानः सहो महत्त्वामाहुः सहसस्पुत्रमङ्गिरः। यज्ञस्य
 केतुम्प्रथमम्पुरोहितमग्निं नरस्त्रिषधस्थे समिन्धते। इन्द्रेण
 देवैः सरथँ स बर्हिषि सीदन्नि होता यजथाय सुक्रतुः। त्वं
 चित्रश्रवस्तम् हवन्ते विख्यु जन्तवः। शोचिष्केशम्पुरुप्रियाग्रे

हव्याय॒ वोढ॑वे। सखा॒यः सं वः॑ स॒म्यञ्च॑मिषम् [12]

स्तोमं॑ चा॒ग्नये॑। व॒र्षि॑ष्ठाय॒ खि॒तीना॒मूर्जो॑ न॒त्रे सह॑स्वते।
स॒स॒मि॒द्युव॑से वृष॒न्न॒ग्रे वि॒श्वान्य॑र्य आ। इ॒डस्प॑दे स॒मि॒ध्यसे॒
स नो॑ वसू॒न्या भ॑र। ए॒ना वो॑ अ॒ग्निं नम॑सो॒र्जो न॑पा॒तमा॑ हु॒वे।
प्रि॒यं चेति॑ष्ठम॒रति॑ः स्व॑ध्व॒रं वि॒श्वस्य॑ दू॒तम॑मृ॒तम्। स यो॑जते
अरु॒षो वि॒श्वभो॑जसा॒ स दु॑द्रव॒थ्स्वा॑हुतः। सु॒ब्रह्मा॑ य॒ज्ञः सु॒शर्मा॑
[13]

वसू॑नां दे॒वः रा॒धो जना॑नाम्। उ॒दस्य॑ शो॒चिर॑स्थादा॒जुह्वा॑नस्य
मी॒दुषः॑। उ॒द्धूमा॑सो अरु॒षासो॑ दि॒विस्पृ॑शः स॒म॒ग्निमि॑न्धते
नरः॑। अ॒ग्रे वा॒जस्य॑ गोम॑त॒ ईशा॑नः सह॒सो य॑हो। अ॒स्मे
धे॑हि जा॒तवे॑दो॒ महि॑ श्रवः॑। स इ॒धानो॑ वसु॑ष्क॒विर॒ग्निरी॒डेन्यो॑
गि॒रा। रे॒वद॑स्मभ्य॑म्पु॒र्वणी॑क दी॒दिहि॑। ख॒षो रा॑ज॒न्नुत॑ त्मना॒ग्रे
वस्तो॑रु॒तोष॑सः। स ति॑ग्मज॒म्भ [14]

र॒ख्सो द॑ह॒ प्रति॑। आ ते॑ अ॒ग्न इ॒धीम॑हि द्यु॒मन्तं॑ दे॒वा॒जर॑म्।
यद्ध॑ स्या ते॒ पनी॑यसी स॒मि॒द्दी॒दय॑ति द्यवी॒षः॑ स्तो॒तृभ्य॑ आ
भ॑र। आ ते॑ अ॒ग्न ऋ॒चा ह॒विः शु॒क्रस्य॑ ज्योतिषस्पते। सु॒श्व॒न्द्र
दस्म॑ वि॒शप॑ते॒ हव्य॑वा॒द्भ्यः॑ हू॒यत॑ इ॒षः॑ स्तो॒तृभ्य॑ आ भ॑र।

उ॒भे सु॑श्च॒न्द्र स॒र्पिषो॒ दर्वी॑ श्रीणीष आ॒सनि॑। उ॒तो न॒ उत्पु॑र्ण्याः
[15]

उ॒क्थे॑षु शवसस्पत॒ इषः॑ स्तो॒तृभ्य॒ आ भ॑र। अ॒ग्ने तम॑द्याश्वं
न स्तोमैः॒ क्रतुं॑ न भ॒द्र५ ह॑दि॒स्पृश॑म्। ऋ॒ध्यामा॑ त॒ ओहैः॑।
अधा॒ ह्य॒ग्ने क्रतो॑र्भ॒द्रस्य॒ दख॑षस्य सा॒धोः। र॒थीर्ऋ॒तस्य॑ बृ॒हतो॑
ब॒भूथ॑। आ॒भिष्टे॑ अ॒द्य गी॒र्भिर्गु॑णन्तोऽ॒ग्ने दा॑शेम। प्र ते॑ दि॒वो
न स्त॑नयन्ति शुष्माः॑। ए॒भिर्नो॑ अ॒र्कैर्भवा॑ नो अ॒र्वाङ् [16]

सुव॒र्न ज्योतिः॑। अ॒ग्ने वि॒श्वेभिः॑ सुमना॒ अनी॑कैः। अ॒ग्नि५
होता॑रम्मन्ये दास्वन्त॒वँसोः॑ स॒ूनु५ सह॑सो जा॒तवे॑दसम्। वि॒प्रं
न जा॒तवे॑दसम्। य ऊ॒र्ध्वया॑ स्व॒ध्वरो॑ दे॒वो दे॒वाच्या॑ कृ॒पा।
घृ॒तस्य॑ वि॒भ्राष्टि॑मनु॒ शुक्र॑शोचिष आ॒जुह्वा॑नस्य स॒र्पिषः॑। अ॒ग्ने
त्व॒न्नो अ॒न्तमः॑। उ॒त त्रा॒ता शि॒वो भ॑व वरू॒थ्यः। तं त्वा॑ शोचिष्ठ
दी॒दिवः॑। सु॒म्नाय॑ नून॒मीम॑हे सखि॒भ्यः। वसु॑र॒ग्निर्वसु॑श्रवाः।
अच्छा॑ नखिष द्युमत्त॒मो र॒यिं दाः॑॥ [17]

साऽष्टाच॑त्वारि५शच्च॥ 5॥

इ॒न्द्रा॒ग्निभ्या॑ त्वा स॒युजा॑ यु॒जा यु॑नज्म्याघा॒राभ्या॑
तेज॑सा॒ वर्च॑सो॒क्थेभिः॒ स्तोमै॑भिश्छ॒न्दोभी॒ र॒य्यै पो॑षाय

सजा॒तानाम्म॑मध्यम॒स्थेया॑य॒ मया॑ त्वा स॒युजा॑ यु॒जा
 यु॒नज्म्य॑म्बा दु॒ला नि॒त॒त्रिभ्र॑यन्ती मे॒घय॑न्ती व॒र्षय॑न्ती
 चुपु॒णीका॒ नामा॑सि प्र॒जाप॑तिना त्वा वि॒श्वाभि॑र्धो॒भिरु॑प॒ दधामि॑
 पृथि॒व्युद॑पुरम॒न्नैः वि॒ष्टा म॑नु॒ष्यास्ते गो॒प्तारो॒ऽग्निर्वि॑य॒त्तोऽस्या॑
 ताम॒हम्प्र प॑द्ये सा [18]

मे श॒र्म च॒ वर्म॑ चा॒स्त्वधि॑द्यौरन्त॒रिख॑म्ब्रह्म॒णा वि॒ष्टा
 म॒रुत॑स्ते गो॒प्तारो॒ वा॒युर्वि॑य॒त्तोऽस्या॑ ताम॒हम्प्र प॑द्ये सा मे
 श॒र्म च॒ वर्म॑ चास्तु॒ द्यौरप॑राजिता॒मृते॑न वि॒ष्टादि॒त्यास्ते॑
 गो॒प्तारः॒ सूर्यो॒ वि॑य॒त्तोऽस्या॑ ताम॒हम्प्र प॑द्ये सा मे श॒र्म च॒
 वर्म॑ चास्तु॥ [19]

विद्युध्मनिर्द्युत्वेकात्रि॒९शच्च॑॥6॥

बृह॒स्पति॑स्त्वा सादयतु पृथि॒व्याः पृ॒ष्ठे ज्योति॑ष्मतीं
 वि॒श्वस्मै॑ प्रा॒णाया॑पा॒नाय॒ विश्वं॑ ज्योति॒र्यच्छा॑ग्निस्तेऽधि॑पतिर्-
 वि॒श्वक॑र्मा त्वा सादयत्वन्त॒रिख॑स्य पृ॒ष्ठे ज्योति॑ष्मतीं
 वि॒श्वस्मै॑ प्रा॒णाया॑पा॒नाय॒ विश्वं॑ ज्योति॒र्यच्छ॑ वा॒युस्तेऽधि॑पतिः
 प्र॒जाप॑तिस्त्वा सादयतु दि॒वः पृ॒ष्ठे ज्योति॑ष्मतीं वि॒श्वस्मै॑
 प्रा॒णाया॑पा॒नाय॒ विश्वं॑ ज्योति॒र्यच्छ॑ परमे॒ष्ठी तेऽधि॑पतिः

पुरोवा॒त॒स॒नि॒र॒स्य॒भ्र॒स॒नि॒र॒सि॒ वि॒द्यु॒त्स॒निः॑ [20]

अ॒सि॒ स्त॒न॒यि॒त्स॒नि॒र॒सि॒ वृ॒ष्टि॒स॒नि॒र॒स्य॒ग्रे॒र्या॒न्य॑सि
 दे॒वाना॑म॒ग्रे॒या॒न्य॑सि वा॒यो॒र्या॒न्य॑सि दे॒वाना॑ वा॒यो॒या॒न्य॑स्य॒न्त॒रि॒रि॒ख्य॑
 या॒न्य॑सि दे॒वाना॑म॒न्त॒रि॒रि॒ख्य॑या॒न्य॑स्य॒न्त॒रि॒रि॒ख्य॑म॒स्य॒न्त॒रि॒रि॒ख्य॑ाय
 त्वा॒ स॒लि॒ला॒य॑ त्वा॒ स॒र्णी॑का॒य॑ त्वा॒ स॒ती॑का॒य॑ त्वा॒ के॒ता॑य
 त्वा॒ प्र॒चे॒त॒से॑ त्वा॒ वि॒व॑स्व॒ते॑ त्वा॒ दि॒व॒स्त्वा॒ ज्यो॒ति॑ष
 आ॒दि॒त्ये॒भ्य॑स्त्व॒र्चे॑ त्वा॑ रु॒चे॑ त्वा॑ द्यु॒ते॑ त्वा॑ भा॒से॑ त्वा॒ ज्यो॒ति॑षे
 त्वा॒ य॒शो॒दा॑ त्वा॒ य॒श॑सि ते॒जो॒दा॑ त्वा॒ ते॒ज॑सि प॒यो॒दा॑ त्वा॒
 प॒य॑सि व॒र्चो॒दा॑ त्वा॒ व॒र्च॑सि द्रवि॒णो॒दा॑ त्वा॒ द्रवि॑णे सा॒दया॑मि
 ते॒न॒र्षि॑णा॒ ते॒न॒ ब्र॒ह्म॑णा॒ तया॑ दे॒व॒त॒या॒ङ्गि॒र॒स्व॒द्धृ॒वा॒ सी॑द॥
 [21]

व्या॒न॒म्मे॒ द्वा॒त्रि॒ंश॒च॑॥ 7॥

भू॒य॒स्कृ॑द॒सि॒ व॒रि॒व॒स्कृ॑द॒सि॒ प्रा॒च्य॑स्य॒ध्वा॑स्य॒न्त॒रि॒रि॒ख्य॑स॒द॑स्य॒न्त॒
 सी॒दा॒प्सु॑ष॒द॒सि॒ श्ये॒न॒स॒द॑सि॒ गृ॒ध्र॒स॒द॑सि॒ सु॒पर्ण॑स॒द॑सि॒
 ना॒क॒स॒द॑सि॒ पृ॒थि॒व्या॒स्त्वा॒ द्रवि॑णे सा॒दया॑म्य॒न्त॒रि॒रि॒ख्य॑स्य॒ त्वा॒
 द्रवि॑णे सा॒दया॑मि दि॒व॒स्त्वा॒ द्रवि॑णे सा॒दया॑मि दि॒शां॑ त्वा॒
 द्रवि॑णे सा॒दया॑मि द्रवि॒णो॒दा॑ त्वा॒ द्रवि॑णे सा॒दया॑मि प्रा॒ण॒म्मे॒

पाह्यपानम्मे पाहि व्यानम्मे [22]

पाह्यायुर्मे पाहि विश्वायुर्मे पाहि सर्वायुर्मे पाह्यग्ने यत्ते
पर॑ ह॒न्नाम॒ तावेहि॒ स॑ र॒भावहै॒ पाञ्च॑जन्येष्वप्येध्यग्ने यावा॒
अया॑वा॒ एवा॒ ऊमाः॒ सब्दः॒ सगरः॒ सुमेकः॑ ॥ [23]

अग्निनैकाग्रपञ्चाशत् ॥ 8 ॥

अग्निना॑ विश्वा॒षाट्॒सूर्येण॑ स्व॒राट्क॒त्वा श॒ची॒पति॑र्ऋष॒भेण॒
त्वष्टा॑ य॒ज्ञेन॑ म॒घवा॒न्दरि॑षि॒णया॑ सुव॒र्गो म॒न्युना॑ वृ॒त्रहा॑
सौहा॑र्द्येन॒ तनू॑धा अ॒न्नेन॒ गयः॑ पृथि॒व्यास॑नोदृ॒ग्भिर॑न्नादो
व॑षट्कारेण॒र्द्धः साम्ना॑ तनू॒पा वि॒राजा॒ ज्योति॑ष्मान् ब्रह्म॑णा
सोम॒पा गोभि॑र्य॒ज्ञं दा॑धार ख॒षत्रेण॑ मनु॒ष्यान् श्वेन॑ च॒ रथेन॑
च व॒ज्र॒तुभिः॑ प्र॒भुः संव॑त्स॒रेण॑ परि॒भूस्त॑प॒साना॑धृष्टः॒ सूर्यः॒
सन्त॑नूभिः ॥ [24]

रुद्र एकविंशतिश्च ॥ 8 ॥

प्र॒जाप॑ति॒र्मन॒सान्धोऽच्छे॑तो धा॒ता दी॒ख्याया॑
सवि॒ता भृ॒त्याम्पू॒षा सोम॑क्रय॒ण्याव्व॑रुण॒ उप॑न॒द्धोऽसु॑रः
क्री॒यमा॑णो मि॒त्रः क्री॒तः शि॑पिविष्ट आसा॑दितो न॒रं धि॑षः
प्रो॒ह्यमा॑णोऽधि॒पति॑रागतः प्र॒जाप॑तिः प्रणी॒यमा॑नोऽग्निरा॒ग्नीध्रे॑

बृहस्पतिराग्नीधात्प्रणीयमानं इन्द्रो हविर्धानेऽदितिरासादितो
विष्णुरुपावहियमाणोऽथर्वोपोत्तो यमोऽभिषुतोऽपूतपा
आधूयमानो वायुः पूयमानो मित्रः र्षीरश्रीर्मन्थी
संक्तुश्रीर्वैश्वदेव उन्नीतो रुद्र आहुतो वायुरावृत्तो नृचख्याः
प्रतिख्यातो भर्ख्य आगतः पितृणां नाराशंसोऽसुरात्तः
सिन्धुरवभृथमवप्रयन्त्समुद्रोऽवंगतः सलिलः प्रप्लुतः
सुवरुद्वचं गतः॥ [25]

फल्गुनी नख्यत्रं वसंवस्यसि शच्च॥10॥

कृत्तिका नख्यत्रमग्निर्देवताग्ने रुचः स्थ प्रजापतेर्धातुः
सोमस्यर्चे त्वा रुचे त्वा द्युते त्वा भासे त्वा ज्योतिषे त्वा
रोहिणी नख्यत्रम्प्रजापतिर्देवता मृगशीर्षं नख्यत्रं सोमो
देवताद्रा नख्यत्रं रुद्रो देवता पुनर्वसू नख्यत्रमदिति-
देवता तिष्यो नख्यत्रम्बृहस्पतिर्देवताश्रेषा नख्यत्रं सर्पा
देवता मघा नख्यत्रम्पितरो देवता फल्गुनी नख्यत्रम् [26]

अर्यमा देवता फल्गुनी नख्यत्रम्भगो देवता हस्तो
नख्यत्रं सविता देवता चित्रा नख्यत्रमिन्द्रो देवता स्वाती
नख्यत्रं वायुर्देवता विशाखे नख्यत्रमिन्द्राग्नी देवताऽनूराधा

नख्यत्रमिन्द्रो देवता रोहिणी नख्यत्रमिन्द्रो देवता विचृतौ
 नख्यत्रमपितरो देवताषाढा नख्यत्रमापो देवताषाढा नख्यत्रं
 विश्वे देवा देवता श्रोणा नख्यत्रं विष्णुर्देवता श्रविष्ठा नख्यत्रं
 वसवः [27]

देवता शतभिषङ्गख्यत्रमिन्द्रो देवता प्रोष्ठपदा
 नख्यत्रमज एकपादेवता प्रोष्ठपदा नख्यत्रमहिर्बुध्नियो
 देवता रेवती नख्यत्रम्पूषा देवताश्वयुजौ नख्यत्रमश्विनौ
 देवतापभरणीर्नख्यत्रं यमो देवता पूर्णा पश्चाद्यत्ते देवा
 अदधुः॥ [28]

सब्रता रुद्राणाम्युतञ्च पञ्चचत्वारिंशच्च॥ 11॥

मधुश्च माधवश्च वासन्तिकावृतू शुक्रश्च शुचिश्च ग्रैष्मावृतू
 नभश्च नभस्यश्च वार्षिकावृतू इषश्चोर्जश्च शारदावृतू
 सहश्च सहस्यश्च हैमन्तिकावृतू तपश्च तपस्यश्च शैशिरावृतू
 अग्नेरन्तःश्लेषोऽसि कल्पेतां द्यावापृथिवी कल्पन्तामाप
 ओषधीः कल्पन्तामग्नयः पृथङ्म ज्यैष्ठ्याय सब्रताः [29]

यैऽग्नयः समनसोऽन्तरा द्यावापृथिवी शैशिरावृतू अभि
 कल्पमाना इन्द्रमिव देवा अभि सं विशन्तु संयच्च प्रचेताश्चाग्नेः

सोमस्य सूर्यस्योग्रा च भीमा च पितृणां यमस्येन्द्रस्य ध्रुवा
 च पृथिवी च देवस्य सवितुर्मरुतां वरुणस्य धर्त्री च धरित्री
 च मित्रावरुणयोर्मित्रस्य धातुः प्राचीं च प्रतीचीं च वसूनां
 रुद्राणाम् [30]

आदित्यानान्ते तेऽधिपतयस्तेभ्यो नमस्ते नो मृडयन्तु ते
 यं द्विष्मो यश्च नो द्वेष्टि तं वो जम्भे दधामि सहस्रस्य
 प्रमा असि सहस्रस्य प्रतिमा असि सहस्रस्य विमा असि
 सहस्रस्योन्मा असि साहस्रोऽसि सहस्राय त्वेमा मे अग्र
 इष्टका धेनवः सन्त्वेकां च शतं च सहस्रं चायुतं च [31]

नियुतं च प्रयुतं चार्बुदं च न्यर्बुदं च समुद्रश्च मध्यं
 चान्तंश्च परार्धश्चेमा मे अग्र इष्टका धेनवः सन्तु षष्टिः
 सहस्रमयुतमर्खीयमाणा ऋतस्थाः स्थर्तावृधो घृतश्रुतो
 मधुश्रुत ऊर्जस्वतीः स्वधाविनीस्ता मे अग्र इष्टका धेनवः
 सन्तु विराजो नाम कामदुघा अमुत्रामुष्मिल्लोके॥ [32]

महि सप्तदशेनावस्युवाता अभि नोऽनु नृश्वतुर्दश च॥12॥

सुमिद्विशामाशया नः सुवर्विन्मधोरतो माधवः पात्वस्मान्।
 अग्निर्देवो दुष्टरीतुरदाभ्य इदं रक्षत्रं ररक्षतु पात्वस्मान्।

रथं॒तर॑ꣳ साम॑भिः पा॒त्वस्मा॑न्गाय॒त्री छ॑न्द॒सां वि॒श्वरू॑पा।
 त्रि॒वृ॒त्रो वि॒ष्टया॑ स्तोमो॒ अ॒ह्नाꣳ स॑मु॒द्रो वा॒त इ॒दमो॑जः पिप॑र्तु।
 उ॒ग्रा दि॒शाम॑भिभू॒तिर्वयो॑धाः शुचिः॑ शु॒क्रे अ॒ह॒न्यो॒ज॒सीना॑।
 इन्द्रा॑धि॒पतिः॑ पिपृ॒ता॒दतो॑ नो॒ महि॑ [33]

ख॒ष॒त्रं वि॒श्वतो॑ धा॒रये॑दम्। बृ॒ह॒त्साम॑ ख॒ष॒त्रभृ॑द्वृ॒द्धवृ॑ष्णियं
 त्रि॒ष्टुभौ॑जः शु॒भित॑मु॒ग्रवी॑रम्। इन्द्र॒ स्तोमे॑न प॒ञ्चद॑शेन
 म॒ध्यमि॑दं वा॒तेन॑ स॒गरे॑ण र॒ख्य। प्राचीं॑ दि॒शाꣳ स॒हय॑शा
 यश॑स्वती॒ विश्वे॑ दे॒वाः प्रा॒वृषा॑ह्नाꣳ सु॒वर्व॑ती। इ॒दं ख॒ष॒त्रं
 दु॒ष्टर॑म॒स्त्वो॒जोऽना॑धृष्टꣳ स॒ह॒स्त्रिय॑ꣳ स॒ह॒स्वत्। वैरू॑पे
 साम॑न्नि॒ह तच्छ॑के॒म जग॑त्यैनं वि॒ख्या वै॑शयामः। विश्वे॑
 दे॒वाः सप्त॑द॒शेन॑ [34]

वर्च॑ इ॒दं ख॒ष॒त्रꣳ स॑ल॒िलवा॑तमु॒ग्रम्। ध॒र्त्री दि॒शां
 ख॒ष॒त्रमि॑दं दा॒धारो॑प॒स्थाशा॑ना॒मित्र॑व॒दस्त्वो॑जः। मि॒त्राव॑रुणा
 श॒रदा॑ह्ना चि॒कित्वा॑ अ॒स्मै रा॒ष्ट्राय॑ म॒हि श॑र्म यच्छ॒तम्।
 वैरा॑जे साम॒न्निधि॑ मे मनी॒षानु॑ष्टुभा॒ सम्भृ॑तं वी॒र्यꣳ स॒हः।
 इ॒दं ख॒ष॒त्रमि॑त्रव॒दार्द्र॑दानु॒ मित्रा॑वरुणा॒ र॒ख्यत॑माधि॒पत्यैः॑।
 स॒म्राड्दि॒शाꣳ स॒हसाम॑नी॒ सह॑स्वत्यृ॒तुर्हैम॑न्तो वि॒ष्टया॑ नः

पिपर्तु। अ॒व॒स्युवा॑ताः [35]

बृ॒ह॒ती॒र्नु श॑क्क॒रीरि॒मं य॒ज्ञम॑वन्तु नो घृ॒ताची॑ः। सु॒व॒र्वती॑
सु॒दु॒घा नः॑ प॒य॑स्वती दि॒शां दे॒व्य॑वतु नो घृ॒ताची॑। त्वं
गो॒पाः पु॒र॒ए॒तोत॑ प॒श्चाद्बृ॑ह॒स्पते॑ या॒म्यां यु॒द्धि वा॑चम्। ऊ॒र्ध्वा
दि॒शां र॑न्ति॒राशौष॑धीनां सं॒व॒त्स॒रेण॑ स॒वि॒ता नो॑ अ॒ह्माम्।
रे॒व॒त्स॒माति॑च्छ॒न्दा उ॒ छ॒न्दो॒जा॒त॒शत्रुः॑ स्यो॒ना नो॑ अ॒स्तु।
स्तो॒म॒त्रय॑स्त्रि॒ंशे भु॑व॒नस्य॑ प॒त्नि वि॑व॒स्व॒द्वाते॑ अ॒भि नः॑ [36]

गृ॒णा॒हि। घृ॒त॒व॒ती स॑वि॒तरा॒धि॒प॒त्यैः प॒य॑स्वती र॒न्ति॒रा॒शां
नो अ॒स्तु। ध्रु॒वा दि॒शां वि॑ष्णु॒प॒त्य॒घो॒रा॒स्ये॒शा॒ना॒ सह॑सो॒ या
म॒नो॒ता॑। बृ॒ह॒स्प॒ति॒र्मा॒त॒रि॒श्वो॒त वा॒युः सं॑धु॒वा॒ना वा॒ता अ॒भि
नो॑ गृणन्तु। वि॒ष्ट॒म्भो दि॒वो ध॒रुणः॑ पृ॒थि॒व्या अ॒स्ये॒शा॒ना॒
ज॒ग॒तो वि॑ष्णु॒प॒त्नी। वि॒श्व॒व्य॑चा इ॒ष॒य॑न्ती सु॒भू॒तिः शि॒वा
नो॑ अ॒स्त्वदि॑तिरु॒प॒स्थे॑। वै॒श्व॒ान॒रो न॑ ऊ॒त्या पृ॒ष्ठो दि॒व्य॑नु॒
नो॒ऽद्या॑नु॒म॒ति॒र॒न्वि॑द॒नु॒मते॑ त्वङ्क॒या न॑श्चि॒त्र आ भु॑व॒त्को अ॒द्य
यु॒ङ्क्ते॑॥ [37]

नमस्ते रुद्र नमो हिरण्यवाहवे नमस्सहमानाय नम आव्याधिनीभ्यो नमो भवाय नमो ज्येष्ठाय नमो दुन्दुभ्याय

नमस्सोमाय नम इरिण्याय द्रापे सहस्राण्येकादश॥11॥ नमस्ते रुद्र नमो भवाय द्रापे सप्तविंशतिः॥27॥ नमस्ते रुद्र

तद्यै जम्भे दधामि॥ हरिः ओम्॥ श्रीकृष्णार्पणमस्तु॥

॥ हरिः ओम्॥॥ तैत्तिरीयसंहिता चतुर्थकाण्डे पञ्चमः प्रश्नः॥

॥पञ्चमः प्रश्नः॥

॥तैत्तिरीयसंहितायां चतुर्थकाण्डे पञ्चमः प्रश्नः॥

हस्तै दिख्विष्वपं उभाभ्यां द्वाविंशतिश्च॥1॥

नमस्ते रुद्र मन्यव उतो त इषवे नमः। नमस्ते अस्तु
धन्वने बाहुभ्यामुत ते नमः। या त इषुः शिवतमा शिवम्बभूव
ते धनुः। शिवा शरव्या या तव तया नो रुद्र मृडया। या ते
रुद्र शिवा तनूरघोरापापकाशिनी। तया नस्तनुवा शतमया
गिरिशन्ताभि चाकशीहि। यामिषु गिरिशन्त हस्तै [1]

बिभर्ष्यस्तवे। शिवां गिरित्र तां कुरु मा हिंसीः पुरुषं
जगत्। शिवेन वचसा त्वा गिरिशाच्छा वदामसि। यथा
नः सर्वमिज्जगदयख्मः सुमना असत्। अध्यवोचदधिवक्ता
प्रथमो दैव्यो भिषक्। अहीश्च सर्वाञ्जम्भयन्त्सर्वाश्च
यातुधान्यः। असौ यस्ताम्रो अरुण उत बभ्रुः सुमङ्गलः। ये
चेमाः रुद्रा अभितो दिख्यु [2]

श्रिताः सहस्रशोऽवैषां हेडं ईमहे। असौ योऽवसर्पति
नीलग्रीवो विलोहितः। उत्तैनं गोपा अदृशन्नदृशन्नुदहार्यः।
उत्तैनं विश्वा भूतानि स दृष्टो मृडयाति नः। नमो अस्तु
नीलग्रीवाय सहस्राख्याय मीढुषे। अथो ये अस्य सत्त्वानोऽहं
तेभ्योऽकरं नमः। प्र मुञ्च धन्वंनस्त्वमुभयोरार्त्रियोज्याम्।
याश्च ते हस्त इषंवः [3]

परा ता भगवो वप। अवतत्य धनुस्त्वं सहस्राख्य
शतेषुधे। निशीर्य शल्यानाम्मुखा शिवो नः सुमना भव।
विज्यं धनुः कपर्दिनो विशल्यो बाणवां उत। अनैशन्नस्येषंव
आभुरस्य निषङ्गथिः। या ते हेतिर्मीढुष्टम हस्ते बभूव ते
धनुः। तयास्मान् विश्वतस्त्वमयख्यमया परि भुज। नमस्ते
अस्त्वायुधायानातताय धृष्णवे। उभाभ्यामुत ते नमो बाहुभ्यां
तव धन्वने। परि ते धन्वनो हेतिरस्मान्वृणक्तु विश्वतः। अथो
य इषुधिस्तवारे अस्मन्नि धेहि तम्॥ [4]

वनानाम्पतये नमो नम एकात्रिंशच्च॥2॥

नमो हिरण्यबाहवे सेनान्ये दिशां च पतये नमो
नमो वृखेभ्यो हरिकेशेभ्यः पशूनाम्पतये नमो नमः

स॒स्मिञ्ज॑राय॒ त्विषी॑मते पथी॒नाम्पत॑ये नमो॒ नमो॑ बभ्रु॒शाय॑
 वि॒व्याधि॑नेऽन्ना॒नाम्पत॑ये नमो॒ नमो॑ हरि॒केशा॑योपवी॒तिने॑
 पु॒ष्टाना॑म्पत॑ये नमो॒ नमो॑ भुव॒स्य हे॒त्यै जग॑ता॒म्पत॑ये
 नमो॒ नमो॑ रु॒द्राया॑तता॒विने॑ र॒खेत्रा॑णाम्पत॑ये नमो॒ नमः॑
 सू॒तायाह॑न्त्याय॒ वना॑ना॒म्पत॑ये नमो॒ नमः॑ [5]

रोहि॑ताय स्थ॒पत॑ये वृ॒ख्याणा॑म्पत॑ये नमो॒ नमो॑
 म॒न्त्रिणे॑ वाणि॒जाय॒ क॒ख्याणा॑म्पत॑ये नमो॒ नमो॑ भुव॒न्तये॑
 वा॒रिव॑स्कृ॒तायौष॑धीना॒म्पत॑ये नमो॒ नमः॑ उ॒च्चैर्घो॑षायाक्र॒न्दय॑ते
 प॒त्तीना॑म्पत॑ये नमो॒ नमः॑ कृ॒त्स्नवी॑ताय॒ धाव॑ते स॒त्वंना॑म्पत॑ये
 नमः॑॥ [6]

कुलु॒ञ्चाना॑म्पत॑ये नमो॒ नमो॑ऽश्व॒पति॑भ्य॒स्त्रीणि॑ च॥3॥

नमः॑ स॒हमा॑नाय नि॒व्याधि॑नं आ॒व्याधि॑नी॒नाम्पत॑ये नमो॒
 नमः॑ ककु॒भाय॑ निष॒ङ्गिणे॑ स्ते॒नाना॑म्पत॑ये नमो॒ नमो॑ निष॒ङ्गिण॑
 इषु॑धि॒मते॑ तस्करा॒णाम्पत॑ये नमो॒ नमो॑ व॒ञ्चते॑ परि॒वञ्चते॑
 स्तायू॑नाम्पत॑ये नमो॒ नमो॑ नि॒चेर॑वे परि॒चरा॑यार॒ण्याना॑म्पत॑ये
 नमो॒ नमः॑ सू॒कावि॑भ्यो जिघा॑ःस॒द्भ्यो मु॒ष्णता॑म्पत॑ये नमो॒
 नमो॑ऽसि॒मद्भ्यो॑ नक्तं॑ चर॑द्भ्यः प्रकृ॒न्ताना॑म्पत॑ये नमो॒ नमः॑

उष्णीषिणे गिरिचराय कुलुश्चानाम्पतये नमो नमः [7]

इषुमद्भ्यो धन्वाविभ्यश्च वो नमो नम आतन्वानेभ्यः
प्रतिदधानेभ्यश्च वो नमो नम आयच्छद्भ्यो विसृजद्भ्यश्च वो
नमो नमोऽस्यद्भ्यो विध्यद्भ्यश्च वो नमो नम आसीनेभ्यः
शयानेभ्यश्च वो नमो नमः स्वपद्भ्यो जाग्रद्भ्यश्च वो नमो
नमस्तिष्ठद्भ्यो धावद्भ्यश्च वो नमो नमः सभाभ्यः सभापतिभ्यश्च
वो नमो नमो अश्वेभ्योऽश्वपतिभ्यश्च वो नमः॥ [8]

रथेभ्यः श्वपतिभ्यश्च द्वे च॥4॥

नम आव्याधिनीभ्यो विविध्यन्तीभ्यश्च वो नमो
नम उगणाभ्यस्तृहतीभ्यश्च वो नमो नमो गृथ्सेभ्यो
गृथ्सपतिभ्यश्च वो नमो नमो व्रातेभ्यो व्रातपतिभ्यश्च वो
नमो नमो गुणेभ्यो गुणपतिभ्यश्च वो नमो नमो विरूपेभ्यो
विश्वरूपेभ्यश्च वो नमो नमो महद्भ्यः ख्युल्लकेभ्यश्च वो नमो
नमो रथिभ्योऽरथेभ्यश्च वो नमो नमो रथेभ्यः [9]

रथपतिभ्यश्च वो नमो नमः सेनाभ्यः सेनानिभ्यश्च वो
नमो नमः ख्यत्तृभ्यः संग्रहीतृभ्यश्च वो नमो नमस्तख्यभ्यो
रथकारेभ्यश्च वो नमो नमः कुलालेभ्यः कर्मरिभ्यश्च वो

नमो॒ नमः॑ पु॒ञ्जिष्टै॑भ्यो निषा॒देभ्य॑श्च वो॒ नमो॒ नमः॑ इषु॒कृद्भ्यो॑
धन्व॒कृद्भ्य॑श्च वो॒ नमो॒ नमो॑ मृ॒गयु॑भ्यः श्व॒निभ्य॑श्च वो॒ नमो॒ नमः॑
श्व॒भ्यः श्व॑प॒तिभ्य॑श्च वो॒ नमः॑॥ [10]

संवृ॑ध्वने च पञ्च॑विंशतिश्च॥5॥

नमो॑ भ॒वाय॑ च रु॒द्राय॑ च नमः॑ श॒र्वाय॑ च पशु॑पत॒ये च॒ नमो॒
नील॑ग्रीवाय च शि॒ति॒कण्ठा॑य च नमः॑ क॒पर्दि॑ने च व्यु॒त्त॒केशा॑य
च नमः॑ सह॒स्रा॒ख्याय॑ च श॒तध॑न्वने च नमो॑ गि॒रि॒शाय॑ च
शि॒पि॒वि॒ष्टाय॑ च नमो॑ मी॒ढुष्ट॑माय च॒ षु॒मते॑ च नमो॑ ह॒स्वाय॑
च वा॒म॒नाय॑ च नमो॑ बृ॒हते॑ च व॒र्षी॑यसे च नमो॑ वृ॒द्धाय॑ च
संवृ॑ध्वने च [11]

नमो॑ अ॒ग्रि॒याय॑ च प्रथ॒माय॑ च नमः॑ आ॒शवे॑ चाजि॒राय॑ च
नमः॑ शी॒घ्रि॒याय॑ च शी॒भ्याय॑ च नमः॑ ऊ॒र्म्या॑य चाव॒स्व॒न्याय॑
च नमः॑ स्रो॒त॒स्याय॑ च द्वा॒िप्या॑य च॥ [12]

प्रति॑श्रवाय च पञ्च॑विंशतिश्च॥6॥

नमो॑ ज्ये॒ष्ठाय॑ च क॒नि॒ष्ठाय॑ च नमः॑ पू॒र्वजा॑य चाप॒र्जाय॑ च
नमो॑ मध्य॒माय॑ चाप॒ग॒ल्भाय॑ च नमो॑ जघ॒न्याय॑ च बु॒ध्रि॒याय॑
च नमः॑ सो॒भ्याय॑ च प्र॒ति॒स॒र्याय॑ च नमो॑ या॒म्याय॑ च र॒खे॒म्याय॑

च नम उर्वर्याय च खल्याय च नमः श्लोक्याय चावसान्याय
 च नमो वन्याय च कख्याय च नमः श्रवाय च प्रतिश्रवाय
 च [13]

नम आशुषेणाय चाशुरथाय च नमः शूराय चावभिन्दते
 च नमो वर्मिणे च वरूथिने च नमो बिल्मिने च कवचिने
 च नमः श्रुताय च श्रुतसेनाय च॥ [14]

वैशन्ताय च त्रिंशच्च॥ 7॥

नमो दुन्दुभ्याय चाहनन्याय च नमो धृष्णवे च प्रमृशाय
 च नमो दूताय च प्रहिताय च नमो निषङ्गिणे चेषुधिमतै च
 नमस्तीरख्णेषवे चायुधिने च नमः स्वायुधाय च सुधन्वने च
 नमः स्रुत्याय च पथ्याय च नमः काट्याय च नीप्याय च
 नमः सूद्याय च सरस्याय च नमो नाद्याय च वैशन्ताय च
 [15]

नमः कूप्याय चावट्याय च नमो वर्ष्याय चावर्ष्याय च
 नमो मेघ्याय च विद्युत्याय च नम ईध्रियाय चातप्याय च
 नमो वात्याय च रेष्मियाय च नमो वास्तव्याय च वास्तुपाय
 च॥ [16]

शिवतराय च त्रिंशच्च॥8॥

नमः सोमाय च रुद्राय च नमस्ताम्राय चारुणाय च नमः
 शङ्गाय च पशुपतये च नम उग्राय च भीमाय च नमो
 अग्रेवधाय च दूरेवधाय च नमो हृन्ने च हनीयसे च नमो
 वृख्येभ्यो हरिकेशेभ्यो नमस्ताराय नमः शम्भवे च मयोभवे च
 नमः शंकराय च मयस्कराय च नमः शिवाय च शिवतराय
 च [17]

नमस्तीर्थ्याय च कूल्याय च नमः पार्याय चावार्याय च
 नमः प्रतरणाय चोत्तरणाय च नम आतार्याय चालाद्याय च
 नमः शष्प्याय च फेन्याय च नमः सिकत्याय च प्रवाह्याय
 च॥ [18]

उलप्याय च त्रयस्त्रिंशच्च॥9॥

नम इरिण्याय च प्रपथ्याय च नमः किंशिलाय च
 रष्यणाय च नमः कपर्दिने च पुलस्तये च नमो गोष्प्याय
 च गृह्याय च नमस्तल्प्याय च गेह्याय च नमः काट्याय
 च गह्वरेष्ठाय च नमो हृदय्याय च निवेष्ट्याय च नमः
 पांसव्याय च रजस्याय च नमः शुष्क्याय च हरित्याय च

नमो लोप्याय चोलप्याय च [19]

नम ऊर्व्याय च सूर्म्याय च नमः पुर्ण्याय च पर्णशद्याय
च नमोऽपगुरमाणाय चाभिघ्नते च नम आक्खिदते च
प्रक्खिदते च नमो वः किरिकेभ्यो देवानां हृदयेभ्यो नमो
विखीणकेभ्यो नमो विचिन्वत्केभ्यो नम अनिर्हतेभ्यो नम
आमीवत्केभ्यः॥ [20]

अस्मि३ स्तनुवः स्तुहि पिनाकमेकाग्रत्रि९शब्॥10॥

द्रापे अन्धसस्पते दरिद्रनीललोहित। एषाम्पुरुषाणामेषाम्पशू
भेर्मारो मो एषां किं चनाममत्। या ते रुद्र शिवा तनूः शिवा
विश्वाहभेषजी। शिवा रुद्रस्य भेषजी तया नो मृड जीवसे।
इमां रुद्राय तवसे कपर्दिने ख्यद्वीराय प्र भ्रामहे
मतिम्। यथा नः शमसद्विपदे चतुष्पदे विश्वम्पुष्टम्ग्रामे
अस्मिन् [21]

अनातुरम्। मृडा नो रुद्रोत नो मयस्कृधि ख्यद्वीराय
नमसा विधेम ते। यच्छं च योश्च मनुरायजे पिता तदश्याम
तव रुद्र प्रणीतौ। मा नो महान्तमुत मा नो अर्भकम्मा
न उख्यन्तमुत मा न उख्यितम्। मा नो वधीः पितरम्मोत

मातरं॑मि॒या मा न॑स्त॒नुवः॑ [22]

रु॒द्र री॒रिषः॑। मा न॑स्तो॒के तन॑ये मा न॒ आयु॑षि मा नो॒
गोषु॑ मा नो॒ अश्वे॑षु रीरिषः। वी॒रान्मा नो॑ रु॒द्र भामि॑तो
व॑धी॒र्हविष्म॑न्तो नम॑सा विधेम ते। आ॒रात्ते गो॑घ्न उ॒त पू॑रुष॒घ्ने
ख्य॑य॒द्वीरा॑य सु॒म्रम॑स्मे ते अस्तु। र॒ख्या च नो॒ अधि॑ च देव
ब्रू॒ह्यधा॑ च नः शर्म॑ यच्छ द्वि॒बर्हाः॑। स्तुहि [23]

श्रु॒तं गर्त॑सदं युवा॑नम्मृ॒गं न भी॑ममु॒पह॑तुमु॒ग्रम्। मृ॒डा
ज॑रि॒त्रे रु॒द्र स्तवा॑नो अ॒न्यं ते अ॒स्मन्नि व॑पन्तु सेनाः॑।
परि॑ णो रु॒द्रस्य॑ हे॒तिर्वृ॑णक्तु परि॑ त्वे॒षस्य॑ दु॒र्मति॑र॒घायोः॑।
अव॑ स्थि॒रा म॒घव॑द्भ्यस्तनुष्व॒ मी॒ढ्वस्तो॑काय॒ तन॑याय मृ॒डय॑।
मी॒ढुष्ट॑म॒ शिव॑तम शि॒वो नः॑ सु॒मना॑ भव। प॒रमे॑ वृ॒ख्य आयु॑धं
नि॒धाय॑ कृ॒त्तिं वसा॑न् आ च॑र॒ पिना॑कम् [24]

बिभ्र॑दा ग॒हि। वि॒कि॑रि॒द विलो॑हित॒ नम॑स्ते अस्तु भगवः।
यास्ते॑ स॒हस्र॑ हे॒तयो॑ऽन्यम॒स्मन्नि व॑पन्तु ताः। स॒हस्रा॑णि
सह॑स्र॒धा बा॑हुवोस्तव हे॒तयः॑। तासा॒मीशा॑नो भगवः प॒राची॑ना
मुखा॑ कृधि॥ [25]

सहस्राणि सहस्रशो ये रुद्रा अधि भूम्याम्। तेषां
 सहस्रयोजनेऽव धन्वानि तन्मसि। अस्मिन्महत्यर्णवेऽ-
 न्तरिख्ये भुवा अधि। नीलग्रीवाः शितिकण्ठाः शर्वा
 अधः ख्यमाचराः। नीलग्रीवाः शितिकण्ठा दिवः रुद्रा
 उपश्रिताः। ये वृख्येषु सस्पिञ्जरा नीलग्रीवा विलोहिताः।
 ये भूतानामधिपतयो विशिखासः कपर्दिनः। ये अन्नैषु
 विविध्यन्ति पात्रेषु पिबन्तो जनान्। ये पथाम्पथिरख्य
 ऐलबृदा यव्युधः। ये तीर्थानि [26]

प्रचरन्ति सूकावन्तो निषङ्गिणः। य एतावन्तश्च भूयांसश्च
 दिशो रुद्रा वितस्थिरे। तेषां सहस्रयोजनेऽव धन्वानि
 तन्मसि। नमो रुद्रेभ्यो ये पृथिव्यां येऽन्तरिख्ये ये दिवि
 येषामन्नं वातो वर्षमिषं वस्तेभ्यो दश प्राचीर्दश दक्षिणा
 दश प्रतीचीर्दशोदीचीर्दशोर्ध्वास्तेभ्यो नमस्ते नो मृडयन्तु ते
 यं द्विष्मो यश्च नो द्वेष्टि तं वो जम्भे दधामि॥ [27]

॥ हरिः ओम्॥ तैत्तिरीयसंहिता चतुर्थकाण्डे षष्ठः प्रश्नः॥

अश्मन् य इमोर्देनमाशुः प्राचीं जीमूतस्य यदक्रन्दो मा नो मित्रो ये वाजिनं नवं॥ 9॥ अश्मन्मनोयुजं

प्राचीमनु शर्म यच्छतु तेषामभिर्नूतिः षट्त्वारिंशत्। अश्मन् हविष्मान्॥ हरिः ओम्। श्रीकृष्णार्पणमस्तु॥

अश्मन् य इमोर्देनमाशुः प्राचीं जीमूतस्य यदक्रन्दो मा नो मित्रो ये वाजिनं नवं॥ 9॥ अश्मन्मनोयुजं
प्राचीमनु शर्म यच्छतु तेषामभिर्गूर्तिः षट्त्वारिंशत्। अश्मन् हविष्मान्॥ हरिः ओम्। श्रीकृष्णार्पणमस्तु॥

॥षष्ठमः प्रश्नः॥

॥तैत्तिरीयसंहितायां चतुर्थकाण्डे षष्ठमः प्रश्नः॥

उप देवान् वद्वाणदाश्चतुश्चत्वारिंशच्च॥ 1॥

अश्मन्तूर्जम्पर्वते शिश्रियाणां वाते पर्जन्ये वरुणस्य शुष्मे।
अद्ध्य ओषधीभ्यो वनस्पतिभ्योऽधि सम्भृतां तां न इषमूर्जं
धत्त मरुतः स॥रराणाः। अश्म॥स्ते ख्युदमुं ते शुगृच्छतु यं
द्विष्मः। समुद्रस्य त्वाऽवाकयाग्रे परि व्ययामसि। पावको
अस्मभ्य॥ शिवो भव। हिमस्य त्वा जरायुणाग्रे परि
व्ययामसि। पावको अस्मभ्य॥ शिवो भव। उप [1]

ज्मन्नुप वेतसेऽवन्तरं नदीष्वा। अग्रे पित्तमपामसि।
मण्डूकि ताभिरा गहि सेमं नो यज्ञम्। पावकवर्ण॥ शिवं
कृधि। पावक आ चितयन्त्या कृपा। ख्यामन्त्रुरुच उषसो
न भानुना। तूर्वन्न यामन्नेतशस्य नू रण आ यो घृणे।
न ततृषाणो अजरः। अग्रे पावक रोचिषा मन्द्रया देव
जिह्वया। आ देवान् [2]

व॒रिषि॒ यरिषि॑ च। स नः॑ पाव॒को दी॒दिवोऽग्रे॑ दे॒वाः इ॒हा
 व॒ह। उप॑ य॒ज्ञः ह॒विश्च॑ नः। अ॒पामि॑दं न्यय॑नः॒ समु॒द्रस्य॑
 नि॒वेश॑नम्। अ॒न्यं ते॑ अ॒स्मत्त॑पन्तु हे॒तयः॑ पाव॒को अ॒स्मभ्यः॑
 शि॒वो भ॑व। नम॑स्ते॒ हर॑से शो॒चिषे॑ नम॑स्ते अ॒स्त्व॒र्चिषे॑। अ॒न्यं
 ते॑ अ॒स्मत्त॑पन्तु हे॒तयः॑ पाव॒को अ॒स्मभ्यः॑ शि॒वो भ॑व। नृ॒षदे॒
 वट् [3]

अ॒प्सुष॑दे व॒ङ्गन॒सदे॒ वङ्ग॑र॒हिष॑दे वट्॒त्सु॑र्वि॒दि वट्। ये दे॒वा
 दे॒वानां॑ य॒ज्ञियां॑ य॒ज्ञिया॑नाः॒ संव॑त्स॒रीण॑मुप॑ भा॒गमा॑सते।
 अ॒हुता॑दो॒ ह॒विषो॑ य॒ज्ञे अ॒स्मिन्स्व॑यं जु॒हुध्व॑म्मधु॒नो घृ॑तस्य।
 ये दे॒वा दे॒वेष्व॑धि॑ दे॒वत्व॑माय॒न् ये ब्र॑ह्म॒णः पु॒र॒ए॒तारो॑ अ॒स्य।
 येभ्यो॑ न॒र्ते प॑व॒ते धाम॑ किं च॒न न ते॑ दि॒वो न पृ॑थि॒व्या अधि॑
 स्तु॒षु। प्रा॒णदाः [4]

अ॒पा॒न॒दा व्या॑न॒दाश्च॑र॒ष्पुर्दा॑ व॒र्चो॒दा व॑रि॒वो॒दाः। अ॒न्यं
 ते॑ अ॒स्मत्त॑पन्तु हे॒तयः॑ पाव॒को अ॒स्मभ्यः॑ शि॒वो भ॑व।
 अ॒ग्नि॒स्ति॒ग्मेन॑ शो॒चिषा॑ य॒ःस॒द्वि॒श्वं न्य॑त्रिणम्। अ॒ग्नि॒र्नो
 व॒सते॑ र॒यिम्। सै॒नानी॑केन सु॒वि॒दत्रो॑ अ॒स्मे य॑ष्टा॒ दे॒वाः
 आ॒य॑जिष्ठः स्व॒स्ति। अ॒द॒भ्यो गो॒पा उ॒त नः॑ प॒र॒स्पा अ॒ग्रे

द्युमदुत रेवदिदीहि॥ [5]

जुजानेनोषधीनां भूमिं जनयन्वृतये नमो नवं च॥ 2॥

य इ॒मा वि॒श्वा भुव॑नानि जुह्व॑दृषि॒र्होता॑ निष॒सादा॑ पि॒ता
नः॑। स आ॒शिषा॑ द्रवि॑णमिच्छ॒मानः॑ परम॒च्छदो॑ वर॒ आ
वि॑वेश। वि॒श्वक॑र्मा मन॑सा यद्विहा॑या धा॒ता वि॑धा॒ता पर॑मोत
स॒दृक्। तेषा॑मि॒ष्टानि॑ समि॒षा म॑दन्ति यत्र॑ सप्त॒र्षीन्प॒र
एक॑माहुः। यो नः॑ पि॒ता ज॑नि॒ता यो वि॑धा॒ता यो नः॑ स॒तो
अ॒भ्या स॒ज्ज॒जान॑। [6]

यो दे॒वानां॑ नाम॒धा एक॑ ए॒व त॑स्र॒ सम्प्र॑श्जम्भुव॑ना
यन्त्य॒न्या। त आय॑जन्त॒ द्रवि॑ण॒स्र॒ सम॑स्मा॒ ऋष॑यः
पूर्वे॑ जरि॒तारो॑ न भू॒ना। अ॒सूर्ता॑ सू॒र्ता रज॑सो वि॒माने॑
ये भू॒तानि॑ स॒मकृ॑ण्वन्नि॒मानि॑। न तं वि॑दाथ॒ य इ॒दं
ज॒जाना॑न्यद्युष्माक॒मन्तर॑म्भवाति। नी॒हारेण॑ प्रावृ॑ता जल्प्या
चासु॒तृप॑ उक्थ॒शास॑श्चरन्ति। प॒रो दि॒वा प॒र ए॒ना [7]

पृ॒थि॒व्या प॒रो दे॒वेभि॒रसु॑रैर्गुहा॒ यत्। क॑स्र॒ स्वि॒द्र॒र्भं प्रथ॑मं
द॒ध्र॒ आपो॑ यत्र॑ दे॒वाः स॒मग॑च्छन्त॒ विश्वे॑। तमि॒द्र॒र्भम्प्रथ॑मं
द॒ध्र॒ आपो॑ यत्र॑ दे॒वाः स॒मग॑च्छन्त॒ विश्वे॑। अ॒जस्य॑

नाभा॒व॒ध्ये॒क॒म॒र्पि॒त॒य्यँस्मि॒न्नि॒दं वि॒श्व॒म्भु॒व॒न॒- म॒धि श्रि॒तम्।
वि॒श्व॒क॒र्मा ह्य॒ज॒नि॒ष्ट दे॒व आ॒दि॒द्भ॒न्ध॒र्वो अ॒भव॒द्वि॒तीयः। तृ॒तीयः
पि॒ता ज॒नि॒तौष॑धीनाम् [8]

अपां॑ गर्भं॑ व्य॒दधा॑त्पुरु॒त्रा। च॒र॒ख्युषः॑ पि॒ता मन॑सा हि
धी॒रो घृ॒तमे॑ने अ॒ज॒न॒न्न॒न्माने॑। य॒दे॒दन्ता॑ अ॒द॒द॒हन्त॑
पूर्व॑ आ॒दि॒द्या॒वापृ॑थि॒वी अ॒प्र॒थेता॑म्। वि॒श्वत॑श्च॒र॒ख्युरु॑त
वि॒श्वतो॑मुखो वि॒श्वतो॑हस्त उ॒त वि॒श्वत॑स्पात्। सं बा॒हुभ्या॑
नम॑ति॒ सम्प॑त॒त्रैर्द्या॑वापृथि॒वी ज॒नय॑न्दे॒व एकः॑। कि॒ञ्चि॑
स्वि॒दासी॑दधि॒ष्ठान॑मा॒रम्भ॑णं क॒तम॑थि॒स्व॒त्किमा॑सीत्। यदी॒
भूमि॑ ज॒नय॑न् [9]

वि॒श्व॒क॒र्मा वि द्या॒मौर्णो॑न्महि॒ना वि॒श्वच॑र॒खाः। कि॒ञ्चि॑
स्वि॒द्वनं॑ क उ॒ स वृ॒ख्य आ॑सी॒द्यतो॑ द्या॒वापृ॑थि॒वी नि॑ष्टत॒ख्युः।
मनी॑षिणो॒ मन॑सा पृ॒च्छते॑दु तद्य॒दध्य॑ति॒ष्ठद्भु॑वनानि धा॒रय॑न्।
या ते॒ धामा॑नि प॒रमा॑णि याव॒मा या म॑ध्य॒मा वि॑श्वकर्मन्नु॒तेमा॑।
शि॒ख्या स॒खिभ्यो॑ ह॒विषि॑ स्वधा॒वः स्व॒यं य॑जस्व त॒नुवं
जुषा॑णः। वा॒चस्प॑तिं वि॒श्व॒क॒र्माण॑मू॒तये॑ [10]

म॒नो॒युजं॑ वा॒जे अ॒द्या हु॑वेम। स नो॒ नेदि॑ष्टा ह॒वनानि॑

जोषते विश्वशम्भूरवसे साधुकर्मा। विश्वकर्मन् हविषा
 वावृधानः स्वयं यजस्व तनुवं जुषाणः। मुह्यन्त्वन्ये
 अभितः सपत्ना इहास्माकम्मघवा सूरिरस्तु। विश्वकर्मन्
 हविषा वर्धनेन त्रातारमिन्द्रमकृणोरवध्यम्। तस्मै विश्वः
 समनमन्त पूर्वोरयमुग्रो विहव्यो यथासत्। समुद्राय वयुनाय
 सिन्धूनाम्पतये नमः। नदीनां सर्वासाम्पित्रे जुहुता
 विश्वकर्मणे विश्वाहामर्त्यं हविः॥ [11]

देवाः शतपया अभि वाजस्य षड्विंशतिश्च॥3॥

उदेनमुत्तरां नयाग्रे घृतेनाहुत। रायस्पोषेण सः सृज
 प्रजया च धनेन च। इन्द्रेमम्रतरां कृधि सजातानामसद्वशी।
 समेनं वर्चसा सृज देवेभ्यो भागधा असत्। यस्य कुर्मो
 हविर्गृहे तमग्रे वर्धया त्वम्। तस्मै देवा अधि ब्रवन्नयं च
 ब्रह्मणस्पतिः। उदु त्वा विश्वे देवाः [12]

अग्रे भरन्तु चित्तिभिः। स नो भव शिवतमः सुप्रतीको
 विभावसुः। पञ्च दिशो दैवीर्यज्ञमवन्तु देवीरपामतिं
 दुर्मतिम्बाधमानाः। रायस्पोषे यज्ञपतिमाभजन्तीः। रायस्पोषे
 अधि यज्ञो अस्थायसमिद्धे अग्नावधि मामहानः। उक्थपत्र

ई॒ड्यो॑ गृ॒भी॒तस्त॑प्तं घ॒र्म॒म्परि॑गृ॒ह्याय॑जन्त। ऊ॒र्जा॑ यद्य॒ज्ञम॑शमन्त
दे॒वा दै॒व्याय॑ ध॒र्त्रे जो॒ष्टे॑। दे॒व॒श्रीः श्री॑म॒णाः श॒तप॑याः [13]

परि॑गृ॒ह्य दे॒वा य॒ज्ञमा॑यन्। सूर्य॑र॒श्मिर्हरि॑केशः
पु॒रस्ता॑त्सवि॒ता ज्योति॑रु॒दया॑ꣳ अज॑स्रम्। तस्य॑ पू॒षा
प्र॒स॒वं या॑ति दे॒वः स॒म्पश्य॑न्वि॒श्वा भुव॑नानि गो॒पाः। दे॒वा
दे॒वेभ्यो॑ अध्व॒र्यन्तो॑ अ॒स्थुर्वी॑तꣳ श॒मित्रे॑ श॒मिता॑ य॒जध्यै॑।
तु॒रीयो॑ य॒ज्ञो यत्र॑ ह॒व्यमे॑ति॒ ततः॑ पाव॒का आ॒शिषो॑ नो
जुष॑न्ताम्। वि॒मानं॑ ए॒ष दि॒वो मध्य॑ आस्त आप॒प्रि॒वान्नो॑द॒सी
अ॒न्तरि॑र॒ख्यम्। स वि॒श्वाची॑र॒भि [14]

च॒ष्टे घृ॒ताची॑रन्त॒रा पूर्॒वम॑प॒रं च के॒तुम्। उ॒ख्या स॑मु॒द्रो
अ॒रु॒णः सु॑प॒र्णः पूर्॒वस्य॑ योनि॑म्पि॒तुरा वि॑वेश। मध्य॑ दि॒वो
निहि॑तः पृ॒श्नि॒रश्मा॑ वि च॒क्रमे॑ रज॑सः पा॒त्यन्तो॑। इन्द्रं॑ वि॒श्वा
अ॒वीवृ॑धन्समु॒द्रव्य॑चसं गि॒रः। र॒थी॒तमꣳ र॒थी॒नां वाजा॑नाꣳ
सत्प॑ति॒म्पति॑म्। सु॒म॒हूर्य॑ज्ञो दे॒वाꣳ आ च॑ व॒र॒ष्यद्य॑र॒ष्यदग्नि॑र्दे॒वो
दे॒वाꣳ आ च॑ व॒र॒ष्यत्। वाज॑स्य मा प्र॒स॒वेनो॑द्वा॒भेणो॑द॒ग्रभी॑त्।
अथा॑ स॒पत्नाꣳ इन्द्रो॑ मे नि॒ग्रा॒भेणा॑ध॒राꣳ अकः॑। उ॒द्वा॒भं च॑
नि॒ग्रा॒भं च॑ ब्र॒ह्म दे॒वा अ॑वीवृधन्। अथा॑ स॒पत्नानि॑न्द्रा॒ग्नी मे॑

विषूचीनान्व्यस्यताम्॥ [15]

दीया दायो जयन्त्वमित्रान् चत्वारिंशच्च॥ 4॥

आशुः शिशानो वृषभो न युध्मो घनाघनः
 रणोभणश्चरषणीनाम्। सङ्क्रन्दनोऽनिमिष एकवीरः शतं
 सेना अजयत्सकमिन्द्रः। संक्रन्दनेनानिमिषेण जिष्णुना
 युत्कारेण दुश्चवनेन धृष्णुना। तदिन्द्रेण जयत तत्सहध्वं
 युधो नर इषुहस्तेन वृष्णा। स इषुहस्तैः स निषङ्गिभिर्वशी
 सः स्रष्टा स युध इन्द्रो गुणेन। सः सृष्टिजिह्वसोमपा
 बाहुशर्ध्वधन्वा प्रतिहिताभिरस्ता। बृहस्पते परि दीय
 [16]

रथेन रणोहामित्रा अपबाधमानः। प्रभञ्जन्त्सेनाः
 प्रमृणो युधा जयन्त्रस्माकमेध्यविता रथानाम्। गोत्रभिदं
 गोविदं वज्रबाहुं जयन्तमज्मं प्रमृणन्तमोजसा। इमं
 सजाता अनु वीरयध्वमिन्द्रं सखायोऽनु सः रभध्वम्।
 बलविज्ञायः स्थविरः प्रवीरः सहस्वान् वाजी सहमान
 उग्रः। अभिवीरो अभिसत्वा सहोजा जैत्रमिन्द्र रथमा तिष्ठ
 गोवित्। अभि गोत्राणि सहसा गाहमानोऽदायः [17]

वीरः शतमन्युरिन्द्रः। दुश्श्रवणः पृतनापाडयुध्योऽस्माकं९
 सेना अवतु प्र युत्सु। इन्द्र आसां नेता बृहस्पतिर्दखिणा
 यज्ञः पुर एतु सोमः। देवसेनानामभिभञ्जतीनां
 जयन्तीनाम्मरुतो यन्त्वग्रे। इन्द्रस्य वृष्णो वरुणस्य राज्ञ
 आदित्यानाममरुता९ शर्ध उग्रम्। महामनसाम्भुवनच्यवानां
 घोषो देवानां जयतामुदस्थात्। अस्माकमिन्द्रः समृतेषु
 ध्वजेष्वस्माकं या इषवस्ता जयन्तु। [18]

अस्माकं वीरा उत्तरे भवन्त्वस्मानु देवा अवता हवेषु।
 उद्धर्षय मघवन्नायुधान्युत्सत्वंनाम्मामकानाम्महा९सि।
 उद्धृत्रहन्वाजिनां वाजिनान्युद्रथानां जयतामेतु घोषः। उप
 प्रेत जयता नरः स्थिरा वः सन्तु बाहवः। इन्द्रो वः
 शर्म यच्छत्वनाधृष्या यथासंथ। अवंसृष्टा परा पत शरव्ये
 ब्रह्मसंशिता। गच्छामित्रान्म्र [19]

विश मैषां कं चनोच्छिषः। मर्माणि ते वर्मभिश्छादयामि
 सोमस्त्वा राजामृतेनाभि वस्ताम्। उरोर्वरीयो वरिवस्ते अस्तु
 जयन्तं त्वामनु मदन्तु देवाः। यत्र बाणाः सम्पतन्ति कुमारा
 विशिखा इव। इन्द्रो नस्तत्र वृत्रहा विश्वाहा शर्म यच्छतु॥

[20]

अगा॑ सहस्रा॑क्ष दे॒वास्सहस्र॑धारा॒मत्य॑हा अनु॒वर्त्मानः॑ पोड॑श च॥ 5॥

प्राची॒मनु॑ प्र॒दिश॒म्प्रेहि॑ वि॒द्वान॒ग्नेर॑ग्ने पु॒रो अ॑ग्नि॒र्भवे॒ह।
 विश्वा॑ आ॒शा दी॒द्यानो॑ वि भा॒ह्यूर्ज॑ नो धेहि द्वि॒पदे॑
 चतु॑ष्पदे। क्रम॑ध्वम॒ग्निना॑ नाक॒मुख्य॑ ह॒स्तेषु॑ बिभ्र॑तः।
 दि॒वः पृ॒ष्ठ सु॒वर्ग॑त्वा मि॒श्रा दे॒वेभि॑राद्धम्। पृथि॒व्या
 अ॒हमु॒दन्तरि॑ख्य॒मारु॑हम॒न्तरि॑ख्या॒द्विव॑मारु॒हम्। दि॒वो
 नाक॑स्य पृ॒ष्ठात्सु॒वज्यो॑तिर॒गाम् [21]

अ॒हम्। सु॒व॒र्यन्तो॑ नापै॒ख्यन्त॑ आ द्या॑ रो॒हन्ति॑ रोद॑सी।
 य॒ज्ञं ये वि॒श्वतो॑धा॒र सु॒वि॒द्वा सो॒ विते॑निरे। अ॒ग्ने प्रेहि॑ प्रथ॒मो
 दे॒वय॑तां च॒ख्युर्दे॒वाना॑मु॒त म॒र्त्याना॑म्। इय॑ख्यमाणा भृ॒गुभिः॑
 स॒जोषाः॑ सु॒व॒र्यन्तु॑ यज॑मानाः स्व॒स्ति। न॒क्तोषा॑सा॒ सम॑नसा॒
 वि॒रूपे॑ धा॒पये॑ते शि॒शुमे॑क॒ समी॑ची। द्या॒वा ख्या॑मा रु॒क्मो
 अ॒न्तर्वि॑भा॒ति दे॒वा अ॒ग्निं धा॑रय॒न्द्रवि॑णो॒दाः। अ॒ग्ने स॒हस्रा॑ख्य
 [22]

श॒तमूर्ध॑ञ्छ॒तं ते॑ प्रा॒णाः स॒हस्र॑मपा॒नाः। त्व॑ सा॒हस्र॑स्य
 रा॒य ई॒शिषे॑ तस्मै॑ ते वि॒धेम॑ वाजा॑य॒ स्वाहा॑। सु॒पर्णो॑ऽसि

गुरु॒त्मान्पृ॒थिव्या॑ ५ सी॒द पृ॒ष्ठे पृ॒थिव्याः॑ सी॒द भा॒सान्तरि॑ख्य॒मा
 पृ॒ण ज्योति॑षा दि॒वमुत्त॑भान॒ तेज॑सा दि॒श उद्दृ॑ह।
 आ॒जुह्वा॑नः सु॒प्रती॑कः पु॒रस्ता॒दग्रे॑ स्वां योनि॒मा सी॒द सा॒ध्या।
 अ॒स्मिन्स॒धस्थे॑ अ॒ध्युत्तर॑स्मिन्वि॒श्वे दे॒वाः [23]

यज॑मानश्च सी॒दत। प्रे॒द्धो अ॒ग्रे दी॒दिहि॑ पु॒रो नोऽज॑स्रया
 सूर्या॑ यवि॒ष्ठ। त्वा॑ ५ शश्व॑न्त॒ उप॑ यन्ति॒ वाजाः॑।
 वि॒धेम॑ ते पर॒मे जन्म॑न्न॒ग्रे वि॒धेम॑ स्तोमै॒रवरे॑ स॒धस्थे॑।
 यस्मा॒द्योने॑रु॒दारि॑था॒ यजे॑ तम्प्र त्वे ह॒वीर्षि॑ जुहुरे॒ समि॑द्धे।
 ता॑ ५ स॒वितु॑र्वरे॒ण्यस्य॑ चि॒त्रामा॑हं वृ॒णे सुम॑तिं वि॒श्वज॑न्याम्।
 याम॑स्य॒ कण्वो॑ अ॒दुह॑त्प्रपी॒ना ५ स॒हस्र॑धाराम् [24]

पय॑सा म॒हीं गा॒म्। स॒प्त ते॑ अ॒ग्रे स॒मिधः॑ स॒प्त जि॒ह्वाः
 स॒प्तर्ष॑यः स॒प्त धाम॑ प्रि॒याणि॑। स॒प्त हो॒त्राः स॒प्तधा॑ त्वा॒ यज॑न्ति
 स॒प्त योनी॑रा पृ॒णस्वा घृ॑तेन॑। ई॒दृङ्ङा॑न्या॒दृङ्ङै॒तादृङ्ङं॑ प्रति॒दृङ्ङं॑
 मि॒तश्च॑ स॒म्मि॑तश्च॒ सभ॑राः। शु॒क्रज्यो॑तिश्च चि॒त्रज्यो॑तिश्च
 स॒त्यज्यो॑तिश्च॒ ज्योति॑ष्मा ५ स॒त्यश्च॑र्त॒पाश्चा॒त्य ५ हाः॑। [25]

ऋ॒तजि॑च्च॒ सत्य॑जिच्च॒ सेन॑जिच्च॒ सु॒षेण॑श्चान्त्य॒मित्र॑श्च
 दू॒रेअ॑मित्रश्च॒ गु॒णः। ऋ॒तश्च॑ स॒त्यश्च॑ ध्रु॒वश्च॑ ध॒रुण॑श्च ध॒र्ता च॑

विधु॒र्ता च॑ विधा॒रयः॑। ईदृ॒खांस॑ एता॒दृखांस॑ ऊ॒ षु णः॑
 स॒दृखांसः॑ प्र॒तिस॑दृखांस॒ एत॑न। मि॒तासं॑श्च स॒म्मिता॑सश्च
 न ऊ॒तये॑ सभ॒रसो॑ मरु॒तो य॒ज्ञे अ॒स्मिन्नि॒न्द्रं दै॒वीर्वि॑शो
 म॒रुतोऽनु॑व॒र्त्मानो॑ यथेन्द्रं दै॒वीर्वि॑शो म॒रुतोऽनु॑व॒र्त्मान॑ ए॒वमि॑मं
 यज॑मानं दै॒वींश्च॑ वि॒शो मा॒नुषी॑श्चानु॒वर्त्मानो॑ भवन्तु॥ [26]

धन्व॑न्महि॒मानं॑ ब्राह्म॑णा॒सोऽर्द॑तिः पृथि॒व्याः परि॑ दू॒रादे॑कच॒त्वारि॑श॒शब्द॑॥ 6॥

जी॒मूत॑स्येव भवति॒ प्रती॑कं यद्व॒र्मी या॑ति॒ सम॑दा॒मुप॑स्थे॑।
 अना॑वि॒द्धया॑ त॒नुवा॑ जय॒ त्व॑ स त्वा॒ वर्म॑णो म॒हिमा॑ पि॒प॑र्तु।
 धन्व॑ना॒ गा धन्व॑ना॒जिं ज॑येम॒ धन्व॑ना ती॒व्राः सम॑दो॒ जये॑म।
 धनुः॑ शत्रो॒रप॑का॒मं कृ॑णोति॒ धन्व॑ना॒ सर्वाः॑ प्र॒दिशो॑ जयेम।
 व॒र॒ख्यन्ती॑वे॒दा ग॑नी॒गन्ति॑ क॒र्णमि॑त्र॒य॑ सखा॒यम्प॑रिष॒स्वजा॑ना।
 योषे॑व शि॒ङ्गे वि॑त॒ताधि॑ धन्व॒न् [27]

ज्या इ॒य॑ स॒मने॑ पा॒रय॑न्ती। ते आ॒चर॑न्ती॒ सम॑ने॒व योषा॑
 मा॒ते॒व पु॒त्रम्बि॑भृ॒तामु॑पस्थे॑। अप॒ शत्र॑ न्वि॒ध्यता॑ संवि॒दाने॑
 आर्त्ता॑ इ॒मे वि॑ष्फु॒रन्ती॑ अ॒मित्रा॑न्। ब॒ह्वीना॑म्पि॒ता ब॒हुर॑स्य
 पु॒त्रश्चि॑श्चा कृ॑णोति॒ सम॑ना॒व॒गत्य॑। इ॒षुधिः॑ सङ्काः॒ पृ॒त॒नाश्च॑
 सर्वाः॑ पृ॒ष्ठे नि॑न॒द्धो ज॑यति॒ प्र॒सूतः॑। रथे॑ तिष्ठ॒न्नय॑ति वा॒जिनः॑

पुरो यत्रयत्र कामयते सुषारथिः। अभीशूनाम्महिमानम् [28]

पनायत मनः पश्चादनु यच्छन्ति रश्मयः। तीब्रान्धोषान्कृण्वते
वृषपाणयोऽश्वा रथेभिः सह वाजयन्तः। अवक्रामन्तः
प्रपदैरमित्रान्निष्पणन्ति शत्रून्पव्ययन्तः। रथवाहनं
हविरस्य नाम यत्रायुधं निहितमस्य वर्म। तत्रा रथमुप
शग्मं सदेम विश्वाहा वयं सुमनस्यमानाः। स्वादुषंसदः
पितरो वयोधाः कृच्छ्रेश्रितः शक्तीवन्तो गभीराः। चित्रसेना
इषुबला अमृध्राः सतोवीरा उरवो ब्रातसाहाः। ब्राह्मणासः
[29]

पितरः सोम्यासः शिवे नो द्यावापृथिवी अनेहसा। पूषा नः
पातु दुरितादृतावृधो रख्या माकिर्नो अघशंस ईशत। सुपूर्णं
वस्ते मृगो अस्या दन्तो गोभिः संनद्धा पतति प्रसूता। यत्रा
नरः सं च वि च द्रवन्ति तत्रास्मभ्यमिषवः शर्म यंसन्न।
ऋजीते परि वृद्धि नोऽश्मा भवतु नस्तनूः। सोमो अधि
ब्रवीतु नोऽदितिः [30]

शर्म यच्छतु। आ जङ्घन्ति सान्वेषां जुघना उप
जिघ्रते। अश्वाजनि प्रचेतसोऽश्वान्त्समत्सु चोदय। अहिरिव

भोगैः पर्येति बाहुं ज्यायां हेतिम्परिबाधमानः। हस्तघ्नो
 विश्वा वयुनानि विद्वान्पुमान्पुमांसम्परि पातु विश्वतः।
 वनस्पते वीड्वङ्गो हि भूया अस्मत्सखा प्रतरणः सुवीरः।
 गोभिः संनद्धो असि वीडयस्वास्थाता ते जयतु जेत्वानि।
 दिवः पृथिव्याः परि [31]

ओज उद्धृतं वनस्पतिभ्यः पर्याभृतं सहः।
 अपामोज्मानम्परि गोभिरावृतमिन्द्रस्य वज्रं हविषा
 रथं यज। इन्द्रस्य वज्रो मरुतामनीकम्मित्रस्य गर्भो
 वरुणस्य नाभिः। सेमां नो हव्यदातिं जुषाणो देव रथं प्रति
 हव्या गृभाय। उप श्वासय पृथिवीमुत द्याम्पुरुत्रा ते मनुतां
 विष्टितं जगत्। स दुन्दुभे सजूरिन्द्रेण देवैर्दूरात् [32]

दवीयो अपं सेधु शत्रून्। आ क्रन्दय बलमोजो न
 आ धा नि ष्ठनिहि दुरिता बाधमानः। अपं प्रोथ दुन्दुभे
 दुच्छुनां इत इन्द्रस्य मुष्टिरसि वीडयस्व। आमूरज
 प्रत्यावर्तयेमाः केतुमदुन्दुभिर्वावदीति। समश्वपर्णाश्चरन्ति नो
 नरोऽस्माकमिन्द्र रथिनो जयन्तु॥ [33]

यदक्रन्दः प्रथमं जायमान उद्यन्त्समुद्रादुत वा पुरीषात्।
 श्येनस्य पख्या हरिणस्य बाहू उपस्तुत्यम्महि जातं ते अर्वन्।
 यमेन दत्तं त्रित एनमायुनगिन्द्र एणम्प्रथमो अध्यतिष्ठत्।
 गन्धर्वो अस्य रशनामगृष्णात्सूरादश्वं वसवो निरतष्ट। असिं
 यमो अस्यादित्यो अर्वन्नसिं त्रितो गुह्येन व्रतेन। असिं सोमैः
 समया विपृक्तः [34]

आहुस्ते त्रीणि दिवि बन्धनानि। त्रीणि त आहुर्दिवि
 बन्धनानि त्रीण्यप्सु त्रीण्यन्तः समुद्रे। उतेवं मे
 वरुणश्छन्त्स्यर्वन् यत्रा त आहुः परमं जनित्रम्।
 इमा ते वाजिन्नवमार्जनानीमा शफानां सनितुर्निधानां।
 अत्रा ते भद्रा रशना अपश्यमृतस्य या अभिरखन्ति गोपाः।
 आत्मानं ते मनसारादजानामवो दिवा [35]

पुतयन्तम्पतंगम्। शिरो अपश्यम्पृथिभिः सुगेभिररेणुभिर्जेहम्
 अत्रा ते रूपमुत्तममपश्यं जिगीषमाणमिष आ पदे गोः।
 यदा ते मर्तो अनु भोगमानडादिद्वसिष्ठ ओषधीरजीगः।
 अनु त्वा रथो अनु मर्यो अर्वन्ननु गावोऽनु भगः कनीनाम्।
 अनु व्रातासस्तवं सख्यमीयुरनु देवा ममिरे वीर्यम् [36]

ते। हिरण्यशृङ्गोऽयौ अस्य पादा मनोजवा अवर् इन्द्र
 आसीत्। देवा इदस्य हविरद्यमायन् यो अर्वन्तम्प्रथमो
 अध्यतिष्ठत्। ईर्मान्तासुः सिलिकमध्यमासुः स९
 शूरणासो दिव्यासो अत्याः। ह९सा इव श्रेणिशो यतन्ते
 यदाखिषुर्दिव्यमज्ममश्वाः। तव शरीरम्पतयिष्णवर्वन्तव
 चित्तं वातं इव धर्जीमान्। तव शृङ्गाणि विष्टिता पुरुत्रारण्येषु
 जर्भुराणा चरन्ति। उप [37]

प्रागाच्छसनं वाज्यर्वा देवद्रीचा मनसा दीध्यानः। अजः
 पुरो नीयते नाभिरस्यानु पश्चात्क्वयो यन्ति रेभाः। उप
 प्रागात्परमं यत्सधस्थमर्वा९ अच्छा पितरम्मातरं च। अद्या
 देवाञ्जुष्टतमो हि गम्या अथा शास्ते दाशुषे वार्याणि॥ [38]

इदुतो ऋषिः त्रिपथस्त च॥ 8॥

मा नो मित्रो वरुणो अर्यमायुरिन्द्रं ऋभुख्या मरुतः
 परि ख्यन्। यद्वाजिनो देवजातस्य सप्तैः प्रवख्यामो विदथे
 वीर्याणि। यन्निर्णिजा रेक्णसा प्रावृतस्य रातिं गृभीताम्मुखतो
 नयन्ति। सुप्राङ्जो मेम्यद्विश्वरूप इन्द्रापूष्णोः प्रियमप्येति
 पाथः। एष च्छागः पुरो अश्वेन वाजिना पूष्णो भागो नीयते

वि॒श्वदे॑व्यः। अ॒भि॒प्रि॒यं यत्पु॑रोडाशमर्वता त्वष्टेत् [39]

ए॒न॒९ सौ॒श्र॒व॒साय॑ जि॒न्वति॑। यद्ध॒विष्य॑मृतुशो दे॒व्या॒नं
त्रि॒र्मा॒नु॒षाः पर्य॑श्वं नय॑न्ति। अत्रा॑ पू॒ष्णः प्र॑थ॒मो भा॒ग ए॑ति
य॒ज्ञं दे॒वेभ्यः॑ प्र॒तिवे॒दय॑न्न॒जः। हो॒ताध्व॑र्युराव॒या अ॒ग्नि॒मि॒न्धो
ग्रा॒व॒ग्रा॒भ उ॒त श॑स्ता सु॒वि॒प्रः। तेन॑ य॒ज्ञेन॑ स्वरं कृ॒तेन॑ स्वि॒ष्टेन॑
व॒र्ख॒णा आ॒ पृ॒णध्व॑म्। यू॒प॒व्र॒स्का उ॒त ये॒ यू॒प॒वा॒हाश्च॑षालं ये
अ॒श्व॒यू॒पाय॑ त॒र्ख॑न्ति। ये चा॒र्व॒ते प॑च॒न९ स॒म्भ॒र॑न्त्यु॒तो [40]

तेषा॑म॒भि॒गू॒र्तिर्न॑ इ॒न्वतु॑। उ॒प प्रा॒गा॒थ्सु॑म॒न्मेऽधा॒यि म॒न्मं
दे॒वा॒ना॒मा॒शा उ॒प वी॒तपृ॑ष्ठः। अ॒न्वे॒नं वि॒प्रा ऋ॑ष॒यो म॒दन्ति॑
दे॒वा॒ना॒म॒पु॒ष्टे च॑क॒मा सु॒ब॒न्धु॒म्। यद्वा॒जिनो॑ दा॒मं स॒दा॒न॒मर्व॑तो
या शी॒र्ष॒ण्या र॑श॒ना र॒ज्जु॑र॒स्य। यद्वा॒ घा॒स्य॑ प्र॒भृ॒त॒मा॒स्ये तृ॒ण९
स॒र्वा ता॒ ते अ॒पि दे॒वेष्व॑स्तु। यद॒श्व॑स्य ऋ॒विषः॑ [41]

म॒रिष्य॑का॒श यद्वा॒ स्व॒रौ स्व॒र्धितौ॑ रि॒प्तम॑स्ति।
यद्ध॒स्त॑योः श॒मि॒तु॒र्यन्न॑खेषु स॒र्वा ता॒ ते अ॒पि दे॒वेष्व॑स्तु।
यदू॒व॒ध्य॒मु॒दर॑स्याप॒वा॒ति य आ॒म॒स्य॑ ऋ॒विषो॑ ग॒न्धो अ॑स्ति।
सु॒कृ॒ता तच्छ॑मि॒तारः॑ कृ॒ण्वन्तू॒त मे॒ध९ शृ॒त॒पाकं॑ प॒चन्तु॑।
यत्ते॒ गा॒त्रा॒द॒ग्नि॒ना प॑च्यमा॒ना॒द॒भि शू॒लं नि॒ह॑तस्याव॒धाव॑ति।

मा तद्भूम्या॒मा श्रि॑ष॒न्मा तृ॑णेषु दे॒वेभ्य॒स्तदु॑श॒द्भ्यो रा॒तम॑स्तु॥
[42]

घासिं कशया तपद्रयि नवं च॥ 9॥

ये वा॒जिन॑म्परि॒पश्य॑न्ति प॒क्वं य ई॑मा॒हुः सु॒रभि॑र्नि॒रह॑रेति॑।
ये चा॒र्वतो॑ मा॒सभि॑ख्यामुपास॑त उ॒तो तेषा॑मभि॒गूर्ति॑र्न
इ॒न्वतु॑। यन्नी॒र्षण॑म्मा॒स्यच॑न्या उ॒खाया॒ या पा॒त्राणि॑ यू॒ष्ण
आ॒सेच॑नानि। ऊ॒ष्म॒ण्यापि॑धाना॑ च॒रूणा॑म॒ङ्गाः सू॒नाः परि॑
भूष॑न्त्यश्व॒म्। नि॒क्रम॑णं नि॒षद॑नं वि॒वर्त॑नं यच्च॒ प॒ङ्की॑शम॒र्वतः॑।
यच्च॑ प॒पौ यच्च॑ घा॒सिम् [43]

ज॒घास॑ सर्वा॒ ता ते॒ अपि॑ दे॒वेष्व॑स्तु। मा त्वा॒ग्नि॒ध्वन॑यिद्धूम॒गं नि॑
भ्राज॑न्त्य॒भि वि॑क्त॒ जघ्निः॑। इ॒ष्टं वी॑तम॒भिगूर्त॑ वष॒ट्कृतं॑ तं दे॒वासः॑
प्रति॑ गृ॒भ्णन्त्य॑श्व॒म्। यद॑श्वा॒य वा॑स॑ उप॒स्तृण॑न्त्य॒धीवा॑सं
या हि॒र॒ण्यान्य॑स्मै। सं॒दान॒मर्व॑न्त॒म्प॒ङ्की॑शमि॒या दे॒वेष्व॑
या॑मयन्ति। यत्ते॑ सा॒दे मह॑सा॒ शूकृ॑तस्य॒ पा॒र्ष्ण्या॑ वा॒ कश॑या
[44]

वा॒ तुतो॑द। सु॒चेव॒ ता ह॒विषो॑ अध्व॒रेषु॑ सर्वा॒ ता ते॒ ब्रह्म॑णा

सूदयामि। चतुस्त्रिंशद्वाजिनो देवबन्धोर्वङ्गीरश्वस्य स्वधितिः
 समेति। अच्छिद्रा गात्रा वयुना कृणोत परुषपरुनुघुष्या वि
 शस्त। एकस्त्वष्टुरश्वस्या विशस्ता द्वा यन्तारा भवतस्तथर्तुः।
 या ते गात्राणामृतुथा कृणोमि ताता पिण्डानाम्प्र जुहोम्यग्नौ।
 मा त्वा तपत् [45]

प्रिय आत्मापियन्तम्मा स्वधितिस्तनुव आ तिष्ठिपत्ते। मा
 ते गृधुरविशस्तातिहाय छिद्रा गात्राण्यसिना मिथू कः। न वा
 उ वेतन्म्रियसे न रिष्यसि देवा इदेषि पृथिभिः सुगेभिः।
 हरी ते युञ्जा पृषती अभूतामुपास्थाद्वाजी धुरि रासभस्य।
 सुगव्यं नो वाजी स्वश्वियम्पुंसः पुत्रा उत विश्वापुषं
 रयिम्। अनागास्त्वं नो अदितिः कृणोतु ख्वत्रं नो अश्वो
 वनता इविष्मान्॥ [46]

॥ हरिः ओम् ॥ तैत्तिरीयसंहिता चतुर्थकाण्डे सप्तमः प्रश्नः ॥

॥सप्तमः प्रश्नः॥

॥तैत्तिरीयसंहितायां चतुर्थकाण्डे सप्तमः प्रश्नः॥

अ॒ग्रा॒वि॒ष्णू॒ स॒जोष॑से॒मा वर्ध॑न्तु वा॒ं गिरः॑। द्यु॒मैर्वा॒जैर्भिरा॑ग॒तम्
वा॒जंश्च॑ मे प्र॒स॒वश्च॑ मे प्र॒य॒तिश्च॑ मे प्र॒सि॑तिश्च मे धी॒तिश्च॑
मे क्र॒तुश्च॑ मे स्वर॑श्च मे श्लो॒कश्च॑ मे श्रा॒वश्च॑ मे श्रु॒तिश्च॑ मे
ज्यो॒तिश्च॑ मे सु॒वश्च॑ मे प्रा॒णश्च॑ मेऽपानः [1]

च॒ मे व्या॒नश्च॑ मेऽसु॑श्च मे चि॒त्तं च॑ म॒ आधी॑तं च मे वाक्क्रं
मे मन॑श्च मे च॒ख्युश्च॑ मे श्रो॒त्रं च॑ मे द॒ख्यश्च॑ मे ब॒लं च॑ म॒
ओज॑श्च मे स॒हश्च॑ म॒ आयु॑श्च मे ज॒रा च॑ म॒ आ॒त्मा च॑ मे
त॒नूश्च॑ मे श॒र्म च॑ मे व॒र्म च॑ मेऽङ्गा॑नि च मेऽस्थानि॑ च मे
प॒रू॒षि च॑ मे शरी॑राणि च मे॥ [2]

जग॒च्चर्दि॑श्चतु॒र्दश॑ च॥2॥

ज्यै॒ष्ठ्यं च॑ म॒ आधि॑प॒त्यं च॑ मे म॒न्युश्च॑ मे भा॒मश्च॑ मेऽम॑श्च
मेऽम्भ॑श्च मे जे॒मा च॑ मे म॒हि॒मा च॑ मे व॒रि॒मा च॑ मे प्र॒थि॒मा
च॑ मे व॒र्ष्मा च॑ मे द्राघु॑या च॑ मे वृ॒द्धं च॑ मे वृ॒द्धिश्च॑ मे स॒त्यं
च॑ मे श्र॒द्धा च॑ मे जग॑च्च [3]

मे ध॒नं च॑ मे व॒शश्च॑ मे त्वि॒षिश्च॑ मे क्री॒डा च॑ मे मो॒दश्च॑
मे जा॒तं च॑ मे जनि॑ष्य॒माणं॑ च मे सू॒क्तं च॑ मे सु॒कृ॒तं च॑ मे
वि॒त्तं च॑ मे वे॒द्यं च॑ मे भू॒तं च॑ मे भवि॑ष्यच्च॒ मे सु॒गं च॑ मे

सुपथं च म ऋद्धं च म ऋद्धिश्च मे क्लृप्तं च मे क्लृप्तिश्च मे
मतिश्च मे सुमतिश्च मे॥ [4]

विश्वं च शयनमष्टौ च॥3॥

शं च मे मयश्च मे प्रियं च मेऽनुकामश्च मे कामश्च मे
सौमनसश्च मे भद्रं च मे श्रेयश्च मे वस्यश्च मे यशश्च मे
भगश्च मे द्रविणं च मे यन्ता च मे धर्ता च मे रत्नेमश्च मे
धृतिश्च मे विश्वं च [5]

मे महश्च मे संविच्च मे ज्ञात्रं च मे सूश्च मे प्रसूश्च मे सीरं
च मे लयश्च म ऋतं च मेऽमृतं च मेऽयस्व्यं च मेऽनामयच्च
मे जीवातुश्च मे दीर्घायुत्वं च मेऽनमित्रं च मेऽभयं च मे
सुगं च मे शयनं च मे सूषा च मे सुदिनं च मे॥ [6]

विभु च मसुराश्चतुर्दश च॥4॥

ऊर्क् मे सूनृतां च मे पयश्च मे रसश्च मे घृतं च मे मधुं
च मे सग्धिश्च मे सर्पीतिश्च मे कृषिश्च मे वृष्टिश्च मे जैत्रं च
म औद्भिद्यं च मे रयिश्च मे रायश्च मे पुष्टं च मे पुष्टिश्च मे
विभु च [7]

मे प्र॒भु च॑ मे ब॒हु च॑ मे भूय॑श्च मे पूर्ण॑ च॑ मे पूर्ण॑तरं
 च॒ मेऽखि॑तिश्च मे कूय॑वाश्च मेऽन्नं॑ च॒ मेऽख्यु॑च्च मे व्रीह॑यश्च
 मे यवा॑श्च मे माषा॑श्च मे तिला॑श्च मे मुद्गा॑श्च मे खल्वा॑श्च मे
 गोधू॑माश्च मे म॒सुरा॑श्च मे प्रि॒यंग॑वश्च मेऽण॑वश्च मे श्या॒माका॑श्च
 मे नी॒वारा॑श्च मे॥ [8]

कृष्टप॒च्यश्चाष्टा॑च॒त्वारि॑शब्॥5॥

अश्मा॑ च॒ मे मृ॒त्तिका॑ च॒ मे गि॒रय॑श्च मे पर्व॑ताश्च मे
 सिक्ता॑श्च मे वन॒स्पत॑यश्च मे हि॒रण्यं॑ च॒ मेऽय॑श्च मे सीसं॑
 च॒ मे त्रपु॑श्च मे श्या॒मं च॑ मे लो॒हं च॑ मेऽग्नि॑श्च म॒ आप॑श्च मे
 वी॒रुध॑श्च म॒ ओष॑धयश्च मे कृष्टप॒च्यं च॑ [9]

मेऽकृष्टप॒च्यं च॑ मे ग्रा॒म्याश्च॑ मे प॒शव॑ आ॒रण्या॑श्च य॒ज्ञेन॑
 कल्प॑न्ता॒व्वित्तं॑ च॒ मे वि॒त्तिश्च॑ मे भू॒तं च॑ मे भू॒तिश्च॑ मे वसु॑
 च॒ मे वस॑तिश्च॒ मे कर्म॑ च॒ मे शक्ति॑श्च मेऽर्थ॑श्च म॒ एम॑श्च म॒
 इति॑श्च मे गति॑श्च मे॥ [10]

त्वष्टा॑ च॒ द्यौश्च॑ म॒ एक॑वि॒शति॑श्च॥6॥

अ॒ग्निश्च॑ म॒ इन्द्र॑श्च मे सोम॑श्च म॒ इन्द्र॑श्च मे सवि॒ता च॑ म॒
 इन्द्र॑श्च मे सर॑स्वती च॒ म॒ इन्द्र॑श्च मे पू॒षा च॑ म॒ इन्द्र॑श्च मे

बृहस्पतिश्च म् इन्द्रश्च मे मित्रश्च म् इन्द्रश्च मे वरुणश्च म्
इन्द्रश्च मे त्वष्टा च [11]

म् इन्द्रश्च मे धाता च म् इन्द्रश्च मे विष्णुश्च म् इन्द्रश्च
मेऽश्विनौ च म् इन्द्रश्च मे मरुतश्च म् इन्द्रश्च मे विश्वे च
मे देवा इन्द्रश्च मे पृथिवी च म् इन्द्रश्च मेऽन्तरिक्षश्च म्
इन्द्रश्च मे द्यौश्च म् इन्द्रश्च मे दिशश्च म् इन्द्रश्च मे मूर्धा च
म् इन्द्रश्च मे प्रजापतिश्च म् इन्द्रश्च मे॥ [12]

ऋतुग्रहाश्च चतुस्त्रिंशच्च॥ 7॥

अ॒श्नुश्च॑ मे र॒श्मिश्च॑ मेऽदा॑भ्यश्च॒ मेऽधि॑पतिश्च म
उपा॒श्नुश्च॑ मेऽन्तर्या॑मश्च॒ म ऐन्द्र॑वाय॒वश्च॑ मे मैत्रावरु॑णश्च॒
म आ॒श्विनश्च॑ मे प्रतिप्र॒स्थान॑श्च मे शुक्र॑श्च मे म॒न्थी च॑
म आग्र॑यणश्च॒ मे वैश्वदे॑वश्च॒ मे ध्रु॒वश्च॑ मे वैश्वान॑रश्च॒ म
ऋतु॑ग्रहाश्च॒ [13]

मेऽति॑ग्राह्या॑श्च म ऐन्द्रा॑ग्रश्च॒ मे वैश्वदे॑वश्च॒ मे मरु॑त्वतीया॑श्च
मे माहेन्द्र॑श्च॒ म आदित्य॑श्च॒ मे सावि॑त्रश्च॒ मे सार॑स्वतश्च॒ मे
पौष्ण॑श्च॒ मे पाली॑व॒तश्च॑ मे हारि॑योज॒नश्च॑ मे॥ [14]

गृहाश्च षोडश च॥ 8॥

इ॒ध्मश्च॑ मे ब॒र्हिश्च॑ मे वेदि॑श्च मे धि॒ष्णि॒याश्च॑ मे सु॒च॑श्च मे
 चम॒साश्च॑ मे ग्रावा॑णश्च मे स्वर॑वश्च म उप॒र॒वाश्च॑ मेऽधि॒ष॒व॑णे च
 मे द्रोण॑कल॒शश्च॑ मे वाय॒व्या॑नि च मे पू॒त॒भृ॒च्च॑ म आ॒ध॒व॒नीय॑श्च
 म आ॒ग्नी॑ध्रं च मे ह॒वि॒र्धानं॑ च मे गृ॒हाश्च॑ मे स॒द॑श्च मे
 पु॒रो॒डा॒शा॑श्च मे प॒च॒ताश्च॑ मेऽव॒भृ॒थश्च॑ मे स्व॒गाका॒रश्च॑ मे॥
 [15]

दी॒ख्याऽष्टा॑दश च॥9॥

अ॒ग्निश्च॑ मे घ॒र्मश्च॑ मेऽर्क॑श्च मे सू॒र्यश्च॑ मे प्रा॒णश्च॑ मेऽश्व॑मे॒धश्च॑
 मे पृ॒थि॒वी च॑ मेऽदि॑तिश्च मे दि॒तिश्च॑ मे द्यौश्च॑ मे श॒क्र॒री॒र॒ङ्गु॒ल॒यो॒
 दि॒शश्च॑ मे य॒ज्ञेन॑ क॒ल्प॒न्ता॒मृ॒क्क॑ मे सा॒मं च॑ मे स्तो॒मंश्च॑
 मे य॒जु॑श्च मे दी॒क्षा च॑ मे त॒प॑श्च म ऋ॒तुश्च॑ मे व्र॒तं च॑
 मेऽहो॒रा॒त्रयो॑र्वृ॒ष्ट्या बृ॑ह॒द्रथ॑न्त॒रे च॑ मे य॒ज्ञेन॑ क॒ल्पे॒ताम्॥ [16]

ऋ॒ष॒भश्च॑ च॒त्वारि॒॑ंश॒च्च॥10॥

ग॒र्भाश्च॑ मे व॒त्साश्च॑ मे त्र्य॒वि॑श्च मे त्र्य॒वी च॑ मे दि॒त्य॒वा॒द्भ॑
 मे दि॒त्यौ॒ही च॑ मे प॒ञ्चा॒वि॑श्च मे प॒ञ्चा॒वी च॑ मे त्रि॒व॒त्स॑श्च मे
 त्रि॒व॒त्सा च॑ मे तु॒र्य॒वा॒द्भ॑ मे तु॒र्यौ॒ही च॑ मे प॒ष्ठ॒वा॒च्च॑ मे प॒ष्ठौ॒ही
 च॑ म उ॒र॒क्षा च॑ मे व॒शा च॑ म ऋ॒ष॒भश्च॑ [17]

मे वेहच्चमेऽनुद्वाञ्च मे धेनुश्च म आयुर्यज्ञेन कल्पताम्प्राणो
 यज्ञेन कल्पतामपानो यज्ञेन कल्पताव्याँनो यज्ञेन
 कल्पताश्चख्युर्यज्ञेन कल्पता९ श्रोत्रं यज्ञेन कल्पताम्मनो
 यज्ञेन कल्पताव्वाँग्यज्ञेन कल्पतामात्मा यज्ञेन कल्पताय्यँज्ञो
 यज्ञेन कल्पताम्॥ [18]

त्रयस्त्रिंशच्च व्यश्निय एकादश च॥11॥

एका च मे तिस्रश्च मे पञ्च च मे सप्त च मे नव च
 म एकादश च मे त्रयोदश च मे पञ्चदश च मे सप्तदश
 च मे नवदश च म एकविंशतिश्च मे त्रयोविंशतिश्च
 मे पञ्चविंशतिश्च मे सप्तविंशतिश्च मे नवविंशतिश्च म
 एकत्रिंशच्च मे त्रयस्त्रिंशच्च [19]

मे चतस्रश्च मेऽष्टौ च मे द्वादश च मे षोडश च
 मे विंशतिश्च मे चतुर्विंशतिश्च मेऽष्टाविंशतिश्च
 मे द्वात्रिंशच्च मे षट्त्रिंशच्च मे चत्वारिंशच्च
 मे चतुश्चत्वारिंशच्च मेऽष्टाचत्वारिंशच्च मे वाजंश्च
 प्रसवश्चापिजश्च ऋतुश्च सुवश्च मूर्धा च व्यश्नियश्चान्त्यायनश्चान्त्यं
 भौवनश्च भुवनश्चाधिपतिश्च॥ [20]

धनेष्वपो दुर्वस्वाञ्छुभूमयोभूरभि मा द्वे च॥12॥

वाजो नः सप्त प्रदिशश्चतस्रो वा परावतः। वाजो नो
विश्वेर्देवैर्धनं साताविहावतु। विश्वे अद्य मरुतो विश्वं ऊती
विश्वे भवन्त्वग्नयः समिद्धाः। विश्वे नो देवा अवसा गमन्तु
विश्वमस्तु द्रविणं वाजो अस्मे। वाजस्य प्रसवं देवा
रथैर्याता हिरण्ययैः। अग्निरिन्द्रो बृहस्पतिर्मरुतः सोमपीतये।
वाजेवाजेऽवत वाजिनो नो धनेषु [21]

विप्रा अमृता ऋतज्ञाः। अस्य मध्वः पिबत मादयध्वं तृप्ता
यांत पृथिभिर्देवयानैः। वाजः पुरस्तादुत मध्यतो नो वाजो
देवाः ऋतुभिः कल्पयाति। वाजस्य हि प्रसवो ननमीति
विश्वा आशा वाजपतिर्भवेयम्। पयः पृथिव्यामप्य ओषधीषु
पयो दिव्यन्तरिख्ये पयो धाम्। पयस्वतीः प्रदिशः सन्तु
मह्यम्। सम्मा सृजामि पयसा घृतेन सम्मा सृजाम्यपः
[22]

ओषधीभिः। सौऽहं वाजः सनेयमग्ने। नक्तोषासा
समनसा विरूपे धापयेते शिशुमेकः समीची। द्यावा
ख्यामा रुक्मो अन्तर्वि भाति देवा अग्निं धारयन्द्रविणोदाः।

समुद्रोऽसि नभस्वानार्द्रदानुः शम्भूर्मयोभूरभि मा वाहि
 स्वाहा मारुतोऽसि मरुता गणः शम्भूर्मयोभूरभि मा वाहि
 स्वाहावस्युरसि दुवस्वाञ्छम्भूर्मयोभूरभि मा वाहि स्वाहा॥
 [23]

ध्रुवः सूत्रङ्कुण्ठे यस्सप्तत्रिंशच्च॥13॥

अग्निं युनज्मि शवसा घृतेन दिव्यं सुपर्णं वयसा
 बृहन्तम्। तेन वयम्पतेम ब्रध्नस्य विष्टपं सुवो रुहाणा
 अधि नाकं उत्तमे। इमौ ते पृष्ठावजरौ पतत्रिणो याभ्यां
 रख्यांस्यपहंस्यग्ने। ताभ्याम्पतेम सुकृतां लोके
 यत्रर्षयः प्रथमजा ये पुराणाः। चिदसि समुद्रयोनिरिन्दुर्दखः
 श्येन ऋतावा। हिरण्यपखः शकुनो भुरण्युर्महान्धस्थे
 ध्रुवः [24]

आ निषत्तः। नमस्ते अस्तु मा मा हिंसीर्विश्वस्य
 मूर्धन्नधि तिष्ठसि श्रितः। समुद्रे ते हृदयमन्तरायुर्द्यावापृथिवी
 भुवनेष्वर्पिते। उद्रो दत्तोदधिभिन्त दिवः पर्जन्यादन्तरिक्षात्पृथि
 नो वृष्ट्यावत। दिवो मूर्धासि पृथिव्या नाभिरूर्गपामोषधीनाम्।
 विश्वायुः शर्म सप्रथा नमस्पथे। येनर्षयस्तपसा सूत्रम्

[25]

आस॒तेन्धा॒ना अ॒ग्निः सु॒वरा॒भर॑न्तः। तस्मि॑न्न॒हं नि द॑धे
नाकै॑ अ॒ग्निमे॒तं यमा॒हुर्म॑नवः स्ती॒र्णब॑र्हिषम्। तम्प॒त्नीभि॑रनु
गच्छे॑म दे॒वाः पु॒त्रैर्भ्रा॑तृभि॒रुत वा॑ हि॒रण्यैः। नाकं॑ गृह्णा॒नाः
सु॒कृत॑स्य॒ लो॒के तृ॒तीये॑ पृ॒ष्ठे अ॒धि रो॑च॒ने दि॒वः। आ वा॒चो
मध्य॑मरुहद्भुर॒ण्युर॒यम॒ग्निः सत्प॑तिश्चेकि॒तानः। पृ॒ष्ठे पृ॑थि॒व्या
निहि॑तो दवि॒द्युत॑दधस्प॒दं कृ॑णुते [26]

ये पृ॑त॒न्यवः॑। अ॒यम॒ग्निर्वी॑रत॒मो वयो॑धाः स॒हस्रि॑यो
दी॒प्यता॑मप्रयुच्छन्। वि॒भ्राज॑मानः सरि॒रस्य॑ मध्य॒ उप॒ प्र
या॑त दि॒व्यानि॒ धाम॑। सम्प्र च्य॑वध्व॒मनु॒ सम्प्र या॑ताग्ने॒ पथो॑
दे॒व्याना॑न्कृणुध्वम्। अ॒स्मिन्स॒धस्थे॑ अ॒ध्युत्तर॑स्मिन्विश्वे॒ देवा॑
यज॑मानश्च सीदत। येना॑ स॒हस्रं॑ वह॑सि॒ येना॑ग्ने सर्ववेद॒सम्।
तेने॒मं य॒ज्ञं नो॑ वह॒ देव॒यानो॒ यः [27]

उ॒त्तमः॑। उ॒द्ध्व्यस्वा॒ग्ने प्र॒ति जा॒गृह्ये॑नमिष्टापूर्ते
स॒सृ॑जेथाम॒यं च॑। पुनः॑ कृ॒ण्वः स्त्वा॑ पि॒तरं॑ युवा॒नम॒न्वाता॑सीत्
त्वयि॑ तन्तु॒मेत॑म्। अ॒यं ते॒ योनि॑र्ऋ॒त्वियो॒ यतो॑ जा॒तो
अ॒रोच॑थाः। तं जा॒नन्न॑ग्र॒ आ रो॒हाथा॑ नो वर्ध॒या र॒यिम्॥

[28]

वनिषन्तु पुरस्तान्मा त्रिचत्वारिंशच्च॥14॥

ममा॑ग्रे॒ वर्चो॑ वि॒ह्वेष्व॑स्तु व॒यं त्वे॒न्धा॑नास्त॒नुव॑म्पुषेम।
मह्यं॑ नमन्ताम्प्रदि॒शश्च॑त॒स्रस्त्वया॑ध्य॒ख्येण॑ पृ॒त॑ना जयेम।
मम॑ दे॒वा वि॒ह्वे स॑न्तु॒ सर्व॑ इन्द्रा॑वन्तो म॒रुतो॑ विष्णु॑र॒ग्निः।
ममा॑न्तरि॒ख्यमुरु॑ गो॒पम॑स्तु॒ मह्यं॑ वा॒तः प॑वतां॒ कामे॑ अ॒स्मिन्।
मयि॑ दे॒वा द्रवि॑ण॒मा य॑जन्ता॒म्मय्या॑शीर॑स्तु॒ मयि॑ दे॒वहू॑तिः।
दैव्या॑ होता॑रा वनिषन्त [29]

पूर्वे॑ऽरि॒ष्टाः स्याम॑ त॒नुवा॑ सु॒वीराः॑। मह्यं॑ यजन्तु॒ मम॑
या॒नि ह॒व्याकू॑तिः स॒त्या मन॑सो मे अस्तु। ए॒नो मा॒ नि
गा॑ क॒तम॑च्च॒नाहं॑ वि॒श्वे दे॒वासो॑ अधि॑ वोचता मे। दे॒वीः
षडु॑र्वीरु॒रु णः॑ कृ॒णोत॑ वि॒श्वे दे॒वास इ॒ह वी॑रयध्वम्। मा
हा॑स्महि प्र॒जया॑ मा त॒नूभि॑र्मा र॒धाम॑ द्विष॒ते सोम॑ राजन्।
अ॒ग्निर्म॑न्युम्प्रति॒नुद॑न्पुरस्ता॑त् [30]

अद॑ब्धो गो॒पाः परि॑ पाहि न॒स्त्वम्। प्र॒त्यश्चो॑ यन्तु नि॒गुतः॑
पुन॑स्ते॒ऽमैषां॑ चि॒त्तम्प्र॑बुधा॒ वि नै॑शत्। धा॒ता धा॑तृणाम्भुव॑नस्य
यस्पति॑र्दे॒वः स॑वि॒तार॑मभि॒माति॑षाहम्। इ॒मं य॒ज्ञम॑श्विनो॒भा
बृह॑स्पति॑र्दे॒वाः पा॑न्तु यज॑मानं न्य॒र्थात्। उ॒रुव्य॑चा॒ नो म॑हिषः

शर्म॑ य॒सद॒स्मिन् हवे॑ पुरु॒हूतः पु॒रु॒ख्यु। स नः॑ प्र॒जायै॑ हर्य॒श्व
मृ॒डये॒न्द्र मा [31]

नो॒ री॒रि॒षो मा परा॑ दाः। ये नः॑ स॒पत्न्या अप॑ ते
भ॑व॒न्त्विन्द्रा॒ग्निभ्या॑मव॒ बा॒धामहे॑ तान्। वस॑वो रु॒द्रा आ॑दि॒त्या
उ॒परि॒स्पृश॑म्मो॒ग्रं चेत्ता॑रम॒धिरा॒जम॑क्रन्। अ॒र्वाश्च॒मिन्द्र॑म॒मुतो॑
हवामहे॒ यो गो॒जिद्धं॑ न॒जिद॑श्च॒जिद्यः॑। इ॒मं नो॑ य॒ज्ञं वि॑ह्वे
जु॒षस्वा॒स्य कु॑र्मो ह॒रिवो मे॒दिनं॑ त्वा॥ [32]

गन्तां दूषयन्स्तौमि ययोश्शर्धोऽर्जुमतिरनुं चन चतुस्त्रिंशच्च॥15॥

अ॒ग्नेर्म॑न्वे प्रथ॒मस्य॑ प्रचे॒तसो॑ यम्पाश्च॑जन्यम्ब॒हवः॑
समि॒न्धते॑। वि॒श्वस्यां॑ वि॒शि प्र॑वि॒विशि॒वाऽस॑मीमहे स नो॑
मु॒ञ्चत्व॑ऽह॒सः। यस्ये॒दम्प्रा॒णन्नि॑मिषद्यदे॒जति॑ यस्य॑ जा॒तं
जने॑मानं च॒ के॒वलम्। स्तौ॒म्यग्निं॑ ना॒थितो॑ जो॒हवी॑मि स
नो॑ मु॒ञ्चत्व॑ऽह॒सः। इन्द्र॑स्य मन्ये प्रथ॒मस्य॑ प्रचे॒तसो॑ वृ॒त्रघ्नः॑
स्तोमा॒ उप॒ मामु॑पागुः। यो दा॒शुषः॑ सु॒कृतो॑ हव॒मुप॒ गन्ता॑
[33]

स नो॑ मु॒ञ्चत्व॑ऽह॒सः। यः सं॒ग्रा॒मं नय॑ति सं व॒शी यु॒धे यः
पु॒ष्टानि॑ स॒सृज॑ति त्र॒याणि॑। स्तौ॒मीन्द्रं॑ ना॒थितो॑ जो॒हवी॑मि

स नो मुञ्चत्व॑ हंसः। मन्वे वाम्मित्रावरुणा तस्य वित्त॑
 सत्यौजसा दृ॑हणा यं नुदेथे। या राजान॑ स॒रथं या॒थ उ॒ग्रा
 ता नो मुञ्चत॒मागंसः। यो वा॒ रथं ऋजुर॑श्मिः स॒त्यध॑र्मा
 मिथुश्चर॑न्तमुप॒याति॑ दूषयन्। स्तौमि [34]

मित्रावरुणा नाथितो जोहवीमि तौ नो मुञ्चत॒मागंसः।
 वा॒योः स॑वि॒तुर्वि॑दथानि मन्महे यावा॑त्मन्वद्विभृ॒तो यौ च॒
 र॒ख्यतः। यौ विश्व॑स्य परिभू ब॒भूवतु॑स्तौ नो मुञ्चत॒मागंसः।
 उप॒ श्रेष्ठा न आ॒शिषो॑ दे॒वयो॑र्धमे अस्थिरन्। स्तौमि वा॒यु॑
 स॑वि॒तारं॑ नाथितो जोहवीमि तौ नो मुञ्चत॒मागंसः। र॒थीत॑मौ
 रथी॒नाम॑ह ऊ॒तये शुभं॑ गमिष्ठौ सु॒यमे॑भिर॒श्वैः। ययोः [35]

वां दे॒वौ दे॒वेष्वनि॑शितमोजस्तौ नो मुञ्चत॒मागंसः।
 यदया॑तं वह॒तुः सूर्या॑याम्निच॒क्रेण॑ स॒ सद॑मिच्छ॒मानौ।
 स्तौमि दे॒वाव॒श्विनौ॑ नाथितो जोहवीमि तौ नो मुञ्चत॒मागंसः।
 म॒रुता॑म॒मन्वे॒ अधि॑ नो ब्रुवन्तु प्रेमां वाचं विश्वा॑मवन्तु विश्वे।
 आ॒शून् हु॑वे सु॒यमा॑नूतये ते नो मुञ्चन्त्वेन॑सः। ति॒ग्ममा॑युधं
 वी॒डित॑ सह॑स्वद्वि॒व्यः शर्धः [36]

पृ॒त॑नासु जि॒ष्णु। स्तौमि दे॒वान्म॒रुतो॑ नाथितो जोहवीमि

ते नो॑ मुञ्चन्त्वेन॑सः। दे॒वानाम॑मन्वे॒ अधि॑ नो ब्रुवन्तु॒ प्रेमां॑
वाचं॑ वि॒श्वाम॑वन्तु वि॒श्वे॑। आ॒शून् हु॑वे सु॒यमा॑नूतये॒ ते नो॑
मुञ्चन्त्वेन॑सः। यदि॒दम्मा॑भि॒शोच॑ति॒ पौरु॑षेयेण॒ दैव्ये॑न। स्तौमि॒
वि॒श्वान्दे॒वान्ना॑थि॒तो जो॑हवीमि॒ ते नो॑ मुञ्चन्त्वेन॑सः। अनु॑
नोऽद्या॑नु॒मति॑रनु॒ [37]

इद॑नुमते॒ त्वद्वै॑श्वान॒रो न॑ ऊ॒त्या पृ॒ष्ठो दि॒वि। ये
अप्र॑थेता॒ममि॑तेभि॒रोजो॑भिर्ये॒ प्रति॑ष्ठे अ॒भ॒वतां॑ वसू॒नाम्। स्तौमि॒
द्यावा॑पृथि॒वी ना॑थि॒तो जो॑हवीमि॒ ते नो॑ मुञ्चत॒म॒हंसः॑।
उर्वी॑ रोदसी॒ वरि॑वः कृ॒णोतं॑ र॒खेत्र॑स्य पत्नी॒ अधि॑ नो
ब्रूया॑तम्। स्तौमि॒ द्यावा॑पृथि॒वी ना॑थि॒तो जो॑हवीमि॒ ते नो॑
मुञ्चत॒म॒हंसः॑। यत्ते॑ व॒यम्पु॑रुष॒त्रा य॑वि॒ष्ठावि॒द्वा॒सश्च॑कृ॒मा
कच्च॑न [38]

आगः॑। कृ॒धी स्व॑स्मा॒स्य अदि॑ते॒रना॑गा॒ व्येना॑सि॒ शिश्र॑थो॒
विष्व॑ग॒ग्ने। यथा॑ ह॒ तद्व॑सवो गौ॒र्यं चि॒त्प॒दि पि॒ताम॑मु॒ञ्चता॑
यज॑त्राः। ए॒वा त्वम॑स्मत्प्र मु॒ञ्चा व्य॑हूः प्रा॒तार्य॑ग्ने प्र॒तरां॑ न॒
आयुः॑॥ [39]

अग्निर्वा वामश्वो द्विचत्वारिंशच्च॥११॥

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>
